

1:1 Bak nim na ahebu meedaha vab diat dat ee, "Alat Vameadaha Im," lahamda Yesus lam ehe bak. Labi ame di labe, "Alat Vameadaha Im," lahamda lam Alati ahili modesda. Labi, "Alat Vameadaha Im," lahamda lam gi Ala am bak. 2 Abo aham di iube ame Da lam gi Alati ahili esdam bak. 3 Asum ahoba modealahana zi lamti labi bak adba niba modealahana zi nimti ahebu meedaha di lam Alat ame Da lamti ahili meedaha bak. Ba na vàmtea buà nim ame Da vab diat modeheda vabak. 4 Im dam bakda ahedem bake debu ame Da am. Labi im aibu bake aidam dam nim iba modi Fauhaedamda ame Da am. 5 Labi iba modi Fauhaedamda labe Aho dam aibu bak laba aidamna ozomom dam laba fi ddam labe modi fa fauhaedam bohu modesdam bak. Ba ame aibu bak lam bisi feà labe ame fi ddam bak lam ba mali sutem vabak. Gi bohu modesdam bak. 6 Neha taia? Dat, "Yohanes," lahamda laba, "Nehame modele," lahame Alat ab gagu oluham. 7 Ame Fauhaedamda lam damat biem bake, "Dam ahebu Yohanesat li vameadam im lam fà aime ame Fauhaedamdate tu vuzehese," lahame ab gagu oluham bak. 8 Ame da Yohanes lam ba ame Fauhaedamda modem vabak. Gi ame Fauhaedamda labet Aho meedaha im lam, "Yohanesat fa im dedateli vou vameatedale," lahame Alat gagu oluhuda am am bak. 9 Ame Da Fauhaedamda bisi imboda vàmtea labe, "Ala akatihasu meedam Alat modela?" laham im imbona lam dam bakda ahebu fà ozobohudi fi gatedase," lahame Aho dam bakdate ab li tàmham. 10 Alat ame Da modi Amti ahili asum ahoba modealahana zi lamti bak niba modealahana zi nimti alimeat modehenàme Aho dat aliholi bak niba li modeha dam bak damat, "Am amat modela?" laham bak damat ba vi ozobohudem bie. 11 Abo gi Am Yahudi damat esdam bake li modeha Am damat Am mu vooho bak. 12 Lahana meit Aba uledi tu vuzehi meedam dam lamota Aho naedat gagu ame dam laba modi fat ab Alam damalemam bak. 13 Etei lab vameadaha im lam Alam damalehe bak lam ba ibi iho bak damat nam ve ozo, "Data faase," lahame im nam modeme data faam bake gagoho vabak. Gi Alat Ahamo ozome ame dam laba meedume Am damalehe bak. 14 Ame Da, "Alat Vameadaha Im," lahamda lam fa dat aliholi iba dam bakdate tau vazisi aidaha bak. Abo Am Ai Alat Aho modehe Adat vàmtea lam oluhu labe imota Am feà bak aaha bak. Abo Aho iba ozahit deeli im neà bak meedam bak lam iho laha aaha bak. Labi, "Ala akatihasu meedam Alat modela?" laham im imbona ahebu lam im biem bake iba modi fi gateheda Am am bak. Ba im meida vastehe vabak. 15 Ame Da lam damat biem bake Yohanes Mei Vuu Valo Baptisleiamda laba Alat modi ozobohudehe labe aho dam bake vameadaha bak. Aho dam bake vameadam di gi dae buduana nehi vameada. "Eho amu uba neha, 'Dat em ohuse ba vulemda lam amu di ium gi Alati ahili aida. Em baat. Labihàm emti ame Da lamti ozom di bisi feàda Am am bak,' lahame eho uba lab vameadahada lam, 'Alat Vameadaha Im,' lahamda Am am bak." 16 Aho bisi iba ozahit deeli im neà bak meedam labe neà bak duana iba neo vi modidam bak. 17 Nehaha bak. Alat aham di iube im Israel dam bake neha, "Nehame modem neàte. A nehame meedamule," lahame gagu fi hasi esuhu Im Feàna zi lam gi Musa bake gagu aho fa vou vamea usdume iba vou fuhu im am bak. Lahana, "Ala akatihasu meedam Alat modela?" laham im imbona lamti Aho iba ozahit deeli im neà bak meedam bak lamti labihasu Yesus abo Alat Gagui Fihasi Vimteme Oluhu Dat Boehàda labe iba modi fi gatehe im am bak. 18 Alam alihi ba meit aaha vabak. Gi Aho modehe Adat vàmteata abo Aba ahida Aho bisi deeleheda labe Ahamo, "Am Ai Ala akatihasu meedam Alat modela?" laham bak im biem bake iba modi im fi gateheda Am am bak. 19 "Alat Gagui Fihasi Vimteme Oluhu Dat Boehàda lam amat mode?" laham bak lam Yohanes Mei Vuu Valo Baptisleiamda labe aho ozobohudi vameadaha bak gi neha: Yohanesat bak aotba baa bohu dam vaba alim bak laba dam bake im vahokedume dam vuu valo baptisleidam digat meida labe kota Yerusalem laba azihi Yahudi dam busaoda labe iho damat Ala bake lomna ve vua vahudam toheda zi totbaho lamti ame dam laba vi tau meedam dam abo Lewi dam totbaho lamti labihasu gagome Yohanes bake ab oluham. "Om ana dèt mode?" laham bak vi ailo ame dam laba

gagu ab oluham. 20 Labi ame dam labe Yohanes bake lafusi neha, "Alat Gagu Fihasi Vimteme Oluhu Dat Boehàda lam om ame Da modeo," laham bak vi ailo gagoho di lam aho ba vastehe vaba abo ahate fa im nehasu vameadaha bak. "Alat Gagu Fihasi Vimteme Oluhu Dat Boehàda lam em ame Da modem kaio," lahame ahate fa gagoho bak. 21 Lahame labi gagoha ame dam labe neo vi ailo gago, "Làhà om ame Da modem vabameam làhà om ana dât mode? Làhà om gi Alat Vameadaha Im Aime Fa Dam Bake Ahate Vameidahada abo Alat aham di iube ahena asum ahoba vou tom iluhuda Eliat fa bak niba nom ilu mode moio?" Lahahat Yohanesat fa gago, "Vabà! Em ba ame da Eliat modem vabak." Lahahat ame dam labe neo vi ailo gago, "Làhà om gi dat Alat vameadaha im aime fa dam bake ahate vameidahada meida abo Alat neha, 'Ba olu tame,' lahame fet gagu esuhu Dât mode moio?" Lahahat Yohanesat fa gago, "Vabà! Em ame Da modem kaio." 22 Gi labihadume ot gagoi ot gagoidaha vabamu ame dam etei leheda zi labe fa ab gagoham. "Làhà im bie. Om ana dât mode? Oho iba fa gagom im ohomo ozome im imbo bak lam iba taho gagu iho ame im aime neàdi fa dam iba gagu oluhu dam laba fa le vameadase." 23 Lahame labi gagohemu Yohanesat gi dat ahamda Alat vameadaha im aime fa dam bake ahate vameidahada Yesaya labe aho fet toeme esuhu im vi ozome fa ame dam laba ab gagoham. "Uho nasi Yesayat fet toeme esuhu im nim ozomale. 'Dat bak aotba baa bohu dam vaba alim bak laba azi dam aba valadamda zi laba dae buduana nehi vameada. "Alat Gagu Fihasi Vimteme Olulo Modem Dat Boehàda lem zie laba uho nasi duzu zie fet vueme neàdehena ahum Am ba lese." ' Lahame Yesayat lab fet toeme esuhu im lam imbodi eho ame da nibe ab meedamam bak." 24 Lahame labi vameadume modeha Farisi dam labe ibi iho gagu Yohanes bake oudaha dam totbaho labe neo Yohanes bake vi ailo ab gagoham. "Oho amu neha, 'Om ba Alat Gagu Fihasi Vimteme Oluhu Dat Boehàda modem kaio.' Labi neo, 'Eliat modem kaio.' Labi neo, 'Alat Vameadaha Im Aime Fa Dam Bake Ahate Vameidahada Alat ba Olulo Modemda modem kaio,' lahadam dât ba oba amat gagu om im dedateli im Yahudi dam oho vuu valo baptisleidàla?" 26 Lahahat Yohanesat fa gago, "Dam giida labe iho meia aame ozo, 'Da lam am ahu faina meedam bak lam aho voedume fa ahu neà bak meedalo vàmadi fa Ala bake tu vuzehe?' laham bak aame ozobohudem bake eho dam bake gi vaota baptisleidam bak. Lahana em ohuse ba vi vulelo modemda lam gi etei uba tau vahi esdamda ame Da ehe bak um biem bak. Ame Da feàda labe Am naba dusumna lo tadehena lam eho feà vab dât lo ziamom di em ba uloho vabak," lahame ab gagoham. 28 Etei lab vameadaha im lam gi Yordan Soabo ala zizem totbaho Betania abo Yohanes Mei Vuu Valo Baptisleiamda labe aho dam vuu valo baptisleidam bak laba meedaha imot modem bak. 29 Labihadume izi dihasi Yohanesat gut aaha Yesus aba ledam bak alimeat ab gut aame dam duada zi laba ab gagoham. "Iumeeee! Uho nasi aamale. Alat modi ahumdi esuhu Domba Adatea iubet ab ledamam tame. Abo iho dam bakda ahebu iho faina meedàmu Alat iba beolo modem bak lam, 'Fà faamome vei neàdedase,' laham bak vi ozome ba ot vai eloi iba soat vausu fa vei neàdedalo modemda etei iubet ab ledamam tame. 30 Eho amu uba neha, 'Amu di ium Dat em ohuse ba vulemda nimti Alati ahili aida. Em baat. Labihàm emti ame Da lamti ozom di bisi feàda Am am bak,' lahame eho amu uba lab vameadaha Da lam iubet ab ledamam tame. 31 Israel dam Soat Vausu Fa Vei Neàdemda lam, 'Yesus ame Da modeo,' laham bak lam ememe laha amu di iube ame bak lam biem bak. Lahana eho niba lehe bak debu gi nehaha bak. Alat Israel dam soat vausu fa vei neàdedam bak laba vi ozome Aho Gagu Fihasi Vimteme Olulo Modemda Boehàda lam Israel damat biem bake, 'Eho ame dam laba modi fi gatedase,' lahame eho ahit li dam bake vuu valo baptisleidam bak," lahame aho dam bake labihasu ab vameadaham. 32 Labi vameadume neàdi Yohanesat neo aho aaha im neo nehi vi vameada. "Israel dam Soat Vausu Fa Vei Neàdemda lam, 'Yesus ame Da modeo,' laham bak lam eho amu di ium bie. Lahana Alat amu eba neha, 'Damat iho faina meedaha bak voou fa vei neàdedaha dam lam

oho vuu valo baptisleidale. Labi oho ame bak lam vuusu meedam labe aameam Em Aha Nutabe Neàna labe fa bume doleti ulohonali nom oaedume Dat meida laba nom vou usi vizi abehandemeam làhà ame Da am tame. Ame Da labe Aho ba damat Aba tu vuzehi meedam dam lam Em Aha Nutabe Neàna lam Aho ame dam laba modi vizi teudedamda Am am bak,' lahame eba labi gagohe mu eho ame bak lam ab aaham. Eho Yesus vuu valo baptislehe di labe tom aaha asum ahoba iube Alam Aha Nutabe Neàna labe fa bume doleti ulohonali nom vou oaedume Yesus bake nom vou usi vizi teudi abehandehi bak lam em alimeat ab aame ozoham bak. 'Aa làhà! Israel dam Soat Vausu Fa Vei Neàdemda ame?' laham bak em ab aame ozobohudeham bak. 34 Làhàmù eho aame ozobohudehe im lam dam bake gi nehi vameadam bak. 'Ame Da Yesus lam Alam Adat am bak,' lahame ozobohudi gagodam bak," lahame Yohanesat ab vameadaham. 35 Labihadume izi dihasi Yohanesat neo aba aho meia vuu valo baptisleidam bak laba esda. Aba Aho vahokedam im ozobohudelo vi tau meedam dam behàsu laha ame bak laba tau aida. 36 Labi aidume modeha Yesus lebohotelo modemu Yohanesat ab gagoham. "Um nasi aama. Alat modi ahumdi esuhu Domba Adatea iube iba ab lebohotelo modemam tame." 37 Lahaha bak lam ame da Yohanes bake vi tau meedam dam behàsu labe aime fa Yesus bake vule ab tau ladamam. 38 Labi modeha Yesusat fa it vaktesi aaha ame dam behàsu Aba vuedàmù vi ailo ab gagoham. "Um Eba ana vi vuedà?" Lahahat ame dam behàsu labe fa gago, "Ai Rabi oa, Oho aidam bak akete?" (Ibrani dae Rabi gagom di gi, "Guru," lahame gagom bak.) 39 Lahahat Yesusat fa gago, "Uhumo Eba vuli aameam Ebe Eho aidam bak um ab aamam bak." Làhàmù Yesus bake vuli Aho aidam bak aame neàdi modeha dimatali jam empat fuhemu gi ame digat zoho lam Yesus bake tau aidume vou disi aibule. 40 Ame da Yohanes bake vi tau meedam dam behàsu labe iho fa Yesus bake vi tau meedaha debu gi neha: Yohanes Mei Vuu Valo Baptisleiamda labe aho amu Yesusat modelo modem im lam fet vameadamna im ahim nibe aime Yesus bake ab vi tau meedamam bak. Im ahim Aba vi tau meedamda meida ee gagom Andreas laham bak. Im ahim nibe iho Yesus bake vi tau meedam di labe Andreasta kehàm vaba am dubu Simon Petrus bake fa le ab nabidamam. Le nabidume aame neàdi ab gagoham. "Simon oa, Mesias abo iho amu di iube vou faodamda imota ame Da tào. Eba nasi tau le aale." (Ibrani dae, "Mesias," laham di gi Yunani dae, "Kristus," laham bak. Abo, "Alat Gagu Fihasi Vimtème Oluhu Dat Boehàda," laham bak.) 42 Lahame labi gagu neàdi Andreasat Simon neo ve Yesus bake ab vou laham. "Simon ana dèt mode?" laham bak Yesus bake gagu ozobohudelo ahit Yesus bake ab vou laham. Vou le lafusi modeha Yesusat Simon bake gut aasumtedi ab gagoham. "Om Yonam adat ee gagom Simon laham bak. Lahana etei di nibe faasi om ee meida, 'Kefas,' lahame ee gahàda neo vi talulo modem bak," lahame Yesusat ab gagoham. (Etei ee, "Kefas," lahame taluhu bak lam fa Yunani dae gagom di gi, "Petrus," laham bak.) 43 Labi izi dihasi Yesusat Aho ozo, "Em Galilea bak laba lase," lahame fet vi ozome esuhemu ladam labe Filipus bake tahi gago, "Om Ebe Eho vahokedam im ozobohudelo vi tau meedam datelele," lahame labi gagohe mu ame baket ab modeham. 44 Ame da Filipus lam gi Andreasti Petrusti ibi iho azihi bak num debu Betsaida laba vahi azihi dèt moz. 45 Laham dèt aho fa neo amti vou alemda ee gagom Natanael lahamdate tahi im vameadalo ab laham. Le tahi ab gagoham. "Alat Gagu Fihasi Vimtème Oluhu Dat Boehàda lam imota aaho. Abo dat ahamda Musat aho dam bake gagu fi hasi esuhu Im Feàna Toedahana zi lamti labi dam aham di iube Alat vameadaha im aime fa dam bake ahate vameaidaha dam labe ibi iho fet toedume esuhu im lamti nehasu toe, 'Alat Gagu Fihasi Vimtème Olulo Modem Dat Boehàda olu tame,' lahame amu fet gagoho Da lam imota aaho. Ame Da lam Am ee, 'Yesus,' lahamda num debu Nazaret laba vou budualehe dèt moz. Abo Yusufam adat moz." 46 Lahame labi gagu modeha Natanael gi tozome fa vi ailo gago, "Nazaret! Elaidam vab baket modem bak. Ba bak labet im feàna meedamda lehe bakvat im aihe?" Lahahat Filipus fa

ab gagoham. "Lahamnàme gi ozahit ohomo eba tau vule aamale," lahame gagohemu aho usai Filipus bake ab tau vulaham. 47 Vuladam labe lafusi Yesusat Aho gut aaha Natanael Aba ledam bak aahemu, "Natanael akatihasu meedam dât modela?" laham bak vi ozome ab gut vameadamam. "Etei ledamda nim ba meia vagem vab dât modem bak. Labihàmu am abo Yahudi dât am tai ahobada Israel labe vou faat leheda meida abo Israel da aabo am bak." 48 Lahaha bak lam Natanael aho aime vi ailo ab gagoham. "Ne, Om adi bake em aame ozobohudi labi gagodà?" Lahahat Yesusat fa gago, "Natanael oa, Filipus amu oba le gagoho vab di iube om ut araso adba nutabe bak laba nusdam bak lam Em ozobohudehe bak." 49 Lahahat Natanael àvodi ab gagoham. "Làhà, Ai Guru oa, Om abo Alam Adat am tame. Abo im Israel dam vuusu im vahokedam Boehàda iho vou faodamda Om am bak." 50 Lahame labi gagoha Yesusat fa gago, "Oo làhà! Om gi Eho om ut araso adba nutabe bak laba nusdam bak lam Ehemmo ozobohudi oba gagoho bak om aihhi labe oho Eba tu vuzehi labi gagoho taia? Lahana om ba aam di im bisi feàda abo oho etei aaha im nidi nim vafози bisi feàda om ba aa tame. 51 Lo, lamota imbot. Lahana Eho etei uba neo gagolo modem im imboda nim laha aimale. Ame im feàna lam uho ba aamna gi neha: 'Em abo Alat Gagu Fihasi Vimteme Oluhu Dat Boehàda am tame,' laham bak um biem bake um ba asum ahoba iube fatahivai bumatalehena ozomomna labet Alat Am im gagu vou usem dam labe Eba abo Asum Ahoba Iubet Bak Niba Li Dateleheda niba nom ilu fat tom iluam bak uho aa tame," lahame Yesusat labi fet ab gagu esuham.

2:1 Labi usi behàndi Galilea bak zoho labe am num debu Kana laba azim dat labe nam valo modemu dam na giaha bak ehete. Làhàmu Yesusam oi laba tau vula. 2 Labi Yesusti Aba Aho vahokedam im ozobohudelo vi tau meedam damti iba gagohemu im laha laba tau ab vulaham. 3 Labi na gihi lam àdume modeha dam zi labe iho uddam anggur oo vaksa ab foleham. Làhàmu Yesusam oi labe Aba li gago, "Dam nim im anggur oo vaksa folehe bak." 4 Lahahat Yesusat fa gago, "Oi, om akati Eba li ame im lam labi gagodà? 'Em amat modela?' laham bak tombalem bak lam Alat Aho ozoho di fuhu vabak." 5 Lahame Am oi bake labi gagohemu Am oiat Yesus Aho uledi modem bak ozobohudi fa na modem dam laba ab gagoham. "Em adat labe Aho uba gagu modiamna lam gi aime meedale." 6 Di lam im netà obe laba vao fedemna ket modehena alimnabu enam ehete. Ame nabu lam Yahudi damat ibi iho fi ham bake kikem vao nom noadam nabu am. Ame nabu vàmtea lam vao laba fedem di abo vao seratus liter fedem bak ozomomna am bak. 7 Làhàmu Yesusat dam na modem dam laba ab gagoham. "Ame vao foli alimdehe nabu zi laba vao feddale." Làhàmu vao feddume ab bekeddaham. 8 Bekeddahemu Yesusat neo ab gagoham. "Um nasi vao fedeme bekeddahanabu laba vao koena nom noai fa im duzu vameame dam faheme na lodamda laba vou lale." Làhàmu ame baket ab modeham. 9 Ame vao koena fa ame da laba vou li ab loham. Lu ame da labe gut ve ab udeham. Ame vao lam Yesusat modi anggur oo vaksalehe vaot moz. Lahana ame im duzu vameame dam faheme na lodamda labe aho damat uddam anggur oo vaksa gi amu folehe bak am ozobohudi, "Anggur oo vaksa nidi nim ana bake vahela?" laham bak bie. Lahana na modem dam labe iho vao noai aba vou lehe dam lamota ozobohut. Lahana im biemda labe aho dat etei nam valo modemda laba deeli vou baedalo aa gagome ab leham. 10 Li duzu neàdi ab gagoham. "Eho etei uddam vao nim udeme ozoha, anggur oo vaksa ba udeheda nim bisi neàda am tame. Ibi iho modi balehà bak lam amu anggur oo vaksa bisi neàda amu nasi dam bake lodume uddam bak. Labi uddume ohu bobidume bak vabi meedam di gi anggur oo vaksa mahate udem neà vabda ba lodume uddume novam bak. Lahana oho etei labihaha vabak. Oho vedi udem neàda ahit mali esu faobe ba lodam bak. Abo neàte," lahame ab vameadaham. 11 Etei na damat ihimo modem biem im feàna damat fet aame ozobohudemna lam Yesusat etei alimeat ab

modeham. Abo Galilea bak zoho labe num debu Kana laba alimeat ab modeham. Aho labi modehe labe, "Am feà bak," ab modi tombaleham. Labi tombalehemu Aba vi tau meedam dam labe iho neha, "Yesus abo Alam Adat am tame," lahame ibi iho tu vuzehehe bak lam ab vi teudedamam. 12 Labi ame im lada lam modeme neàdi Yesusti Am oiti Am vahada ziti labi Aba vi tau meedam dam lamti iho vazisi ame bak lam vou esmozi num debu Kapernaum laba ab lazeham. Laba lazi teohe azi izida. 13 Yahudi dam bada nibe iho im tai ahobada zi labe Im Adam Datahida Alat Oddaha Vabat Labohotehe Bake Vi Ozome Roti Fikidehe Vabna àme Iziam di ee gagom Paskah vou fuseo vabalehe di labe Yesus Aba Aho vahokedam im ozobohudelo vi tau meedam damti vahi kota Yerusalem laba id ladume ab zooleham. 14 Labi kota Yerusalem laba zooli fusi ame Fihasi Ala Bake Vou Baedam Num Vàmteabu laba ab laham. Labi ame Num Vàmteabu labe am ad oli aam bak tomba laba le duzu aaha damat Ala bake vou baedalo na Ala bake lomna abo sapiti dombati bume doleti labihasu ot loidam bak ab aaham. Labi doi meit iube vou leheda abo na vam biem doi vame fa ame Num Vàmteabu laba na ba vam neà doi lam ot loiam dam iho doi vahedam beahuba nusdam bak laha aa. 15 Ame bak lam aahemu faki, "Meia beodamna modese," lahame ihi sokba bobaehenati ulohona zi ateme dombuli neàdi ame dam zi lam beodume ame Num Vàmteabu labe am ad oli aam bak tomba lam dam ab futodume seddamam. Abo domba zi lamti sapi zi lamti laha meoli iteda. Labi ame doi ot loiadam dam labe im doi laha feàkmome voeda. Labi im doi vahedam beahuba zi lam laha vuu vaktemoda. Gi labihada. 16 Labi bume dole meia ot loiam dam laba Aho neha, "Um na zi nim nasi vou futodume bàhàgo iuba lale. Um akati Em Aiam Num niba na zi nim ot loidàla? Taho ilile." 17 Lahame Yesusat gi etei labi gagoha Aba vi tau meedam dam labe iho ab vi ozoham. "Meit Alat Vameadaha Im Toedahana laba im nidi nim Yesusat modi ab imbodeham bak," lahame ab vi ozoham. Ame toehe im neha: "Boehàda oa, Eho Om num bisi vou faovoemda modemu Em ahu galihasi seteho." Lahame toehe bak lam ab vi ozoham. 18 Labi modeha Yahudi dam vuusdam busaoda zi labe iho Yesus etei lab meedaha bak lam aahemu beàdalo ab gagoham. "Baka Oba amat modi im dedateli im lam meedàla? Alat Oba gagu im dedateli Oho ame im lam meedameam làhà Oho laha na damat ihimo modem biem im feàna iba modi iho fet aame, 'Imbote,' laham bak ozobohudemna nasi modele." 19 Lahahat Yesusat fa gago, "Làhà ame Fihasi Ala Bake Vou Baedam Num Vàmteabu nim uho fa faamome seddamale. Labihazobe Eho gi usi behàndi fa momet neàdem bak." 20 Lahahat ame Yahudi dam labe alandi fa ab gagoham. "Aa! Fihasi Ala Bake Vou Baedam Num Vàmteabu nim abo empat puluh enam tahun moho bak. Ba akati Oho usi behàndi mome neàde?" 21 Lahana ame Yahudi dam vuusdam busaoda zi labe iho Yesusat lab gagoho bak lam vabile. Yesusat etei ame Fihasi Ala Bake Vou Baedam Num Vàmteabu laba im lam gagoho di lam Am gi vèlu gagoho bak. Gi Am so laba modem im fi bovai gagoho bak. 22 Ba di iube Am eloho bak labe fat ahedi usam bak imbodehezobe Aba Aho vahokedam im ozobohudelo vi tau meedam dam labe Yesusat etei lab gagoho bak lam ba it ozome ozobohudehe bak ehe bak. It ozobohudehemu Alat Vameadaha Im Toedahana zi lamti labi Yesusat ahe di labe Aho lab fet vameadaha im lamti ahebu labihasu vazisi damat ba ozobohudi tu vuzehe bak ehe bak. 23 Dam etei kota Yerusalem laba ame Paskah vi ozome àme iziam di lam Yesus laha tau meeda. Ame bak lam tau meedam di labe Yesusat na damat ihimo modem biem im feàna damat fet aame àvodemna lam duana meeda. Ame lab meedam bak lam dam dua bak aahemu Aba fota tu vuzeheda. 24 Lahana Yesus ba dam laba tum vabak. Dam bakda labe im ahu ad laba modem bak lam ahebu ozobohu labe ba dam laba tuhu vabak. 25 Am ba dat meida nibe fa dat meida, "Neò? Faio?" laham bak ba vi gagu aim vabak. Dam bakda labe im ahu ahebu Am ozobohu labe labihaha bak.

3:1 Labi aibu meida labe dat ee gagom Nikodemus lahamda labe Yesus bake li t`ah. Ame da Nikodemus lam Yahudit Ibi Iho Modem Im Gagu V`amadi Esum Dam Debu labe ahala vou baeaiam im vuusualam debu Farisi laba tau meedamda meida am. Lahamda labe Yesus bake aibut t`ahi ab gagoham. "Ai Guru oa, im dam totbahota Alat Oba neha, 'Dam bake le im nehazu vahokedale,' lahame gagu oluhu bak lam imota ozobohu bak. Ba na damat ihimo modem biem im fe`ana damat fet aame ozobohudemna lam Oho etei lab meedahana lam ba Alat Ahamo Oba modi vizi teudehe vab alia meedam vabak." 3 Lahahat Yesusat fa gago, "Nasi aime ozomale. Meit am fa faasi veimdi g`ah`adem vabameam ba Alam damali Aho vuusu im vahokedam vabiem bak." 4 Lahahat Nikodemus fa gago, "Ne lahana meit am busaoli setehena akati ba fa faaela? Ba am oiam nibeso laba oli am fa faam ne`a? Ba modem biem bak." 5 Lahahat Yesusat fa neo gago, "Lo, lamota imbot. Lahana Eho etei oba gagolo modem im imboda nidi nim laha aima. Meit neha, 'Em Alam damalese,' lahamda lam ba vao labet faasi g`ah`adem vabak. Labi laha Alam Aha Nutabe Ne`ana labe ame da laba modi am ahu ad laba vizi teudem vabak. Labihameam l`ah`a ba Alam damali Aho vuusu im vahokedam vabiem bak. 6 Neham bak. Dam bakda im lahiti data faam di gi ekda faadam bak. Lahana im modi fa veimdi g`ah`ali Alati vou alem bak lam gi Alam Aha Nutabe Ne`ana labet iba modi vizehe labe labihadam bak. 7 Labih`amu Eho etei lab gagoho bak lam, 'Meit am fa faasi g`ah`adese,' lahaha bak lam a `avodemule. 8 Neham bak. Nutabe lam gi iuba foadada. Iuba foadada. Lahana ame nutabe, 'Adi baket led`a? Adi bake lada?' laham bak lam im biem bak. Im gi na nigo nigodamna foadam bakta dogoit aida. Labi laha Alam Aha Nutabe Ne`ana labet meia modi vizi fa veimdi g`ah`alem bak lam im laha aame ozobohudem biem bak. Lahana modi fa veimdi g`ah`alem da labe aba aho meedam bak lam iho aame ozobohudem bak am." 9 Lahame labi gagoha Nikodemusat fa Yesus bake ab vi ailo gagoham. "Alam Aha Nutabe Ne`ana labe Aba Aho meia modi vizi fa veimdi g`ah`alem bak lam akatihazasu modemna modela?" 10 Lahahat Yesusat fa neo gago, "Oo, Alat Vameadaha Im Toedahana lam oho ozobohudi Israel dam vuusu im vahokedamda meida om am taia? Ba akati Eho lab gagoho im lam om ozom bi mode? 11 L`ah`a Eho etei oba gagolo modem im imboda nidi nim nasi iademe aima. Ibi iho ozobohudehena lam iho uba Yahudi eeda busaodate ahate gagomda am. Labi laha iho fakot aahada lam iho uba ahate vameadamda am. Lahana um akati ibi iho vameadaha bak lam uho fa vuzehem vaba modela? 12 Ne, Eho etei, 'Ala akatihazasu meedam Alat modela?' laham bak lam uba vahokedaha di lam gi bak niba meedaha im vouhoha um ba Eba tu vuzehhe vabak. Eho ba neo ame bak lam uba vahokelo meedam di Eho asum ahoba iuba meedam im vouhomeam uho ba akati Eba tu vuzehhe? 13 Ba bak niba esdamda meida v`am`tea bu`ava nibet fa asum ahoba iuba laisi, 'Imvat eheo?' laham bak aame fa im dedateli lezemda vabak. Lahana asum ahoba iuba, 'Imvat eheo?' laham bak Emota ozobohu bak. Em abo Asum Ahoba Iubet Bak Niba Li Dateleheda modemu Em gi aham di iube asum ahoba iuba aidume fa ame im lam uba vameadalo Eho bak niba lehe bak. 14 Aham di iube im Yahudi dam tai ahobada zi labe iho bak aotba baa bohu dam vaba alim bak laba vabi godam di lam Musat vameadaha im mohoda lam lam ozbat veedaha bak. L`ah`amu Alat Musa bake neha, 'Tembaga ve vabiedume ozbasoti ulohona modi fa ut aaso bohulana laba modesu vousale. Labi ozbat veedaha dam labe fa ame ozba itti ulohona laba tom aameam Eho modi fa ne`ade tame,' l`ah`amu Musat ame baket ab modeham. Im lada lam amu mode. Labi ba neo Em abo Asum Ahoba Iubet Bak Niba Li Dateleheda nim laha damat abo ut tetehehunaso laba esu vousalo modem bak. 15 Labiham labe meit Eba tu vuzehi meedameam l`ah`a ame da laba modi Alati vahi gi ahe ne`ana bohu vuusdam bak," lahame Yesusat ab vameadume esuham. 16 Nasi ozomale. Alat dam bakda ahebu bisi deelehemu Aho dam bakda iho faina meedam bak laba gohali fa ot vai eloi vasea ve`atom bak vi ozohemu gi Aho modehe Adat v`am`tea lam bak niba ab oluham bak. Labiham labe Aho Oluhu Adat lam meit Aba neha, "Am abo Alat Gagu Fihasi

Vimteme Oluhu Dat Boehàda am tame," laham bak laba tu vuzehi meedamda lam ba Alat vaite su voom vaba abo Amti vahi gi ahe neàna bohu vuusdam bak. 17 Nehaha bak. Alat amu Am Adat bak niba oluhu di lam dam bakdate neha, "Uho faina meedam damat modem labe fà beose," lahame na asimbuna feà modelo gagu oluhu vabak. Gi dam bakda labe iho faina meedamu Aho beom bak lam Am Adat fa iba soat vausu fa vei neàdem bak laba ozome gagu oluhu bak. 18 Meit Alam Adat laba tu vuzehemda laba Alat ba, "Oho faina meedam dât modem labe fà beose," lahame na asimbuna feà modelo ba gagom vabak. Lahana meit Aba tu vuzehem vabda laba Aho gi amu di iube, "Beo tame," lahame na asimbuna feà modelo Alat fet gagu esuhu bak lam lahasdam bak. Abo ame da labe Alat modehe Adat vàmtea laba tu vuzehem mom labe labihaha bak. 19 Alat dam bakda, "Beose," lahame na asimbuna feà modelo gagu esuhu bak lam gi neham labe labihadam bak. Alam Adat abo Fauhaedamda labet bak niba ab leham bak. Lahana dam bakda labe iho faina meedam labe ame Fauhaedamda laba faki gi aibu bak laba deeli esdam bohu meedam damat modem bak. Labiha labe Alat, "Beose," lahame ab gagu esuham bak. 20 Neham bak. Dam faina meedam dam ba fauha bak laba deelem vabak. Gi faki mom bak. Ibi iho lab faina meedam bak lam fi dem bak labna zohème ba ame fauha bak laba le netàdem vabak. Gi mom bak. 21 Lahana meit im imbona lam tu vuzehi vamdesu meedamda lam ame fauha bak laba lam meot. Abo, "Ibi iho lab im vamdesu meedam bak lam gi Alat Aho iba vuusdam labe iho ame baket meedam damat modem bak," laham bak tombalelo ahit ame fauha bak laba lam bak. 22 Labi ba digat meida iube Yesus Aba vi tau meedam damti vahi kota Yerusalem vou esmozi Yudea bak obe laba le dam etei Aba tu vuzehi meedam dam lam Aho gagu valo baptisleida. 23 Labi ame di labe Yohanes Mei Vuu Valo Baptisleiamda lam damat si sel ousuhu vab di iube aho laha Ainon sii abo num debu Salim netàdehe bak laba abo vao dua bak ehe bak laba dam vuu valo baptisleida. Damat, "Valo baptisese," lahame dihasi valada. Dihasi valada. Labihadaha labe labihada. 25 Labi digat meida labe Yohanes aba aho vahokedam im ozobohudelo vi tau meedam dam labe iho fa im Yahudi da meidati daet otesi otesida. "Im Yahudi dam vaot itatame neàdemna neàda akete? Yohanesat im dedateli modemda nibao? Yesusat im dedateli modemda labao?" laham bak lam ozom bi daet otesi otesida. 26 Lànhamu Yohanesam dam labe aba li ab gagoham. "Ai Guru oa, digat amuda iube imti omti Yordan Soabo dumam totbaho laba vahi esdam di oho iba neha, 'Tumeee, iba soat vausu fa vei neàdedalo modemda iubet ab ledamam tame,' lahame vimteme iba ahate vameahada lam om vi ozodam lahasuheo? Ame Da lam laha bak iuba le dam vuu valo ab baptisleidamam bak. Om ozom vaba? Dam dua bak Oba lem vaba fa Ame Da laba dihasi valada. Dihasi valada. Labihadam bak." 27 Lahahat Yohanesat fa gago, "Neà bak. Im dam bakda ahebu ibi iho na meedam bak lam gi Alat gagu esuhu labe ame baket ahaladiame meedam bak. 28 Eho amu uba neha, 'Em ba Alat Gaguhasi Vimteme Oluhu Dat Boehàda modem vabak. Alat gi eba neha, "Em nasi le zie vueme ame Da ba vuese," lahame gagu oluhuda em am bak,' laham bak lam eho amu gagohona um aime ozobohudehena taia? 29 Eho dat nam valo modem bak vouhodase. Ame nam soao lam gi aba valo modemda labe aho aidam bak laba lam bak tade. Labi ame nam valo modemda labe amti vou alemda labe gi am obe duzu, 'Aba im gagom bak eheo?' lahame vou faoda. Vou faodam labe ame nam valo modemda labe am namti im ot vameaidam bak aidamu am ahu abo deele. Eho etei vouhodam nam valo modemda lam gi Yesus am bak. Labi Amti vou alemda em am bak. Labi eho aiha dam bisi dua bak aba dihasi valada. Dihasi valada. Laham bak lam eho etei aihemu em ba fakem vaba abo gi deeli vâhàdehe bak. 30 Neham bak. 'Ame Da labe Am feà bak lam vi tau vi tauidume budualedase. Labi em fa feà vab dateli vousedase,' laham bak lam Alat modelo àhàkem bak am bak. 31 Uho neham bak ozomale. Asum ahoba iube fa bak niba leheda lamti dam bakdati ozom di bisi feàda asum ahoba iubet leheda Am am. Bak niba esdamda ahebu gi dam bakda labe ibi iho modi balehà bak vouhodam damat

modem bak. Abo im vameadam di gi bak niba modehe im vameadam bak. Lahana asum ahoba iubet leheda im bakda vafozi bisi feàda Am am bak. 32 Ame Da labe Aho dam bake im vameadam di Aho gi Alat Aba modi fi gatei Aho aaha im lamti Aho aihim im lamti lamota dam bake ahate vameadam bak. Lahana ba dam Aba Aho vameahana tu vuzeheda vabak. 33 Lahana meit Aba Aho vameadam im lam tu vuzehemeam làhà ame da lam laha im nidi nim laha neo vi tau ozobohudi gagodam bak. 'Alat vameadaha im lam laha imbo im vameadam bak,' lahame neo vi tau ozobohudi gagodam bak. 34 Neham labe labihaha bak. Ame Da lam gi Alat neha, 'Im Ebeda dam bake vameadase,' lahame gagu oluhuda Am am bak. Alat Am Aha Nutabe Neàna labe ame Da laba modi vizehe di gi na im ahebu modi vizehe bak. Ba koena modi vizehe vabak. Labiha labe Aho gi Alat gagoho im lamota vameadam bak. 35 Im Ai Alat Am Adate deehe labe na ahebu Aba gagu im dedatelehe bak. 36 Labi meit Alam Adat laba uledi tu vuzehemeam làhà Alat ame da laba modi Amti vahi gi ahe neàna bohu vuusdam bak. Lahana meit Am Adat laba uledi tu vuzehem vabameam ba Alati vahi ahe neàna bohu vuusdam vabak. Gi ame da laba Alat fakem bohu vuusdam bak. Ba vaitom kaio," lahame Yohanesat ab vameadaham.

4:1 Ame di lam Farisi damat aihim dam dua bak, "Iba meit vuu valo baptisese," lahame Yesus bake dihasi valada. Dihasi neo valada. Lahada. Labihadume Yesus bake tu vuzehi meit vuu valo baptisli neàdi ame dam Yesus bake vi tau meedam dam totbaho laba vi tau vi taidume duaeda. Abo Yohanes Mei Vuu Valo Baptisleiamda labe aba aho vuu valo baptisli fa aba vi tau meedam dam lam fa vafozi Yesusbada duaeda. Laham bak lam meit li gagoho bak ame Farisi damat ab aihim. ( 2 Lahana Boehàda Yesus mei vuu valo baptislem vab dât modem bak. Gi Aba vi tau meedam dam labe ihimo mei vuu valo baptisleidam bak.) 3 Lahana ba digat meida iube meit neo Yesus bake le ab gagu fi deham. "Damat Oba vi tau meedam damalehemu meit im vuu valo baptisese dam duale. Labi Yohanes abada fa koede. Lahaha bak lam meit gagohona Farisi damat aihim," lahame meit Aba li gagu fi dehena Yesusat aime ozobohudi Aba vi tau meedam dam lamti iho Yudea bak vou esmozi fa Galilea bak laba ab ladamam. 4 Yudea bak vou esmozi ladam di labe Samaria bak labet ab ladamam. Di lam Yahudi damti Samaria damti ba ot vahiam meedam vab damat modem bak. Lahana Yesus ozahit, "Taho lase," lahame iho Aba vi tau meedam dam nimti vahi gi zie buuda Samaria bak labet ab ladamam. 5 Labi ame Samaria bak labet ladume ala tomali abo jam dua belas fuseo vabaehe diat num debu Sikar labe am bàhàgo laba ab lafuham. Ame Sikar lam gi dat ahamda Yakub labe aho aham di iube am adat Yusuf bake loho bak zoho laba netàdi modesuhu num debut moz. Labi laha ame num debu bak labe am bàhàgo laba Yakubat aham di iube sihi vao nobu laha ehete. Labi Yesus ladaha vanamahemu ame vao nobu obe laba ab le nusuham. Labi ame di labe Aba vi tau meedam dam nibe iho na àm bak ozome na àmna doit valo Sikar laba ab ladaham. Labi omozit Yesus lab aidam di labe Samariada lahi vao noalo ab leham. Li modeha Yesusat ab gut gagoham. "Oi, oho Eba vao noai lom vabao?" 9 Lahahat nam labe ozo, "Ne, Yahudi dam ba im Samaria dam labe vao udemna zoho ibida ba vao udem vabak. Mom bak," lahame àvodi fa ab gagoham. "O Dat busao, Om Yahudi dam modemna akati eba Samariada lahi niba vao tauledàla?" 10 Lahahat Yesusat fa gago, "Ne, Alat oba lolo modemna lam om ozobohude. Labi Eho etei oba vao tauleheda nim, 'Em amat modela?' lahame bak lam om laha neo vi ozobohude. Labihameam oho Eba neo vao tauledàmu Eho uledi oba ahedem vao lu udem bak." 11 Lahahat ame nam labe fa gago, "Dat busao, ne Om vao noamna vabna vao nobu feà adba iuba modesdamna akati noaela? Oho ahedem vao lam adi bake vâlà? 12 Làhà im tai ahobada Yakub labe iba modi vou esmoho vao misia nim fai? Labi Om bisi feàda ame? Ne, ame vao nim Yakub am naeda laha tau vao noai udehe bak. Labi am adamti aba aho ba vou faat lehe mekehà dam zi lamti labi na fi ho zi lamti labihasu



uddaha vao nim fai? Labi Obo Oho lolo modemda lam fa bisi neà? Lahame ozome labi gagohe?" 13 Lahahat Yesusat neo fa vi vameada, "Meit vao nidi nim udemeam ame da lam fa neo vao àhàkedam bak. 14 Lahana meit vao Eho lolo modemda nim udemeam ame da labe ba valo àhàkedam vabak. Neham labe labihaha bak. Vao Eho lolo modemda nim meit udemeam làhà aho udehe bak labet modi am ahu ad laba vao aanati ulohona labaha bohu futodam bakti ulohona modi am gi ahe neàna bohu vuusdam bak." 15 Lahahat nam labe vabi abo gi vao abo gagoho tiba fa neo ab gagoham. "Dat busao, làhà Oho eba ame vao lam lu udele. Labiham labe em ba valo àhàkem vab labe em ba niba li vao noaiam vabak am tame." 16 Lahahat Yesusat fa neo gago, "Làhà, om nasi fa le om dat gagome fa niba vou lele." 17 Lahahat nam labe fa gago, "Mm, em dat vabak." Lahame labi gagohemu Yesusat fa ab gagoham. "Lo, oho etei, 'Em dat kaio,' lahaha bak lam imbo taia? Lahana oho amu dat vaha bak auoholehe bak. Labi oho etei bako vou godam dat lam oho iademe vaha vab namet modem bak." 19 Lahame labi gagoha nam nibe vatohedam labe fa neo ab gagoham. "Làhà Dat busao, em etei ab ozoham bak. Om Alat Am im fi desi fa meia ahate vameaidaha dèt mode moio? 20 Làhà Oho ozom, meit Ala bake, 'Am abo feàte,' lahame ahu adat iedi vou baedam di adi bake vou baedam labe neàde? Ne, im Samaria dam nibe gi sibu nidi niba Ala bake vou baedam bak. Abo im tai ahobada zi labe ibi iho aham di iube iho Ala bake vou baedam di gi sibu nidi nimota laisi ame baket meedam bak. Lahana um Yahudi damat neha, 'Im Samaria dam git meedala. Gi Fihasi Ala Bake Vou Baedam Num Vàmteabu kota Yerusalem laba duzuhuna lamota Ala bake vou baedam bak am tame,' lahame labi gagodam bak. Làhàmu Oho ozom, um Yahudi damat imbodeheo? Iho Samaria damat ibi iho meedam bak labet imbodeheo? Adida imbodehela?" 21 Lahame labi gagohemu Yesusat neo ab vi vameadamam. "Oi, Eho etei oba gagolo modem im nidi nim mahate aime tu vuzehelè. Faobe ba damat im Ai Ala bake vou baedalo modem di ba gi sibu niba modeo, gi kota Yerusalem laba modeo, ba gi bak lamota vou baedam vabak. 22 Um Samaria dam labe uho Ala bake vou baedam di, 'Akatihasu meedam Alat modela?' laham bak lam um mahate ozobohudi neàdem vab damat Ala bake vou baedam bak. Lahana im Yahudi dam nibe iho Ala bake vou baedam di im abo ozobohu aabodi Ala bake vou baedam bak. Neham labe labihaha bak. Im Boehàda Alat amu di iube neha, 'Aho ba dam soat vausu fa vei neàdedam bak lam Aho fa dam bake modi fi zeam bitom di Aho gi Yahudi dam labet modi ame bak lam fi zeam bito tame,' lahame iba fet gagu esuhu bak. 23 Neham bak. Ala Am alihi im gi fota aam vabnat modem bak. Labihàmu iho dam bakda Aba vou baedam di gi im ahu ad nibet vi ozome vou baedam bak. Lahana gi modem vaba abo imbolabe ahu adat vi ozome ahu vàmadi Aba vou baedam bak. Damat ba im Ai Ala bake abo imbona vou baedalo modem di gi labiham bak ba mode tame. Gi im ahu ad nibet vi ozome abo imbolabe ahu vàmadi im Ai Ala bake vou baedam bak. Ai Ala labe gi, 'Dam gi labihasu meedam damta Aba vou baedase,' lahame ozome àhàki vou faodam bak. Lahana ame bak lam gi etei di nibet ab faasi meedamam bak." 25 Lahame labi vameadume modeha nam labe fa neo gago, "Em nehi ozo. Alat Aho Gagu Olulo Modemda Boehàda ba iba le tame. Labi Aho lehezobe iho ba meedam biem im lam ahebu Aho ba iba gagu im ozobohudi fi gate tame." (Ibrani dae, "Mesias," laham di modeo, Yunani dae, "Kristus," laham di modeo, gi, "Alat Gagu Fihasi Vimteme Oluhu Dat Boehàda," lahame gagom bak am.) 26 Lahame labi gagoha Yesus labe fa ab gagoham. "Ne, Em ame Da am bak. Em ame Da etei im oba ab vameadamam bak." 27 Lahame gi etei lab vameadam lahasuhu di labe iho Yesus bake vi tau meedam dam nibe iho num debu iuba le fa li aaha Yesus lahi bake im vameadam bak aame ab àvodeham. "Guruleheda ba lahi bake im ot vameaidam vabak. Fiham bak," lahame ozome ab àvodeham. Lahana ba ame nam laba, "Om ana lehela?" lahame ba labi vi ailo gagom bak modem kai. Labi laha Yesus bake, "Guru, um ana im vameadàla?" laham bak lam laha ba vi ailo gagom iedi gi vei daleàde. 28 Labi ame nam

labe am vao noamna lam gi laba vou esmozi ame num debu bake esdam dam laba fa ab emoeham. Labi le dam bake ab vameadamam. 29 "Etei niba li eba im vameadamda eho b`h`ago laba vou esmohoda lam um nasi eba tau fa le aamale. Da lam im ebe eho amu modeheda ahebu Ahamo ozobohudi eba gut vameadaha bak. Uho ozom, Da lam Alat amu Gagu Fihasi Vimeteme Iba Olulo Modem Boeh`ada iho vou faodamda ameo? Imo taho fa le aase," lahame labi gagohemu dam lam ahebu num debu labe usname fa Yesus bake ab ladamam. 31 Labihadam di omozit iho Yesus bake vi tau meedam dam nibe Aba nehi gagoda. "Ai Guru oa, Om idoalehe bak na nasi li `ale." 32 Lahame labi gagoha Yesusat fa vi gago, "Em na `amna ehe bak um biem bak." 33 Lahahat Am dam labe ihimo fa ab ot vameaidamam. "Uho ozom, Da nim amat na vou li lu `ahela?" 34 Lahahat Yesusat Aho etei, "Na `amna ehe bak," lahame lab gagoho bak lam fa neo vi vameada. "Eho na `ame modi ne`ademna ehe bak. Eba Gagu Oluhuda lam abo Em Ai Ala labe Aba Aho ozome Eba gagoho im lam ahebu meedume ne`adem bak lam bisi Eba modi ne`ademna am bak. 35 Nasi ozomale. Uho gi nehasu ozome gagodam damat mode taia? 'Na debe uloholi ne`adi ala ahiali ame na ba modeme vahedam bak,' lahame labi gagodume bale`ah`a damat mode taia? Lahana Eho uba gi im nehasu gagom bak. 'Um na utoho zi laba aale. Na ambedi ne`adeho. Modeme vahedam bak ab vou fuham bak. Abo Samaria dam labe meit iba li vameadam labe aime Eba tu vuzehem bake ahumdi vou faodam bak ehe bak,' lahame uba labi gagom bak. 36 Neham bak. Dam amuda iube bak vabieme ne`adi na oo gulaha dam lam amu gi meedume ne`adehe bak. Lahana dam ba etei nibe na modeme vahedam dam lam ibi iho na meedam bak gohali vanna lam etei ab vadamam tame. Labiham labe dat amu bak vabieme ne`adi na oo gulahada lamti labi dat na ba modeme vahedamda lamti gi ame na ab modeme vahehamemu fa vahi deelem bak. Ame dam labe ibi iho modeme vahedamna lam gi dam Eba tu vuzehi im Ebeda meedamda zi am bak. 'Ame dam laba im vameadume modi fa Eba tu vuzehi fa Alati vahi gi ahe ne`ana bohu vuusdase,' laham bak laba ozome modeme vahedam bak. 37 Labih`amu damat gagodume bale`ah`a im nim imbote. Neha: 'Dat meida na de. Labi ame na ambedehezobe dat meida fa modeme vaheda. Labihadam bak,' lahame labi gagodume bale`ah`a im lam imbote. 38 Neham bak. Ba utoho Ebeda lam uho dehe vabna Eho ozahit uba neha, 'Laba le na modeme vahedale,' lahame Eho uba gagu oudaha bak. Ame utoho lam Alat dam amomoi gagu oudaha dam labe iho tat vueme na debe vanamahana uho gi mei na ahum fa modeme vahedaha bak," lahame Yesusat im labihasu ab vameadume esuham. 39 Ame Samariada lahi labe neha, "Da lam im ebe eho amu modeheda ahebu Ahamo ozobohudi eba gut vameadaha bak," lahame aho aime `avodi fa dam bake ahate vameaha labe ame Samaria dam lam num debu Sikar laba esuhu dam dua totbaho labe neha, "Ame Da Yesus lam Alat Gagu Fihasi Vimteme Oluhu Dat Boeh`ada Am am bak," lahame ab tu vuzehem. 40 Labi ame Samaria dam labe Yesus bake le t`ahi im vameadaha di labe Yesus bake deeli nehi gagoda. "Om nasi a lamule. Iba tau iddume lale," lahame labi gagod`amu Yesus uledi ame dam labe im num debu bak laba le tau aidume usi ab beh`asdeham. 41 Ame dam laba Yesusat Ahamo Am im vahokedume usi beh`asdi modeha dam dua bak neo vi taudume Yesus bake ab tu vuzehedamam. 42 Labi tu vuzehedam labe fa ahamte Yesus bake t`ahi im vameadaha nam laba neham ab vameadamam. "Iho etei Yesus bake lab tu vuzehhe bak lam oho aame iba li vameadaha bak lamota ozome tuhu vabak. Im gi ihimo Yesus bake le t`ahi im Abada aidume ab tu vuzehem bak. Abo imbote. Ame Da Yesus lam abo dam bakda ahebu Soat Vausu Fa Vei Ne`ademda Am am bak," laham im lam ab vameadaham. 43 Labi Yesus Aba vi tau meedam dam lamti iho num debu Sikar lam vou esmozi ibi iho Galilea bak laba lam bak ozome neo ab ladamam. 44 Di amuda iube Yesusat Ahamo nehi ahate gagoho bak etet. Aho neha, "Dat Alat vameadaha im aime fa dam bake ahate vameaidahada labe aho bak mei bake lam dita ame dam labe ahu adat iedi aho lab vou le vahokedaha im lam ule ne`at gut ve aba vou baedam labe am im aime meedam meo

bak. Lahana aho am budualehe bak laba fa le am dam laba im vahokedam di am dam labe gi ailahigeàmodam meo bak. Ba ahu adat iedi aho lab li vahokedaha im lam aime aba vou baedam vabak," lahame ahate gagoho bak etet. 45 Lahana Galilea bak zoho laba lafusi modeha ame Galilea bak laba azihi dam totbaho labe gi Aba deelehat gut vada. Ame dam labe amu Yahudi damat kota Yerusalem laba vahe vaheme ame na àme iziam bak abo Paskah lam laba tau vahi meedam di lam Yesusat na damat ihimo modem biem im feàna zi meedaha bak fako ibidat aadahemu labihada. 46 Labi neo Galilea bak laba ladam labe ame bak labe am num debu meida Kana laba fa ab laham. Abo Aho amu laba le vao aabo modi fa anggur oo vaksalehe bak laba fa ab laham. Ame di labe Roma Boehàda meida labe am na vi tau meedamda meida labe am adat fa ibi iho azim num debu Kapernaum laba gaili bisda. 47 Lànhàmù aho aihà Yesusat Yudea bak labet fa Galilea bak niba lehe bak aihemu Kana laba le Yesus bake tahi ab tauledamam. "Em adat Kapernaum laba gaili bisdamda elolo vabaleha. Oho eba nasi tau le modi fa neàdem neào?" 48 Lahame labi taulehemu Yesusat ab gagoham. "Na damat ihimo modem biem im feàna damat amu aaha vabna fet aame àvodemna Eho modem bak lam um dam bakda labe aam vabameam um ba, 'Em abo Alat Gagu Fihasi Vimteme Oluhu Dat Boehàda am tame,' laham bak ba Eba tu vuzehem vabak." 49 Lahame labi gagoha ame eeda labe fa gago, "Dat busao, bisi a kehàmule. Em adat elolo vabaleho. Fa taho lase." 50 Lahahat Yesusat fa gago, "Om nasi om num bake lale. Om adat gi fa neàdehena fa le aa tame." Labi ame eeda labe Yesusat etei lab gagoho bak laba aime tu fa am num bake Kapernaum laba ab ladamam. 51 Labi ladume izi dihasi neo ladameam aaha am na modem dam doait ledam bak ab tàmam. Tahi gago, "Aia, om adat gailehe bak fa aodeha." 52 Lahaha bak aihemu gago, "Ne ana jam fat aodehela?" Lahahat ame dam labe fa gago, "Màt jam satu am so galihaha bak fa neàdi setehena ozomoho bak." 53 Lahaha bak lam aihemu ame eeda labe it ozo. "Oo làhà! Jam lam gi Yesusat eba neha, 'Om adat fat ahede tame,' lahame gagoho jam ame?" lahame it ozobohudi aho am dam laba fi desi aho am damti neha, "Ame Da Yesus lam Alat Gagu Fihasi Vimteme Oluhu Dat Boehàda am tame," lahame Yesus bake ab tu vuzehem. 54 Yesusat ahamte Yudea bak labet fa Galilea bak niba li na damat ihimo modem biem im feàna damat fet aame ozobohudemna ahamte modeheda lamti etei modehedati vahi gagom di ab behàsdeham bak.

5:1 Labi ba di meida iube Yahudi dam neo vahe vaheme na àme iziam di neo meida meedàmù Yesusat, "Vi tause," lahame kota Yerusalem fa neo ab laham. 2 Ame kota Yerusalem bànhàgo obe ke vou vahe zime vabousuhu bak labe am doo meida ad laba, "Domba Ot Loiam Bak Laba Netàdi Modesuhu Doo," laham doo labe am obe damat sihi vao nobu etet. Ame vao nobu ee Aram dae gagom di, "Betesda," laham bak. Labi ame vao nobu labe am valau obe laba vabousuhu ohut baana zisuhuna abo natàh vabna damat nutabe bake nusum bak auohole laba etet. 3 Ame bak laba dam fako faida na aam biemda ziti nao zoho nutabedeheda zi lamti nisileheda totbaho ziti labihasu ame bak laba beiladam meot. [Neham bak. Ame vao nobu laba Alat Am im gagu vou usemda labe nom ilu ame vao laba modi bobodam meot. Labi ame vao gi etei faasi bobodam di labe dat nisileheda nasi fusi ehumda lam am faidehe bak modi fa neàdemda am. Labihàmù vao bobodam bak aalo ame dam nisileheda zi laba beilame vou faoda.] 5 Ame di lam dat nisili abo tiga puluh delapan tahun fuhuda ame bak laba etet. 6 Lahamda labe bisdam bak Yesusat aame ozo, "Da nim am nisilehe bak abo tahun duana gailehe?" laham bak Ahamo ozobohudehemu ab gagoham. "Om fa neàdem bak uledem vabao?" 7 Lahahat dat nisileheda labe fa gago, "Lo, Dat busao, em ule bak. Lahana ame vao modi bobodam di lam dam aheda em visoi nom voomda vabak. Labiham labe ehemo etei usai lasome modiamameam kehàm vaba meit vao bobodam bak laba nasi ehu fa neàdedume em voidam bak tadehe bak." 8 Lahahat Yesusat ame da laba ab gagoham. "Lànhà, usai duzu oho ousu imna lam

ve bolome fa om num bake lale." 9 Lahame gi etei labi gagohoilahit ame da lam fa ab neàdeham. Lànhàmú usai aho ousu imna lam ve bolome fa ab ladamam. Yesusat ame da laba modi fa neàdehe di lam gi hari Sabat abo Yahudi dam labe ibi iho gi azibe im digat modi fa neàdehe bak. 10 Labi dat etei Yesusat modi fa neàdeheda labe aho ousu imna lam ve vou ladam bak lam Yahudi dam busaoda im vameadam dam labe iho ame da labe aho meedam bak lam vi aame ame da laba im ab vahokedamam. "Etei hari Sabat abo gi azibe im digat modemu akati oho ousu imna lam ve vou ladàla? Dat ahamda Musat aho neha, 'Hari Sabat na a meedamule,' lahame toeme fi hasi esuhu labe im Yahudi damat na modem fi ham digat om akati git meedà?" 11 Lahahat ame da labe fa gago, "Vabà! Dat eba modi fa neàdeheda labe Aho neha, 'Oho ousu imna lam ve bolome vou lale,' lahame gagohemu eho gi ame baket modehe bak." 12 Lahahat ame dam labe fa neo gago, "Ne, amat oba neha, 'Oho ousu imna lam ve vou lale,' lahame labi oba gagohela?" 13 Lahame labi gagoha ame da labe aba modi neàdeheda lam, "Amat modela?" laham bak am fa vei vabile. Yesus ba laba doudam vaba gi im vameadam labe dam duada zi laba valiheme setehe labe am gi ab vei vabileham. 14 Labihadume kehàm vaba Yesusat ame da laba ba neo ame Fihasi Ala Bake Vou Baedam Num Vàmteabu labe am ad oli aam bak tomba laba ab vi tàmham. Vi tàmhemu gago, "Nasi aima. Om fa neàdehena, faina meedam bak bohu vuusdam bak nasi vaitole. Oba neo im mei im meime feà bak fumo. Amu gi koena modehe bak fa dualemo." 15 Lahaha bak lam ameda nibe, "Eba modi fa neàdeheda Yesus ame?" laham bak di labe ozobohudi fa ame Yahudi dam busaoda zi laba fa le ab fi deham. "Eba modi fa neàdeheda Yesus am tame," lahame ab le fi deham. 16 Ame bak lam le fi dehemu Yahudi dam busaoda im vameadam dam labe iho ozoha, Yesusat gi ame hari Sabat meia modi fa neàdehemu Yesus bake feàtådume vabidam bak bohu ab faaham. 17 Lahana ame dam labe Aba Aho meedam bak biehemu tombalelo Yesusat ame dam laba im ab vameadamam. "Ne, Em Ai Alat gi amu di iube faasi digat ahebu dam bakdate faobekesi ozahit dam bake im neà bak meedume etei vou fuhu bak. Ba digat meida labe gi azibe im vabak. Ba akati Eho laha modem vaba moela? Em gi Em Aiat modehe baket vi vouhodam bak." 18 Lahame Yesus Aho etei labi gagoho bak labet modi ame Yahudi dam busaoda zi labe, "Imo Yesus otese," lahame faki feà bak fusi neo im aa ab vi odoadamam. Gi labihadam bohu ab faasi meedamam. Ame dam labe neha, "Gi im hari Sabat na modem fi ham digat labe Yesusat mei modi fa neàdehe bak. Labi Aho laha Ala bake, 'Am Ai,' lahame lab gagoho bak labet modi Am fa Alati uloholehe bak," lahame ame Yahudi dam busaoda zi labe Yesus bake ab fakeham. 19 Lànhàmú Yesusat fa ame Yahudi dam busaoda zi laba ab gagoham. "Ebe Eho etei uba gagolo modem im imboda nidi nim um nasi iademe aima. Em Alam Adat modem labe Em ba Ebe Eho ozoho baket meedam vabak. Gi Em Ai Alat Aba Aho ozoho bak laba aame ozobohudi vi meedam bak. Am Adat na meedam bak lam gi Am Aiat na meedam bakti ulohona meedam bak. 20 Neham labe labihadam bak. Em Aiat Eba deeli meedam bak. Labi Aba Aho ozome meedam im ahebu lam Aho Eba modi fi gatehe bak. Labihàmú digat meida ium ame da nisileheda lam Eho modi fa neàdehe bak. Lahana Em Aiat Eba ba neo modi Eho ba modem im lada lam vafози gi feàna modem bak. Labiham labe um ba àvodem bak. 21 Neham bak. Em Aiat mei eloho bak labet modi fa ahedem bak lamti ulohona Eho Am Adat modem labet Eho laha Ebe Eho ozome deelemda laba Eho laha modi fa ahe neàna bohu vuusdam meo bak. 22 Labi laha dam bakdat ibi iho na im meedam bak lam Em Aiat Aho ba uloome vi aime ozobohudi neàdi neha, 'Da lada lam im vamdesu meedam vabda am. Beose. Da nidi nim im vamdesu meedamda am. Neà bak fà modese,' lahame ba vi ozome ozobohudi neàdi gagodam vabak. Ame bak lam Aho gi Eba Am Adat niba fa gagu Eho fa ot vai im dedateli Eho ame baket meedam bak. 23 Em Aiat neham bak ozome Eba labihaha bak. Damat Eba ahu adat iedi vou baedam bak lamti ulohona fa Em Adat bake, 'Ame baket modese,' lahame labihaha bak. Meit Am Adate ahu adat iedi vou baedam vabameam

làhà ba Am Ai Aba Gagu Oluhudate laha ahu adat iedi vou baedam vabak. 24 Im lada lam imbomu im imboda nidi nim laha nasi iademe aima. Meit Eho vameadaha im zi lam tu vuzehi meeda. Labi fa neo Eba gagu oluhuda Em Ai Ala bake laha tu vuzehe. Labihameam làhà Alat ba ame da laba, 'Om faina meedam bake beose,' lahame ba na asimbuna feà modelo gagom vaba gi modi fa Alati vahi gi ahe neàna bohu vuusdam bak. Alati vaitesum bohu modem zie lam vou esmozi fa Alati vahi gi ahe neàna bohu vuusdam zie laba lam bak. 25 Labi im nidi nim laha iademe aima. Dam Alati ot vaitesuhu dam lam ba Alam Adat nibe abo Ebe Eho vameadam im aidam bak ehete. Lahana ame di ab vou fuham bak. Labihàmu Ebe Eho lab vameadam im lam meit tu vuzehi meedaha dam lamota Alat modi Amti vahi gi ahe neàna bohu vuusda tame. Em ame Da ab li dam bake vuusu im vahokedam amemu labihaha bak. 26 Neham labe labihaha bak. Meia modi ahe neàna bohu vuusdam Alat modem labe Aho laha gi amu di iube Emti ahili asum ahoba vahi esdam di labe Aho Eba Am Adat niba vizi Eho fa im dedateli meia modi fa ahe neàna bohu vuusdam Dàt modem bak. 27 Labi Em Abo Asum Ahoba Iubet Bak Niba Li Dateleheda modem labe Em Ai Alat Eba Am Adat niba laha neo modi Eho fa ot vai im dedateli dam bakda ibi iho na im meedam bak laba Eho uloome vi aime ozobohudi neàdi gagodam bak. 28 Eho etei lab gagoho bak lam bisi a àvodemule. Neham bak. Dam elodahada zi labe ba diamut fa Eho, 'Lele,' lahame butem dae lam aime fa im baumahe bak labet usnadam digat ba fu tame. Dam ahe diat im neà bakta meedaha dam lam usnadume fa Alati vahi gi ahe neàna bohu vuusda tame. Lahana dam ahe diat faina meedaha dam lam usnadume Eho neha, 'Beodume Alati vaitesuse,' lahame na asimbuna feà modelo gagoda tame. 30 Lahana ame bak lam meedam di ba gi Ebe Eho ozoho baket meedam vabak. Eho meia uloome vi aime ozobohudi neàdi, 'Beo? Beom vabao?' lahame gagodam bak lam Eho gi Em Ai Alat Aba Aho gagoho bak lam aime neàdi ame baket meedam bak. Labiha labe Eho meia lab uloome vi aime neàdi gagom bak lam ahebu gi ahole vandesu gagodam bak tadehe bak. Neham labe labihaha bak. Em ba, 'Ebe Eho ozoho baket meedume Aho fà deelese,' lahame ba meedam vabak. Em gi Eba gagu oluhuda Em Aiat Aba Aho, 'Nehame modese,' lahame ozoho baket meedume, 'Aho fà deelese,' lahame meedam bak. Labihaha bak," lahame Yesusat ame Yahudi dam busaoda zi laba ab vameadam. 31 Yesusat ame Yahudi dam busaoda zi laba neo nehame vi vameada. " 'Alat Gagu Fihasi Vimteme Oluhu Dat Boehàda Em ame Da am tame,' lahaha bak lam gi Ehem naedat gagomeam dam amomoi aame ozobohudi tau gagomda vabalemeam làhà Eho lab gagoho bak lam, 'Imbo gagoheo? Giomim gagoheo?' laham bak lam um ba tu vuzehem biem bak. 32 Lahana Eba tau gagomda ehe bak. Em Ai Ala labe Aho Eba tau gagom bak lam ba giomim gagom vabak. Abo imbo bak gagodam bak. Tu vuzehem neà bak. 33 Labi um laha Yohanes Mei Vuu Valo Baptisleiamda laba, 'Om ame Da modeo?' laham bak vi ailo dam amomoi aba olu gagu aiha aho neha, 'Em ame Da modem kaio,' lahame veibame Eba laha ahate tau gagoho bak. Aho lab gagoho bak lam imbote. Ba giomim veibam kaio. 34 Lahana Yohanesat lab gagoho bak lam, 'Em ame Da modem kaio,' lahaha bak lam am gi bak dāt Eba tau labi gagoho bak. Em ba ame bak laba tum vabak. Em gi uho Yohanesat lab gagoho bak lam fa vabilemna zohàme Eho gi ahit, 'Uho Yohanesat lab gagoho bak lam aime fa Eba tu vuzehi Alat uba beom vaba soat vausu fa vei neàdedase,' lahame Eho ahit uba vi vameadam bak. 35 Ame da Yohanes aho lab Eba tau gagoho bak lam gi vuagat fauhaedam bakti ulohona fauhaedam labe uba laha modi fauhaedam bak. Labi Yohanesat lab vameadaha im lam um gi ule neàt deeli dogoit aidam bak. Lahana uho lab ule neàt dogoit aidam bak lam ba bohu vuusdam vabak. Gi kehàm vaba fa setem bak. 36 Lahana Eho ozoha, meit neha, 'Alat Gagu Fihasi Vimteme Oluhu Dat Boehàda Em ame Da am tame,' lahame Eba tau ahate gagom bak lam Yohanesbada vafozi bisi feàda ehete. Neham bak. Em Aiat neha, 'Im nidi nim nehazu modele. Im nidi nim nehazu modele. Labihadume neàdi folele,' lahame Eba gagoho im zi lam ahebu Ebe

Eho etei ozome meedam im am bak. Abo Ebe Eho vahokedam im modeo, na damat ihimo modem biem im feàna Eho meedam bak modeo, lahamna zi lam meit aame ozo, 'Imbot. Em Aiat Eba gagu Eho bak niba lehe bak,' laham bak ozobohudi tau gagodam bak. 37 Gi im lada lamota Eba tau gagodam vabak. Em Aiat abo Eba gagu bak niba oluhuda Ahamo laha tau, 'Em ame Da am tame,' lahame Eba tau gagodam bak. Lahana um ba Am dae koena aim bak vab. Ba Am alihi aam bak laha vab. 38 Labi laha Aho gagu uba oluhuda nim uho im Ebeda tu vuzehem vab labe ba im Abada laha um ahu tu vuzehem vaba mu voedaha bak. 39 Uho vedi neha, 'Alat Vameadaha Im Toedahana zi lam iho ulohodesu meedameam làhà iba modi fa Alati vahi gi ahe neàna bohu vuusdam bak,' lahame dihasi ame im laba aame ozoda. Dihasi ame im laba neo aame ozoda. Gi labihadam bohu vuusdam damat modem bak. Lahana um ozom vaba? Alat Gagù Fihasi Vimteme Oluhu Dat Boehàda lam, 'Em ame Da am tame,' lahame fet vameame esuhu bak ehe bak. 40 Lahamnàme um ba, 'Im Alati vahi gi ahe neàna bohu vuusdase,' laham bake ba Eba tu vuzehem moudam damat modem bak. 41 Lahana Eho etei uba im lab vahokedaha bak lam um a git ozodamule. Em ba, 'Dam bak damat Eba ahu adat iedi, "Em abo feàte," lahame vou baedase,' laham bak ozome ba uba im vahokedam vabak. 42 Lahana uho um ahulat meedam bak lam Em ozobohu bak. Um ba Ala bake ahulat deelem vab damat modem bak. 43 Eho bak niba lehe diat Em Aiat Eba gagu oluhu di labe Aho Eba modi Am im ot vai im dedatelehemu lehe bak. Lahana um ba Eba gut deeli vaha vabak. Lahana meit ahamo ozome ostame li vameadam di uho gi gut aime deeli vuzehem meo damat modem bak. 44 Um gi, 'Dam totbaho labe fà iba, "Im abo feàte," lahame iba deeli vou baedase,' lahame ot modidam damat modem bak. Lahana uho ba Ala bisi imboda vàmtea labe, 'Aho fà iba vou baedase,' lahame ba Aho uba deelemna lam uho ba meedam vab damat modem bak. Um labihadam damat modem labe ba akati uho Eba tu vuzehi meedà?" 45 "Uho Eba lab moho bak lam uho ozom, Eho ba diamut Em Aiat avaesdam laba duzu uba vèlu gagoe? Vabà! Eho ba uba vèlu gagom vabak. Uba vèlu gagomda Musa am bak. Uho vedi nehame tu vi ozodam damat modem bak. Dat ahamda Musat toedume fi hasi esuhu Im Feàna zi lam uho vuzehi ulohodesu meedam labe Alat uba soat vausu fa vei neàdedam bak am tiba. Lahana ba labiham vabak. 46 Lahana ame da Musat gi aham di iube Ebe Eho ba modem im fet toeme esuhu bak. Labihàmù uho Musa bake imbona tu vuzehi meedam labe uho akati Eba laha tu vuzehem vaba mode? 47 Lahana uho Musat toedume fi hasi esuhu Im Feàna zi lam uho abobo tu vuzehi meedam vab labe ba akati Eho vou li vameadam im nim uho tu vuzehi meedà?" lahame Yesusat ab vi vameadam.

6:1 Labi ba Yesus Aba vi tau meedam damti iho kota Yerusalem vou esmozi fa Galilea bak laba li digat meida labe iheba ziddume Itea Galilea dumam tot iuba ab bioham. Ame itea lam ee behàsute. Ee meida Tiberias am. 2 Di lam dam dua bak Aba vi tau goda. Yesusat dam gaileheda zi modi fa neàdedaha bak abo na damat ihimo modem biem im feàna damat fet aame ozobohudemna zi Aho amu meedaha bak aahemu vi tau goda. 3 Labihadume modeha Yesus Aba vi tau meedam dam lamti iho bak otesuhu bak labet fa tom ladume ab zizi nusualadaham. 4 Ame di lam Yahudi dam labet ibi iho modi balehà bak na àme iziam bak abo Paskah lam neo fuseo vabaehe di am. 5 Labi nusualadume neàdi Yesusat lab aidam labet nom aaha dam dua bak zi fai, "Aba netàdese," lahame tom ledam bak ab nom aaham. Làhàmù Filipus bake gago, "Dam zi fai nim iho ake le roti doit vame lodume àdàla?" 6 Lahame Yesusat etei lab gagoho bak lam Aho ba modelo modem im Ahamo naedat ozobohuna ahit biehenali Filipusam ahu modi ozolo ahit fi bovai ab gagoham. 7 Lahahat Filipusat fa ab vi gagoham. "Aa! Dam zi feà nimohona iho na ake vame lu àdàla? Dam bisi feà labe ba meit na modeme ala delapan foli vam doi lamohoda vou le na àmna vameam ba uloholem vabak. Iho na àmna le ve fa dam bake vou li gi koena zagum bak laba ozome lodume uloholesome

meedameam dam bisi feà labe na koedi dam zoho fotem bak." 8 Lahame labi gagoha Aba vi tau meedamda meida abo Simon Petrusam dubu Andreas labe aho neo vi gago, "Guru oa, daboseà nib doudamda nim am rotibu gi auoholehenati bohe behàsu buàti ehete. Lahana oho akatiham bake ozome labi gagohela? Dam duana na nim àm koena ba akati modi faheme lodume uloholela?" 10 Lahahat Yesusat fa gago, "Uho dam gagome sibe baa niba nusualadale." Lànhàmù gagu ab nusualadamam. Ame bak lam sibe baa duamu laba gagu ab nusualadaham. Ame dam zi lam dam aabota dem di abo lima ribu fuhu bak. 11 Labi nusualadume neàdi Yesusat ame rotibu auohole lam ve Ala bake, "Neàte," lahame tom gagu neàdi ame rotibu auohole lam fahedume fa Aba vi tau meedam dam laba lodume iho fa ot vai vame dam duada zi laba ab lodaham. Labi neo bohe lam gi ame baket meeda. Abo dam labe àme dedem bake uloholi ab lodaham. Labihadume dam lam ame na lam àdume modeha dedebuli na àmna zoho gi vaheme esu. 12 Lànhàmù Yesusat Aba vi tau meedam dam laba ab gagoham. "Uho nasi na damat àme dedehemu esuhuna zoho lam ahebu vamatele. Na meida vàmtea a voomule." 13 Lànhàmù rotibu auohole modi dualehena lam damat àme neàdi vahehena zoho lam vi ateti atetidume boloseh vahedume modeha boloseh dua belas ab bektoham. 14 Na damat ihimo modem biem im feàna damat fet aame ozobohudemna Yesusat etei lab modehena lam damat vi aahemu im nehazu ab faasi vameadamam. "Lànhà, Ame Da Yesus nim abo Alat Vameadaha Im Aime Fa Dam Bake Ahate Vameaidahada abo Alat amu neha, 'Aho bak niba olu tame,' lahame fet gagu esuhuda lam iho vou faodam Dat am taia?" lahame ab faasi vameadamam. 15 Lànhàmù damat neha, "Imo Yesus tet si modi iba vuusdam boehàdatelese," lahame fet ozome esuhu bak lam Yesus ahamo nasi ozobohudi ozo, "Em Aiat Aba Aho ozome esuhu bak fuhu vabak," laham bak ozobohudi bak lam vou esmozi Ahamo fa neo ab tom ladamam. 16 Labi disi aibulehemu Yesusat Aba vi tau meedam dam labe ihimo ab lazeham. 17 Labi lazi iheba ziddume itea tot iuba num debu Kapernaum laba aibut ab biodamam. Aibulehenàme Yesus ba iba tau biodam kai. 18 Labi biodume itea tombu fusi modeha nutabe fai iubet li vao baho foadam labe im ihe ab oke okedamam. 19 Gi oke okedamna geàmù vou vaelame enam kilometer lamoho ozomomna fusi it aaha Yesusat gi vao tom ahoba laba duzui duzuidume iba ledam bak ab aaham. Lahamnàme, "Yesusat mode?" laham bak im ozobohu vab labe ab iedi modem faideham. 20 Lànhàmù Yesusat vi vuli netàdi ab gagoham. "A iedemule. Eho ledalo." 21 Lahaha bak aihemu iho gi deelehat gut gagu Yesusat fa ab ziham. Labi zihat gi kehàm vabna ibi iho ladam auobe ab zituham. 22 Labi izi dihasi Yesus Aho ahamte li meedaha tot iuba vou esmoho dam labe Yesus setehe bake nabida. "Uho ozom, Yesus ake lahela? Ne, im ba bak niba ihe behàsu aaha vabak. Gi ihe vàmteana Aba vi tau meedam dam labe ihimo ziddume ab bioham bak," lahame ot vameaida. 23 Labi vameadameam aaha num debu Tiberias laba azihi dam ihe ibida ziddume li zituadaha bak ab aaham. Abo màt im Boehàda Yesus Aho rotibu ve Ala bake vou baedume modi dualehe roti àdaha bak netàdi zituadaha bak ab aaham. 24 Labi zituadume nabidume aaha Yesus Aba vi tau meedam damti im alihi aam vabamu fa im iheba ziddume Kapernaum dumam tot iuba Yesus bake vi nabidalo ab biodaham. 25 Labi biodume dumam tot iuba ab zituadaham. Zitu nabidume Yesus bake ab tàmham. Tàhi gago, "Ai Guru oa, Om adi diat niba fuhela? Akati modi biohela?" 26 Lahana Yesusat fa gago, "Lo, uho lab gagoho bak lam Em aiha. Lahana Eho etei uba gagolo modem im imboda nidi nim laha nasi iademe aima. Ubu uho ozome Eba nabidam bak lam Em ozobohu bak. Na damat ihimo modem biem im feàna lam abo damat fet aame ozobohudemna Eho lab meedahana labe am im tombu um ozobohudi Eba nabidam vab damat modem bak. Um gi ame roti lam àdume dedehe labet, 'Fà neo àse,' lahame Eba vi nabidam damat mode taia? 27 Na iho àlo àhàki dihasi meeda. Dihasi meeda. Laham im lam bisi a tombuli meedamule. Lada lam gi kehàm vaba koeili sete. Labi gi àme foli sete. Labihadamna bohu meedam bak. Fa gi nehale. 'Im akatihasu meedam

labe iho Alati vahi ahe neàna bohu vuusdàla?' laham bake gi na àmna koeilem gikina abo uho tu vuzehem bak laba modi teudemna laba vi ozome keàtedi ame im lam dihasi mode. Dihasi mode. Labihadale. Ame bak uba modelo modemda lam gi Asum Ahoba Iubet Bak Niba Li Dateleheda nibe Eho uba ame bak lam modem bak. 'Ame baket modele,' lahame Em Ai Alat Eba deeli gagohemu Eho ot vai im dedateli ab meedamam bak." 28 Lahame labi gagohemu ame dam zi labe fa vi ailo ab gagoham. "Iho ana im meedam labet Alat fa Aba Aho ozoho bak ulohodesu meedàla?" 29 Lahahat Yesusat fa gago, " 'Im nehazu meedale,' lahame Alat uba gagohona gi neham bak. Alat Aba Aho Gagu Fihasi Vimteme Uba Oluhu Dat Boehàda Em ame Da niba uho tu vuzehede." 30 Lahahat ame dam labe neo vi gago, "Làhà, Oho na damat ihimo modem biem im feàna abo damat fet aame ozobohudemna modem labe iho aame ozo, 'Imbote. Alat Gagu Fihasi Vimteme Oluhu Dat Boehàda Om am bak,' lahame iho aame Oba tu vuzehem bak. Làhà Oho ame im feàna adida modi iho aaela? 31 Ne, im tai ahobada zi labe iho aham di iube bak aotba baa bohu dam vaba alim bak Alat ahit zie vou kibo kibodam di labe na àmna ee gagom manna lahamna vou à ladaha bak. Ame im lam meit Alat Vameadaha Im Toedahana laba nehame toehe bak ehe bak. 'Asum ahoba iube bak niba goagoadamna lam Musat dam laba lu àdaha bak.' Lahame toehe im ehe bak. Làhà Oho laha ame da Musati ulohona laha modeme iho aame ozobohudi Oba tuse." 32 Lahahat Yesusat fa gago, "Lahana bisi imbo bak gi nehaha bak. Ame na um tai ahobada zi labe iho àhana lam ba Musat lodaha vabak. Gi Em Ai Alat ame dam laba lodaha bak. Labi etei nim neo Em Aiat roti abo imbona asum ahoba iube bak niba oluhuna uba lolo modem bak ab faasi meedamam bak. 33 Ame roti imbona lam abo Alat uba lolo modemna lam gi neha: Gi Dat asum ahoba iube fa bak niba li dam bakdate modi fa ahe neàna bohu vuusdamda Am am bak." 34 Lahahat ame dam zi labe fa neo gago, "Làhà! Dat Busao, Oho etei di nibe faasi ame roti lam iba dihasi lo dihasi lo labihadale." 35 Lahahat Yesusat neo ab vi gagoham. "Na àmna Meia Modi Alati Vahi Gi Ahe Neàna Bohu Vuusdam Roti lam Em ame Da am bak. Meit Eba tu vuzehemeam làhà ba idoali valo àhàkedam vabak. Eho ame da laba modi asimdi bohu vuusdam bak. 36 Lahana Eho amu uba gagoho bak lam abo uho Eho meedaha im feàna lamti Emti aadahanàme, 'Alat Gagu Fihasi Vimteme Oluhu Dat Boehàda Em am tame,' laham bak Eba ba tu vuzehem vabak lam uho meedam lahasuhu damat modem bak. 37 Em Aiat neha, 'Dam nim Om dam am tame,' lahame fet gagu esuhu dam lam Eba ba tu vuzehi im Ebeda meeda tame. Labi Eba ba tu vuzehem dam lam ba meida vàmtea Em mu voom vabak. Abo vam bak. 38 Neham labe labihaha bak. Em asum ahoba iube bak niba lehe bak nim Em ba Ebe Eho ozoho baket modelo lehe vabak. Gi Eba gagu oluhuda Em Aiat Aba Aho ozoho baket meedalo lehe bak. 39 Eba gagu oluhuda Em Aiat Aba Aho ozoho bak gi neham bak. 'Damat Eba ozom di, "Em abo Alam Adat am tame," lahame ozobohudi Eba tu vuzehem dam laba Eho modi fa Em Aiti vahi gi ahe neàna bohu vuusdam bak ame. Labi Aiat neha, "Dam nim Om dam am tame," lahame fet gagu esuhu dam lam Eho meida vàmtea voom vaba gi ahe neàt vuusu vou aasdam bak ame. Gi labihasu vou aasdume Dam Bake Uloodume Vi Aime Ozobohudi Neàdi Fime Fahedam Digat vou fusi ame dam lam elodahanàme Eho modi fat ahedi usnadam bak ame. Labihadase,' laham bak lam Em Aiat Aba Aho ozoho bak am bak." 41 Lahame labihasu vameadume modeha ame Yahudi dam fa Yesusat bake ab voe voedamam. Yesusat amu neha, "Ame roti asum ahoba iube fa bak niba oluhuna lam Em ame Da am tame," lahame lab gagoho bak lam aihemu faki fa Yesusat bake ab voe voedamam. 42 Voe voedam labe ot vameaida. "Aa! Da nim gi Yusufam adat Yesusat mode taia? Ne, Am oiti Am aiti im ozobohu bak. Baka akati Aho neha, 'Em asum ahoba iube fa bak niba lehe bak,' lahame labi gagodàla?" 43 Lahahat Yesusat fa ab gagoham. "Uho lab faki Eba voe voedam labe ot vameaidam bak lam nasi vaitole. 44 Meit Eba tu vuzehelo modemeam làhà ahamo ozome Eba tu vuzehem vabak. Amu Eba gagu oluhuda Em Aiat nasi meit Eba tu vuzehem bak lam



ame da laba modi vizez labe ba Eba tu vuzehem bak. Labihamda lam Eho ba diamut Dam Bake Uloodume Aime Ozobohudi Neàdi Fime Fahedam Digat fum di lam am eloho bak labe Eho modi fat ahedi usa tame. 45 Dam ahamda Alat vameadaha im aime fa dam bake ahate vameaidaha dam labe damat Eba ba tu vuzehem bak laba ozome ibi iho aham di iube nehi fet toehena nidi nim ehe bak. 'Alat fa dam ahebu im vahokeda tame.' Alat Vameadaha Im Toedahana labihameam làhà Em Ai Alat Aho vahokedam dam lam im Abada aime ozobohudi tu vuzehi meedameam làhà Eba laha tu vuzehi im Ebeda meedam bak. 46 Lahana Eho etei lab gagoho bak lam uho a nehi git ozodamule. 'Meit Em Aiam alihi aaho,' laham bak a ozomule. Ba meit Am alihi aahada vabak. Gi Aba Aho gagu oluhuda Emota Am alihi aame ozobohudehe bak. 47 Im lada lam imbomu im imboda nidi nim laha nasi iademe aima. Meit Eba tu vuzehemda lam Alati vahi gi ahe neàna bohu vuusdamda am bak. 48 Em abo Roti Meia Modi Alati Vahi Gi Ahe Neàna Bohu Vuusdam Roti Em am bak. 49 Um nasi ozomale. Aham di iube um tai ahobada zi labe iho bak aotba baa bohu dam vaba alim bak laba Alat ahit zie vou kibo kibodam di labe iho vou à laha manna zi lam ba iba modi Alati vahi ahe neàna bohu vuusdaha vabak. Ame na àdamnàme gi bak laba elodume seddaha bak. 50 Lahana asum ahoba iube bak niba nom oluhu roti nim abo Em nib doudamda nim ba labiham vabak. Meit ame roti nim àmeam làhà gi Alati vahi ahe neàna bohu vuusdam bak. 51 Imbote. Asum ahoba iube bak niba nom oluhu roti abo meia modi Alati vahi gi ahe neàna bohu vuusdam roti lam Em am bak. Meit ame roti nim àmeam làhà Alati vahi gi ahe neàna bohu vuusdam bak. Ame roti lam gi Em nu am. Dam bakda ahebu iho Alati vahi gi ahe neàna bohu vuusdam bake Eho ahit Em nu nim uledi dam bakdate lolo modem bak." 52 Yesusat etei lab gagoho bak lam gi amti vou alem bake vi ozome am nu niba gi it vèlu gagoho im laba Yahudi damat vabi otesidam labe gago, "Oo, da lam akati Am nu iba lu iho àela? Ba labiham biem bak." 53 Làhàmu Yesusat ozo, "Damat Eba tu vuzehi ibi iho faina meedaha bak lam Aho ba Am vasea veàtoi fa faamom bak uledese," lahame neo im nehazu vi vameada. "Eho etei uba gagolo modem im imboda nidi nim iademe aime ozomale. Asum Ahoba Iubet Bak Niba Li Dateleheda nibe Em so ad nu nim meit àm vaba mu meeda. Labi Em vasea nim laha udem vaba mu meeda. Labihameam làhà ame da lam ba Alati vahi ahe neàna bohu vuusdam vabak. Gi vaitesu meedam dèt modem bak. 54 Lahana Em abo Alat Gagu Fihasi Vimteme Oluhu Dat Boehàda modem labe meit Em so ad nu nim à. Labi Em vasea nim laha ude. Labihasu meedameam làhà ame da lam Alati vahi gi ahe neàna bohu vuusdam bak. Labi Dam Bake Uloodume Aime Ozobohudi Neàdi Fime Fahedam Digat lam vou fusi Eho fa li ame dam lam elodahanàme Eho modi fat ahedi usnada tame. 55 Neham bak. Em so ad nu nim àmna imbona am. Labi Em vasea nim udemna imbona am. Labihaha bak. 56 Meit Em so ad nu nim à. Labi Em vasea laha ude. Labihasu meedameam làhà ame da lamti Emti ot vou aliame ahu vàmadi meedam bak. 57 Im bakda ahebu ahe di godam bak lam Em Aiat debu modehe bak. Em Aiat labiham Alat modem labe Aho neo Eba gagu Eho bak niba li Dateli ahe di godam bak. Labiha labe meit Em so ad nu nim àmeam làhà Eho ame da laba modi Alati vahi gi ahe neàna bohu vuusdam bak. 58 Eho amu uba lab gagoho bak lam neo vi gagolo. Roti asum ahoba iube bak niba nom oluhu roti lam Em am bak. Lahana im tai ahobada zi labe iho àhà manna lamti uloho vabak. Ame dam labe iho ame manna àdamnàme gi elodume seddaha damat modem bak. Lahana meit Eho etei lab gagoho roti lam àmeam gi Alati vahi ahe neàna bohu vuusdam bak." 59 Lahame lab vameadaha im bohu lam Yesusat Aho num debu Kapernaum laba abo Yahudi damat ihimo fi hasi bakamta vahi Alat vameadaha im ahamda dogoit aidam bakti im meiti meedam num laba oli ab vahokedaham. 60 Yesusat im labihasu vameadume modeha Aba Aho vahokedam im ozobohudelo vi tau meedam dam dua totbaho labe iho aime ozome voe voedam labe ot gago ot gagoida. "Aa! Ame Da labe etei iba nib vahokedaha im nim iho vi ozom biem im iba vahokedaha bak. Ba amat uledi vuzehi

meedà?" 61 Lahana ame dam labe Aho lab gagoho bak laba faki voe voedaha bak lam Yesusat Ahamo ozobohudi ame dam laba ab gagoham. "Eho lab vahokedaha im vàmtea buà lam uho aime faki Em vou esmolo modeo? 62 Lànhà Eho Asum Ahoba Iubet Bak Niba Li Dateleheda fa Ebe amu azihi bake ba tom ilum bak uho aameam um di lam akatihà? Lànhà uho di lam bisi faki feà bak fum di ame? 63 Alam Aha Nutabe Neàna labe Aho meia modi vizi Alati vahi fa ahe neàna bohu vuusdamda Am am bak. Dam bakda iho keàtedi meedam im lam ba na vamna vabak. Ebe Eho uba vameadaha im lam gi Alam Aha Nutabe Neàna labe Aho Eba modi vizi teudehe labe Eho uba vameadaha im lam fa uba modi Alati vahi gi ahe neàna bohu vuusdam imot modem bak. 64 Laham imot modernàmè um dam totbaho labe Eba tu vuzehem mom lahasuhu dam ehe bak." (Yesusat etei lab gagoho bak lam gi neham bak nasi fet ozobohudehe labe labi gagoho bak. Dam adida Aba tu vuzehem moe? Labi dat adida Am vou fohome meia ub lu ote? Laham bak lam gi amu di iube dam bake ahamte lab faasi vahokedam di iube nasi fet ozobohudehe bak.) 65 Lahame labi gagu neàdi Yesusat neo vi gago, " 'Ana modi dam Eba tu vuzehem mohela?' laham bak lam Eho amu uba gagohona fa neo vi gagolo. Meit Eba tu vuzehelo modemeam lànhà ba ame da lam Alat neha, 'Modem neàte,' lahame nasi ame da laba modi teudehe vaba alia modem vabak." 66 Lahame Yesusat ame bak lam etei lab gagoho di labe faasi Aba Aho vahokedam im ozobohudelo vi tau meedam dam dua totbaho labe fa Yesus mu vou esmozi fa ibi amu modem bake fa meeda. 67 Lànhàmù Yesusat Aba bisi vi tau meedam dam dua belas laba ab gagoham. "Um akatihà? Um laha Em mu vou esmozi lào?" 68 Lahahat Simon Petrusat fa gago, "Ai Boehàda oa, iho fa Om mu vou esmozi im ama bake là? 'Meia modi Alati vahi fa ahe neàna vuusdam bak lam akatihasu modernna modela?' laham im lam bisi ozobohudi meia fi gatemda Om vàmtea am bak. 69 Om abo Alat Ahamo gagu fi hasi asum ahoba iube bak niba nom oluhu Dat bisi Neàboda Vàmtea Om am bak. Laham bak lam im ozobohudi tu vuzehi ab neàbodedaham bak." 70 Lahahat Yesusat fa gago, "Em um fi me vaha di dam dua belas vaha taia? Lahana um meidavat setan zi vuusdam Boehàda Iblis labe aho veimai fa im abada modelo modem bak," lahame ab vi gagoham. 71 (Etei Yesusat lab vàu gagoho bak lam gi Simon Iskariotam adat Yudas labe aho ba modem im nasi fet ozobohudi vàu vameadaha bak. Ame da Yudas gi dua belas meida modernàmè ba Yesus vou fohome meia ub lu otelo modemda am bak.)

7:1 Labi ba di meida iube Yesus Aba vi tau meedam dam lamti gi Galilea bak laba esdam di labe Aho gi num debu meida iuba le vahokeda. Num debu meida iuba le vahokeda. Gi labihada. Ba Yudea bak laba ahit lam mom dât moz. Yudea bak laba azim Yahudi busaoda, "Am otese," lahame aa odoadam labe laba lam mu meeda. 2 Ame di labe Yahudi damat na àme iziam bak meida fuseo vabalehe bak. Neha: Aham di iube Yahudi damat im tai ahobada bak aotba baa bohu dam vaba alim bak laba abo Alat ahit vou kibo kibodam zie laba ladam di labe iho teohet mome vou idetehe num moadume vou idetedam bak. Labi dam badat ame bak laba vi ozome vouhodalo ut et num moadume iddam meot. Ame bak lam fa neo vi ozome na àme iziam di fuhemu damat Yudea bak labe am num debu meida Yerusalem laba vahe vaheda. Labihadam di labe Yesusam vahadam zi labe Aba im vahokeda. "Om akati fa gi Galilea niba bisi aidàla? Fa Yudea bak laba le na damat ihimo modem biem im feàna modem labe dam Obo Oho vahokedam im ozobohudelo vi tau meedam dam labe fà aase. 4 Oho gi Galilea niba aa aidameam ba ee Oboda akati damat aime vou baedà? Om ba elaidam datelem vabak. 'Na damat ihimo modem biem im feàna lam Oho modem meote,' laham bak lam imbodemeam lànhà bak iuba le mode. Bak iuba le mode. Gi labihadume bak ahebu esdam damat fà aadase." 5 Lahame Yesusam vahadam zi labe laha Aba tu vuzehem moudam labe Yesus bake tozome im ab vahokedamam. 6 Lahahat Yesusat fa gago, " 'Em amat modela?'

lahame modi fi gatem di fum kaio. Umota kota Yerusalem laba etei lào? Ba di iube lào? Gi ostame lam nèa bak. 7 Ba dam uba fakemda na vabak. Lahana Eho dam bakda abo Alat modem im biem dam laba, 'Um faina meedam damat modem bak,' lahame ahate vameadam bak laba damat Eho lab gagoho im aime Eba faki meedam damat modem bak. 8 Ame Na àme Iziam bak kota Yerusalem laba uhumo lala. 'Em amat modela?' lahame modi fi gatem bak lam fuhu vab di Em ba taum kaio." 9 Lahame gagu nèadi Am tauhu vaba gi Galilea laba aida. 10 Labi Am vahadam zi labe ame Na àme Iziam bak laba le setehezobe Yesus laha ba neo ame bak laba aa vi vula. Labi aa vi vule damat Aba aame ozobohudem bak labna zohàme gi aa goda. 11 Labi ame Na àme Iziam bak laba Yahudi dam busaoda eeda zi laba laha ehete. Yesus lem bak labna zohàme nabidam labe dam bake vou gagoteda, "Um ame Da Yesus alihi aaheo?" lahame iuba le gago. Iuba le gago. Labihada. 12 Ame Na àme Iziam bak laba godam dam zi labe, "Yesus ana dèt modela?" lahame voe voedam labe ot gagoi ot gagoida. Dam totbaho labe neha, "Da lam abo gi im nèa bakta meedam Dèt modem bak," lahame gagoda. Lahana dam totbaho labe vedi nehi gago, "Vab. Da lam gi meia ahi vagem Dèt modem bak," lahame tozome gagoda. Labihada. 13 Lahana dam totbaho labe Yahudi dam busaoda eeda zi labe iba fakemna zohàme iedi ibi iho ozoho bak lam ba ahatet vameadam kai. 14 Labi ame Na àme Iziam di folelo vabalehe digat meida labe Yesusat ame Fihasi Ala Bake Vou Baedam Num Vàmteabu labe am ad oli aam bak tomba laba le dam bake ahate le duzu im ab faasi vahokedamam. 15 Aho etei li lab vahokedam im lam ame Yahudi dam zi labe aime àvodi ab ot gagoi ot gagoidamam. "Aa làhà! Uho ozom, ame Da nibe Aho Alat Vameadaha Im Toedahana lam akati modi Aho bisi ozobohudi vahoketedàla? Im Yahudi dam sekolah ibida tau vahohehe vab Dèt im lam akati ozobohudi vahoketedàla?" lahame ab ot vameaidamam. 16 Lahame lab vameadaha bak lam Yesusat fa vi aime ame dam laba ab gagoham. "Eho etei lab vahokedaha im lam ba Ebe Eho ozoho baket uba vahokedam vabak. Gi Eba gagu oluhu Ala labe Aba Aho ozoho baket uba vahokedam bak. 17 Meit neha, 'Em gi Alat Aba Aho ozoho baket meedase,' lahame ozome gagomda lam fa gi neham bak vi tau ozobohudem bak am bak. 'Eho lab vahokedaha im lam, "Adi baket lehela?" "Em gi ee Ebeda vouse," lahame vahokedào? "Gi Alat Aba Aho ozoho baket Eho vahokedào?" ' Laham bak vi tau ozobohudem bak am bak. 18 Neham bak. Meit ahamo im dedateli gi im abadata vou li vameadamna lam, 'Gi ee abada vousei damat aba vou baedase,' lahame meedam dèt modem bak. Lahana meit neha, 'Eba gagu oluhuda labe ee Abada vousei vou baedase,' lahame im Aba Aho meedamda lam gi im vandesu meedam bak. Ba meia vagemda modem vabak. Abo im imbona meedam dèt modem bak. 19 Ne, Alat Israel dam bake neha, 'Nehame modem nèate. Im lada lam a modemule,' lahame gagu fi hasi esuhu Im Feàna zi lam Musat ot vai um tai ahobada zi laba vameame nèadi fa um tai ahobada zi labe neo ot vai fa neo uba vou vamea usehena taia? Lahana um meida vàmtea buà ba ame Im Feàna zi lam ulohodesu meedamda vabak. Uho ulohodesu meedameam làhà um ba Em otelo aa odoadam vabak." 20 Lahahat ame dam duada labet neha, "Ba Oba amat otelo meedà? Gi mei ahu oli veimam setan om ahu veimai om gi ahusobuli meedamna taia?" 21 Lahahat Yesusat fa gago, "Im Yahudi damat na modem vaba gi azibe im digat hari Sabat labe Eho meia modi fa nèadehemu um aame Eba fakehe dam taia? 22 Lahana um laha hari Sabat na meedam dam taia? Amu aham di iube Musat uba neha, 'Um daboseà faam di usi tujuh foli nèadehezobe am laso aubehà sokba ukbole,' lahame uba vou gago usehe im lam uho vi tau meedam labe uho um daboseà faasi usi tujuh folehemu gi hari Sabat modernàme um gi ozahit ame digat labe um daboseà laso aubehà sokba ukbom meo dam taia? (Lahana eho ozoha, ame laso aubehà sokba ukbom bak lam bisi Musat ahamo vou gago usehe vabak. Gi tai ahobada iube faasi nasi vou gago usehe bak.) 23 Làhà uho dat ahamda Musat aho toedume fi hasi esuhu Im Feàna zi lam voom vaba abo ulohodesu meedalo um gi data laso aubehà sokba hari Sabat ukbom damat ba akati modi

gi ame hari Sabat Eho dat so ahebu nisileheda laba modi fa neàdem bak lam uho Eba aame fakehela? 24 Uho Eho meedam im laba gi fakot aame vi ozome ozobohudi neàdi gagodam bak lam nasi voole. Eho lab meedam bak laba uho aame vi ozome ozobohudi neàdi gagolo modem di gi Em Ai Alat Aba Aho neha, 'Bak lam neà bak ame? Fai bak ame?' lahame Ahamo ozoho bak laba vi ozome gagomta neàte. Uho labihameam làhà, 'Em abo Alat Gagu Fihasi Vimteme Oluhu Dat Boehàda am tame,' laham bak um ozobohudi ahole vandesu gagodam bak am bak," lahame Yesusat ab vameadaham. 25 Dam kota Yerusalem laba azihi dam totbaho labe iho Yesusat etei lab vameadaha im lam aiha ozom vabili ab ot gagoi ot gagoidamam. "Ne, ame Da nim im Yahudi busaoda labe iho nabime otelo modemda am taia? 26 Lahana akati iho aaha ame Da labe iedem vaba ahate dam bake vahokedà? Dam busaoda ba Aba mali gagom bak vaba? Làhà, 'Am abo Alat Gagu Fihasi Vimteme Olulo Modem Dat Boehàda am tame,' laham bak lam dam busaoda labe fa etei ozobohudi neàdehe labe ba mali gagom bak mohe? 27 Lahana Da lam akati, 'Alat Gagu Fihasi Vimteme Olulo Modem Dat Boehàda Am am tame,' lahadà? Ame Da nim, 'Adi baket lehela?' laham bak lam im ozobohu bak. Am gi Nazaret labe lehe bak. Lahana Alat aham di iube neha, 'Eho Gagu Fihasi Vimteme Olulo Modem Dat Boehàda uba olu tame,' lahame fet gagu esuhuda lam ba lem di, 'Adi baket lehela?' laham bak lam ba dam bakda meida vàmtea ba ozobohudem vabak," lahame ot gagoida. 28 Lahaha bak lam Yesusat aihemu Aho gi ame Fihasi Ala Bake Vou Baedam Num Vàmteabu labe am ad oli aam bak tomba laba vahokedam lahasuhu di labe dae buduana ab gagoham. "Imboo? 'Em amat mode?' laham bak lamti labi, 'Em adi baket lehela?' laham bak lamti um abo ozobohu aabodeheo? Em bak niba lehe bak nim Ebe Eho ozoho bak labet lehe vabak. Gi Eba gagu oluhu Ala labe Aba Aho ozoho bak labet modi Em bak niba lehe bak. Eba gagu oluhuda lam bisi imboda Am am bak. Gi Aba tu vuzehem neàda uho ozobohudehe vaba moho bak. 29 Lahana Emota Am ozobohu aabodehe bak. Eba gagu oluhu Ala Am am bak. Labi Aho Em gagu oluhu vab di iube Em gi amu Amti vahi aidam bak. Labihaha bak." 30 Lahame Yesusat lab gagoho bak lam dam totbaho labe aime faki, "Imo Yesus sise," lahame meeda. Lahana Yesus sim bak Alat fet ozome esuhu digat fuhu vab labe ame dam labe meida vàmtea ba Yesus bake netàdi alihi ulam kai. 31 Dam totbaho labe Aba silo àhàki modernàme dam totbaho labe fa Aba tu vuzehi nehi ot gagoi ot gagoida. "Ame Da Yesus lam Alat Gagu Fihasi Vimteme Oluhu Dat Boehàda iho vou faodam Dat am taia? 'Alat Gagu Fihasi Vimteme Oluhu Dat Boehàda labe Aho ba na damat ihimo modem biem im feàna damat fet aame ozobohudemna nehasu meeda tame,' lahame fet gagu esuhuna lam ahebu Ame Da nibe ab li meedam am taia? Ba damvat im nimohona vafozi feàda meedamna im ba aahada vabak," lahame tu vuzehi ab gagodamam. 32 Lahame lab ot gagoiaha bak lam Farisi dam totbaho labe aihemu faki fa damat Ala bake lomna ve vua vahudam toheda zi laba vuusu im vameame faheme modiam dam lamti fa vahi fa ame Num Vàmteabu laba vou aasdam dam totbaho laba ab le gagoham. "Uho Yesus le sile," lahame ab gagu oluham. 33 Labi ame di labe Yesusat dam bake gi im nehasu vameada. "Em umti niba aidam bak ba bohu kaio. Gi kehàm vaba Eba gagu oluhuda laba Eho fa la tame. 34 Labi di lam uho fa Eba vi nabitameam um ba Em alihi vi aam vabak. Labi laha Ebe Eho le azilo modem bak laba um laha tau vulam biem bak." 35 Lahahat ame Yahudi dam busaoda eeda zi labe ozom vabili ab ot gagoi ot gagoidamam. "Aa! Ame Da nim Aho adi bake le iho nabitume im Am alihi vi aam biela? Làhà Aho gi im Yahudi dam totbaho fa Yunani bak laba fi goaitoi esuhu dam laba le dam lamti fa Yunani damti vahokelo gagoho labe im ba vulam biem bake gagoheo? 36 Aho neha, 'Uho fa Eba vi nabitameam um ba Em alihi vi aam vabak,' lahaha bak lamti labi Aho neha, 'Ebe Eho le azilo modem bak lam um laha tau vulam biem bak,' lahaha bak lamti, 'Akati modemna modela?' lahame labi gagohela," lahame ab ot gagoidamam. 37 Labihadume ame Na àme Iziam di labe ba novalo modem digat abo bisi feàda labe Yesusat ame

Fihasi Ala Bake Vou Baedam Num Vàmteabu labe am ad oli aam bak tomba laba neo le duzu dae buduana ab faasi vameadamam. "Meit valo àhàkemeam làhà Eba li udele. Meit Eba tu vuzehemeam làhà gi meit Alat Vameadaha Im Toedahana laba nehasu toehe bakti ulohona mode tame. 'Ame da labe aho udehe bak labet modi am ahu ad laba meia modi fa ahe neàna bohu vuusdam vao fa vao aanati ulohona labaha bohu futodume tàda tame,' lahame toehe bak ehete," lahame Yesusat ab vameaham. 39 (Yesusat etei meia modi fa ahe neàna bohu vuusdam vao laba v`alu gagoho bak lam gi meit Aba tu vuzehemda laba Alam Aha Nutabe Neàna Aho ilabdi ame da laba ba modi vizi teudem bak laba ozome vameadam bak. Lahana Yesusat fa Am Ai bake fa le ee Abada Alat vousai Aba modi fe`a datelehe vab labe Aho Alam Aha Nutabe Neàna lam it olu dam bake nom ilu vizedaha vabak.) 40 Labi Yesusat etei lab gagoho bak lam dam dua totbaho labe aihemu fa ab ot gagoi ot gagoidamam. "Oo, ame Da nim gi Musat aham di iube neha, 'Ba diamut Alat Vameadaha Im Aime Fa Dam Bake Ahate Vameaidahada emti ulohoda olu tame,' lahame fet vameame esuhu Dat am taia?" lahame ot gagoida. 41 Labi dam dua totbaho labe nehame gagoda. "Ne, ame Da nim gi Alat Gagu Fihasi Vimtème Oluhu Dat Boehàda iho vou faodamda am taia?" lahame ot gagoida. Lahana dam dua totbaho labe vedi Yesus Galilea laba faaha tibame nehi git gagoda. "Vab`a! Ame Da ba akati labih`a? Alat Gagu Fihasi Vimtème Olulo Modem Dat Boehàda lam Galilea labe ba le? Ba labiham vabak. 42 Ne, meit Alat Vameadaha Im Toedahana laba im nehasu fet toeme esuhuna taia? 'Alat Gagu Fihasi Vimtème Olulo Modem Dat Boehàda lam gi im tai ahobada Boehàda Daud vou faat lehe mekehàda modem bak. Abo Daud aham di iube faaha kota Betlehem laba vi faa tame,' lahame toehe bak. Labiha labe ba akati labih`a? Ame Da nim iho vou faodam D`at modem vabak," lahame ot gagoida. 43 Labihadam labe, "Yesus ana d`at modela?" lahame damat ab faheme la ozoi le ozoidamam. 44 Labi ame di lam Aba silo àh`aki meedam dam bak laba ehete. Lahana ame dam labe meida v`amtea ba Yesus bake net`adi alihi ulam kai. 45 Amu Farisi dam lamti labi damat Ala bake lomna ve vua vahudam tohedà zi laba vuusu im vameame faheme modiam dam lamti vazisi fa ame Fihasi Ala Bake Vou Baedam Num Vàmteabu laba vou aasdam dam laba neha, "Yesus le sile," lahame gagu olu ame dam labe le vabeddaha Yesus sim vabili saemea fa ab leham. Labi fa li modeha ame dam eeda zi totbaho labe ab gut meoleham. "Um akati Da lam si fa niba vou lehe vaba modela?" 46 Lahahat ame Num Vàmteabu laba vou aasdam dam labe fa gago, "Ne, im Da labet Aho etei vou li vameadam im lam im amu aihi vabak. Abo im dedat ozobohudi vameadam imot modem bak." 47 Lahahat ame Farisi dam labe tozome gago, "Ea, um laha fa Da labe lab vagehe bak laba tau vuzehe dam ame? 48 Ne, uho ozom, im Farisi dam modeo, dam eeda zi totbaho modeo, im meida v`amtea Da laba tu vuzehehe datva ehe? Vab`a! Im labihadamda vabak. Akati uho labi modelo mode? 49 Gi dam ee vabda zi nim abo dat ahamda Musat aho aham di iube toedume fi hasi esuhu Im Fe`ana zi lam biem damat ihimo Ame Da laba tu vuzehe bak. Dam lam gi Alat aham di iube, 'Beome v`ah`adese,' lahame amu gi uloome esuhu dam am bak." 50 Lahame labi gagu modeha Farisida meida abo amu Yesus bake le t`ahi im vameadamda Nikodemus labe neo am Farisi dam totbaho laba ab gagoham. 51 "Um nasi ozomale. Dat ahamda Musat aho toedume fi hasi esuhu Im Fe`ana zi lam abo ihimo Yahudi damat tuhu im lam gi neha taia? Amu nasi, 'Da lam git modehe bak akete?' lahame uloodume, 'Ame da labe aho veibad`ao? Veibadam vabao?' laham bak aime ne`adi ba, 'Beose,' lahame na asimbuna fe`a gagu beom bak. Ba aihi vabna ostame na asimbuna fe`a gagu beom vabiem bak." 52 Lahame labi gagoha ame ee dam totbaho labe faki fa Nikodemus bake gago, "Oo làh`a! Om laha Galilea labet lehe? Om nasi Alat Vameadaha Im Toedahana zi laba mahate nabidume aale. Ba nehi toehe bak vabak. 'Alat vameadaha im aime fa dam bake ahate

vameaidamda lam ba Galilea bak labe Israel bake olu tame,' lahame fet toeme esuhu im ba na vabak." [ 53 Lahame vameadume neàdi dam lam fi goaitoi im num bake ahala ab laiame seteham.]

8:1 Labihàmu Yesus fa Zaitun Dee Dozeadaha Bak Buzoho laba ab laiteham. 2 Labi izi dihasi dihambe Yesus ame Fihasi Ala Bake Vou Baedam Num Vàmteabu labe am ad oli aam bak tomba laba neo fa ab laham. Labi laba lafusi modeha dam dua bak Aba valadàm Aho im vahokelo ab nusu faasi vahokedamam. 3 Labi vahokedume modeha dat ahamda Musat toedume fi hasi esuhu Im Feàna zi lam ozobohudi fa dam bake vahokedam guru zi lamti Farisi dam totbaho lamti laham dam lam vazisi iho nam dat ehena fa dat amomoi aa modehe bak aahemu si vou li netàdi ub odosi damat avaesdam tomba laba ab vou duzuham. 4 Ame dam labe ozo, "Dat ahamda Musat aho toedume fi hasi esuhu Im Feàna zi lam, 'Yesusat fa ame baket meedào? Meedam vabao?' laham bak aihizobe fa Yesus bake vâluse," lahame ame nam lam ahit ab vou li vou duzuham. Vou duzu neàdi Yesus bake ab gagoham. "Guru oa, nam nim dat ehena fa dat amomoi aa vaha bake iho si vou leho. Iho ozoha, Musat aho aham di iube toedume fi hasi esuhu Im Feàna zi lam im nehazu toehe bak ehete. 'Nam dat ehena fa dat amomoi ve modemeam làhà ket beodume elole,' lahame toeme esuhu bak ehe bak. Lahana Oho ozom, akatihàla? Gi ame bak lam modeo? Feidào?" Lahahat Yesusat dae buhu vaba gi fota nusu am anekèhàsoat bak laba ab toedamam. 7 Labi ame dam labe gi Yesus bake vi ooteom labe neo ab vi gagoham. "Oho ozom, akatiha?" lahame meit vi gago. Meit vi gago. Lahada. Labihadàm Yesusat fa usai duzu ab gagoham. "Làhà um etei faina modehe vabda ehelemeam làhà ame da labe nasi ke visoi nam laba beole," lahame gagu neàdi fa neo fota nusu anekèhàsoat bak laba neo nom toeda. 9 Làhàmume ame Yahudi dam busaoda eeda zi labe Yesusat etei lab gagoho bak lam aihemu dam aoleheda nasi ladi aa ahala laida. Labi neo dam gàhàda laha ladi aa ahala laida. Labihadume ame dam lam ahebu le seddume gi Yesusti dam dua bak labe iho avaesdam tombu laba duzuhu nam lamti ihimo veke. 10 Làhàmume fa usai duzu nam laba ab gagoham. "Dam oba, 'Beose,' lahame na asimbona feà oba modelo gagoho dam zi lam ake ladahela? Oba vâlumda niba vekesi doudam vabao?" 11 Lahahat nam labe fa gago, "Dat Busao, ba na kaio." Lahahat Yesusat fa gago, "Làhà Em laha obo oho modehe im laba ozome, 'Beose,' lahame na asimbona feà oba modelo gagom bak kaio. Nasi lale. Obo oho faina meedam bak lam ba a vi meedamule," lahame im vi vahokeme ab oluham.] 12 Labi Yesusat neo im nehazu ame Yahudi dam dua bak laba vi vahokeda. "Dam bakda ahebu im ahu ad laba modi Fauhaedamda Em am bak. Meit Eba tu vuzehi im Ebeda meedameam làhà ba aibu bak laba gohatem vabak. Gi Eho modi fauhaedam bak labet modi ame da labe fa Alati vahi gi ahe neàna bohu vuusdam bak." 13 Lahaha bak lam ame Farisi damat aime mu otesidam labe ab gagoham. "Om git gagoda. Oho etei, 'Dam bakda ahebu im ahu ad laba modi Fauhaedamda Em am bak,' lahame lab gagoho bak lam gi Obo Ohomo ozoho im gagodam labe im ba vuzehem biem bak. Ame bak lam Oba vi tau gagomda akete?" 14 Lahahat Yesusat fa gago, "Vabà! Eho etei lab gagoho bak lam dam amomoit laha vi tau gagom vabameam làhà Eho lab gagoho bak lam ba giomimot modem vabak. Abo imbo bak. Neham labe labihaha bak. 'Em adi baket lehela?' laham bak lamti labi, 'Em ake fa làla?' laham bak lamti Ehemona naedat ozobohudi gagoho bak. Lahana um biem bak. 15 Ebe Eho meedam im lam uho ozome ozobohudi neàdi gagodam bak lam um gi uho bak damat ubu uho ozoho baket ozomsu gagodam bak. Lahana Ehemona ba meia ozome ozobohudi neàdi gagom di ba umti uloholi meia ozomsu gagodam vabak. 16 Lahana Eho meia ozome ozobohudi neàdi gagomeam làhà Ebe Eho ozome ozobohudi neàdi gagodam bak lam gi ahole imbona vamdesu gagodam bak. Neham labe labihadam bak. Ehemona meia ozome ozobohudi neàdi gagodam vabak. Em gagu oluhuda Em Aiti ahili ame baket meedam bak. 17 Lahana Eho gi im lamota ozome uba gagodam vabak. Ubu uho dat ahamda Musat aho

toedume fi hasi esuhu Im Feàna zi laba tu meedam im lam im nehasu toehe bak ehe taia? Neha: 'Meit veibam di na aahada behàsu lam ehe labe ame da laba tau ulohodesu gagomeam làhà ame da labe aho lab gagoho bak lam imbo bak. Meit aba aho gagoho bak laba tu vuzehem neàte,' lahame toehe bak ehe taia? 18 Làhà Eba vi tau gagomda laha behàsu bak. Ehemmo naedat it ozome gagomda ame. Labi Eba gagu oluhuda Em Ai labe vi tau gagomda ame. Em Em Aiti ahili uloholi gagodam labe uho tu vuzehem neà bak." 19 Lahahat ame Farisi dam labe Yesus bake neo vi ailo gago, "Oho etei lab gagoho bak lam Om Ai akete?" Lahahat Yesusat fa gago, " 'Em ana dât modela?' laham bak lamti labi Em Ai, 'Amat modela?' laham bak lamti um biem bak. Uho, 'Em ana dât modela?' laham bak lam um ozobohudemeam làhà um Em Ai, 'Amat mode?' laham bak lamti laha vi ozobohudem bak." 20 Lahame Yesusat etei lab vameadaha im lam aho gi ame Fihasi Ala Bake Vou Baedam Num Vàmteabu labe am ad oli aam bak tomba laba abo Ala bake lodam doi vahedamnabu zi modealadaha bak laba netàdi vahokedam diat vameadaha imot modem bak. Lahana damat Yesus sim bak lam Alat fet ozome esuhu digat fuhu vab labe ba dam meida vàmtea Yesus bake netàdi sim kai. 21 Yesusat neo ame Yahudi dam busaoda eeda zi laba neo vi vameada. "Kehàm vaba Em fa le sete tame. Em le setehemu uho gi neo, 'Alat Gaguh Fihasi Vimtème Oluhu Dat Boehàda lam akete?' lahame uho gi dat amomoi bake nabidam lahasumeam ba ame da vi aaha vab labe uho faina meedam bak lam Alat fa ozahigeàmù fa vei neàdem vaba um elodume Ebe Eho le azilo modem bak laba um tau vulam biem bak." 22 Lahame labi gagu modeha ame Yahudi dam busaoda eeda zi labe Yesusat lab gagoho bak laba tozolo ihimo aa ot gagoi ot gagoida. "Oo, Da lam etei neha, 'Ebe Eho le azilo modem bak laba um tau vulam biem bak,' lahame lab gagoho im uho ozom, akatihasu ozome labi gagohela? Làhà Ahamo Aba it otem labe Aho elom di gi ààmò ziet lalo modem labe iho ame bak laba ba vulam biem bake gagohe?" 23 Lahana Yesusat gi ozahigeàmù neo vi vameada. "Um gi bak damat modem bak. Labiha labe uho na im ozom di gi bak damat ibi iho modi balehà bak ozodam damat modem bak. Lahana Em asum ahoba iubet lehe bak. Labiha labe Ebe Eho ozoho bak amomoi bak. Lahana uho ozom, Em umti uloholi bak dât mode tiba. Lahana ba labihaha vabak. 24 Labiha labe Eho amu uba gagoho bak am bak. Um gi faina meedam bak Alat fa ozahigeàmù fa vei neàdem vabna um eloda tame. Eho neha, 'Em ame Da am tame,' lahame lab gagoho bak lam uho tu vuzehem vabameam imbote. Um gi uho bak niba faina meedam bak lam Alat fa ozahigeàmù fa vei neàdem vabna um eloda tame." 25 Lahame Aho neo labi gagu modeha ame Yahudi busaoda eeda zi labe Yesus bake fa vi ailo ab gagoham. "Làhà Om abo amat modela?" Lahahat Yesusat fa gago, "Baka akati Eho fa uba neo vi vameà? Ebe Eho amu uba lab gagodam bak lam lahasuhu bak. Em ame Da am bak. Ba Ebe Eho gagodam bak ba veimdem vabak. 26 Eho uba neha, 'Um faina modeho,' lahame uba ozome vâlù vi gagodam bak feà bak ehe bak. Lahana ba Ehemmo gagodam vabak. Eba gagu oluhuda lam Am abo imbona meedamda modem labe Eho gi Aba Aho Eba gagohona lam Eho aihina lam fa dam bakda ahebu vameadam bak." 27 Yesusat etei lab vameadaha im lam gi Am Ai Alat meedaha im ozome vameadaha bak. Lahana damat ba ozobohudem vabile. 28 Ozobohudem biehemu Yesusat neo ab vi gagoham. "Etei nim, 'Em ana Dât modela?' laham bak lam um bie. Lahana ba Asum Ahoba Iubet Bak Niba Li Dateleheda nim damat Em ve vousai tom modesum di lam, 'Em ame Da am tame,' laham bak Eho amu uba gagohona lam, 'Imbote,' laham bak lam um ba ozobohude tame. Labi laha ame di lam, 'Eho na im meedam di Ebe Eho ozoho baket meedam vabak. Gi Em Aiat Aba Aho Eba vahohehe baket fa dam bake vameadam bak,' laham bak lam um laha ba neo vi ozobohude tame. 29 Labi Eba Gaguh Oluhuda lam gi Emti bakamta aidam tadem bak. Am ba Em vou esmozi Ehemmo aidam vabak. Eho gi Aho deelem bak laba ozome meedam tadehemu labihaha bak." 30 Lahame Yesusat lab vameadam di lam dam zoho dua bak aidume fa Yesus bake, "Am abo Alat Gaguh Fihasi Vimtème Oluhu Dat Boehàda am tame," lahame

ab tu vuzehem. 31 Labihadume neo Yesusat fa Yahudi dam Aba tu vuzehem dam laba nehi vameada. "Ebe Eho uba lab vahokedaha im lam uho tu vuzehi meedam bohu vuusdamem làhà imbot. Um abo Ebe Eho vahokedam im ozobohudelo bisi vi tau meedam dam um am bak. 32 Labiham labe, 'Ala akatihu meedam Alat mode?' laham im imbona lam Eho uba vameadume um ozobohudehe bak labet modi na im uba neha, 'Nehasu modele. Nehasu modele,' lahame ootedam im lam uba vabidam bak lam fa ab modi setemam bak." 33 Lahahat ame Yahudi dam busaoda eeda zi labe faki fa gago, "Oo làhà! Om git gagoho taia? Na im iba ootedume modi asimblem im vabna baka akati Oho neha, 'Na im iba ootedume vabidam bak lam modi fa sete tame,' lahame iba labi gagohela? Ne, im Abrahamat vou faat lehe mekehà dam im am bak. Labiham labe meit iba ootedume modi asimblemna vabak." 34 Lahahat Yesusat fa gago, "Lo, Abrahamat vou faat lehe mekehà dam um am bak. Im lada lam imbomu im imboda nidi nim laha nasi iademe aima. Meit faina meedam bak bohu vuusdam labe ame bak lam ame da laba vizehe labe ba modi veiom biem bak. Gi labaha bohu modesdam bak. Abo mei na teo meedamda labe aba im gagu ootedamda labe am na teo meedam bak lamti ulohote. 35 Ame mei na teo meedamda lam aba im gagu ootedamda labe am damali labaha bohu vuusdam vabak. Gi teohe am damali meedam bak. Lahana, 'Adat,' lahamda lam am amedamali labaha bohu vuusdamda am bak. 36 Labihàmu Em Alam Adat modem labe faina meedamna lam uba veimai uho voo vabilehe bak lam Eho modi setemam làhà abobo seti um Alam damali gi labaha bohu vuusdam bak. 37 Um Abrahamat vou faat lehe mekehà dam Em ozobohu bak. Lahamnàme Abrahamat Ala bake tu vuzehem bak lamti uloho vabna Eho vahokedam im lam um ahu ad labe tu vuzehi meedam vab labe uho Eba otelo àhàki vabeddam damat modem bak. 38 Em Aiti ahili azihi di labe Aho Eba modi Em ozobohudi fi gatehe im lam Eho fa uba vameadam im am bak. Lahana um gi um aiat uba vahohehe im lamota meedam damat modem bak." 39 Lahahat ame Yahudi dam busaoda eeda zi labe fa ab vi gagoham. "Ne lahana im tai ahobada Abraham labe aho iba vahokedahana lam iho aime meedamna am bak." Lahahat Yesusat fa gago, "Vabà! Um, 'Abrahamat vou faat lehe mekehà dam im am bak,' lahaha bak lam imbodemem làhà um gi Abrahamat aba aho im vandesu meedam bak lamti ulohona vi meedam lahasdam bak. 40 Lahana uho ba labihaha vabak. Em gi Em Aiat Aho Eba im imbona gagohona lam Eho ot vai uba vahohehe uho vedi Em otelo vabeddam damat modem bak. Lahana Abrahamat Em Aiam im imbona meit vameahana aih di ba moho vabak. Abo tu vuzehi meedaha bak. 41 Lo, Eho ahole gagoho bak. Um gi um ai aabo aho meedaha bak labet vi meedam damat modem bak." Lahahat ame dam labe fa neha, "Im gi Abrahamam nam labe vou faat lehe bak. Ba meit vou faat lehe vabak. Im Ai aabo gi vàmtea Ala am bak." 42 Lahahat Yesusat fa gago, "Um Ai aabot Alat modemem làhà um gi Eba deelem bak. Nehaha bak. Alat Eba gagu oluhu labe Em niba lehe bak. Em ba Ehem ozome niba lehe vabak. Gi Alat Ahamo ozome Eba gagu oluhu bak. 43 Eho lab vahokedaha im lam uho aimta ai. Lahana uho modehe vaba moudaha labe im Ebeda, 'Akati modemna modela?' laham bak lam um aime ozobohudem bi meedam bak. 44 Um gi um ai Iblis labe am damali aba aho ozoho bak laba modelo àhàki meedam damat meedam bak. Iblis lam gi Alat ahamte alimeat bakti na ahebu modi esuhu di labe faasi dam bakdate modi faidehe labe elodam bak lam modi vizeheda Iblis am bak. Labi laha aba aho meedam bak lam ba im imbo bak vab labe ba im imbona vameadam vabak. Gi vagedam tadem dât modem bak. Labi aho meia im giomim vagedam bak lam ba it àvodem vab dât modem bak. Aba aho amu di iube faasi modi balehà bak am bak. Labi laha damat im abada vuzehi meedameam làhà gi im aiti uloholi neo meia vagedam damat modem bak. 45 Labihàmu Eho im imbona uba vameadam di lam um am damat modem labe gi aba aho modeme balehà bak vi vouhodam labe Emti Ebe Eho vameadam imti uho tu vuzehem mu meedam damat modem bak. 46 Um meida vàmtea labe ba Eba neha, 'Eho faina modehe bak



neam tame,' laham bak vimteme v`alu gagom bak vab taia? L`ah`a Eho im imbona uba vameadam labe akati modi uho Emti Ebe Eho vameadam imti tu vuzehem vaba modela? 47 Meit Alam damaleheda lam im Abada deelehat aime tu vuzehi meedam meot. Lahana um Alam damalehe vab labe um ba im Ebeda aim moho bak." 48 Lahame labi vameadaha ame Yahudi dam busaoda labe Yesus bake fe`at`alo ab gagoham. "Ibi iho amu ozoho bak lam gi ahole ozoho bak. Om gi Samariada git modem d`at modem bak. Mei ahu oli veimam setan Oba veimai vuusdam d`at modem bak." 49 Lahahat Yesusat fa neo gago, "Vab`a! Mei ahu oli veimam setan ba Eba veimai vuusdam vabak. Em gi Em Ai Ala bake ahu adat iedi vou baedam bak. Lahana um ba Eba ahu adat iedi vou baedam vabak. Uho vedi Eba fe`at`adam bak. 50 'Damat Eba vou baedase,' laham Em ba labihasu ozome na im meedam vabak. Lahana Em Aiat ahamo, 'Damat Em Adat labe Am ee vousai, "Fe`ate," laham ahu adat iedi vou baedase,' laham Aba Aho ozome meedam bak lamti gagom kaio. Labi, 'Eho im ahole meed`ao? Ahole meedam vabao?' laham vi ozome ozobohudi ne`adi gagomda Am am bak. 51 Im lada lam imbomu im imboda nidi nim laha nasi iademe aima. Meit Ebe Eho vameadam im lam aime tu vuzehi meedameam l`ah`a ame da lam Alati gi ahe ne`ana bohu vuusda tame." 52 Lahame labi gagoha ame Yahudi dam busaoda labe fa ab gagoham. "Ea, iho amu gagoho bak ab imbodeham bak. Mei ahu oli veimam setan Oba veimai vuusdam labe Om ahusobuli vameadam bak. Ne, Abraham gi amu di iube eloho bak. Labi Alat vameadaha im aime fa dam bake ahate vameaidaha dam totbaho lamti laha gi amu di iube elodaha bak. Lahana akati Oho neha, 'Meit Ebe Eho vameadaha im nim aime tu vuzehi meedameam l`ah`a ame da lam ba elom vaba gi ahe ne`ana bohu vuusda tame,' laham Oho labi gagohela? 53 L`ah`a im tai ahobada Abraham lam gi amu di iube eloi seteheda lam fe`a vab d`at mode? Labi Alat vameadaha im aime fa dam bake ahate vameaidaha dam totbaho lam gi amu di iube elodume seddaha dam lamti laha fe`a vab damat mode? Labi Om bisi fe`ada ame? Oho ozom, Om ana d`at modela?" 54 Lahahat Yesusat fa gago, "Uho vedi Eho gi ee Ebeda vou daetbada tiba. Lahana Em ba labihadam vabak. Ebe Eho etei lab gagoho bak lam uba vouhodase. Neha: Ee Ebeda Ehemmo vousai it daetbadameam l`ah`a gi teo modeme vanamai voom bak. Labih`amu Em ba labiham vabak. Em gi Em Ai uho neha, 'Im ahu adat iedi vou baedam Ala am bak,' laham Ala labet Em ee vousai, 'Em abo fe`ate,' laham Eba vou baedam bak. 55 Lahana Em Ai um biem bak. Lahamn`ame Emota ozobohu bak. Lahana Eho nehameam, 'Em Ala biem bak,' laham labi gagomeam l`ah`a Em gi ubu uho neha, 'Im Ala ozobohu bak,' laham lab vagehe bak lamti ulohona gagodam bak. Lahana Em abo Ala ozobohudi im Abada aime vuzehi meedam bak. 56 'Eho bak niba lem digat aa tame,' lahaha bak lam um tai ahobada Abrahamat amu di iube nasi tu ozome esuhu bak lam am gi deelehat vou faodam bak. Labi vou faodume modeha Eho ba lehe bak nim aho ab aame deeli v`ah`adeham bak." 57 Lahame labi gagu modeha ame Yahudi dam busaoda labe Yesus bake neo tozodam labe ab gagodamam. "Oo l`ah`a! Om lima puluh tahun fuhu vab D`at ba akati Om Abrahamam alihi aahela? Hohoa. Om gi giomim vameadam d`at moz." 58 Lahahat Yesusat gago, "Imbote. Eho lab gagoho bak lam ba giomim gagom kaio. Lahana Eho etei uba gagolo modem im imboda nidi nim laha iademe ozomale. Abraham faaha vab di Em ehe bak." 59 Lahahat Aho, "Am gi Alati ulohote," laham Aho etei lab gagoho bak lam ame Yahudi dam busaoda eeda zi labe faki fe`a bak fusi, "Yesus otese," laham ke visomoame, "Beose," laham viisiha Yesus gi ab itame seteham. Abo gi dam so neumat labe vatoheme ame Fihasi Ala Bake Vou Baedam Num V`amteabu labe am ad oli aam bak tomba lam vou esmozi ab itame seteham.

9:1 Labi ba digat meida labe Yesus Aba vi tau meedam damti iho godam labe dat na aam biemda ab aaham. Gi am oiat faaha di labet fako na aam biemna faaha dat ab aaham. 2 Lahamda aahemu Aba vi tau meedam dam labe ab gagoham. "Ai Guru oa, dat etei faaha di labet fako na am biemda

lam akati modi labihahela? Aho faina modem bak labet labihahe? Gi am aiti oiti faina modem bak labet labihahe? Akatihahela?" 3 Lahahat Yesusat fa gago, "Vabà! Ba ame da nibe faina modehe labe labihaha vabak. Labi laha am aiti oiti laha faina modehe labe labihaha vabak. Ala bisi im feàna meedam Alat modem labe Aho ame da niba modi fa neàdem bak lam, 'Damat fà aame ozobohudese,' lahame ame baket modehe bak. 4 Um nasi ozomale. Aibu bak ab fuseo vabaleham bak. Aibu bak fumeam ba iho na meedam biem bak. Labihàmumu di fauha nèa lahasdam di nim Eba gagu oluhu Ala labe Aho Eba gagoho im lam iho meedam nèa di am bak. 5 Em bak niba ehe lahasuhu di dam bakda labe im ahu ad laba modi Fauhaedamda Em am bak." 6 Lahame labi gagu nèadi Yesusat Am keha bak laba ab nom doham. Labi vi uhulame bak vaobedi nèadi Am anekèhàt visoi dat na aam biemda labe am fakode laba ab noiham. 7 Noime gago, "Om nasi le Vao Nobu Siloam laba le dauha kikele." ("Siloam," lahaha bak lam Ibrani dae ozom di gi, "Gagu olum bak," laham bak.) Lahame labi gagohemu dam aheda labe ame da lam ve Vao Nobu Siloam laba vou le naedat am dauha it kikeme modeha ab nèdeham. Gi na aam bak nèadi am num bake fa ab laham. 8 Labi modeha am num obe esuhu dam lamti labi am ozobohu dam totbaho lamti dam labihasu amu ame da labe aho nusu iba na tauledam bak ozobohu dam labe iho gut aaha àvodi ot gagoida. "Uho ozom, da lam ana dèt mode? Ne, da lam gi fako na aam bili niba nusu iba na tauledamda am taia?" 9 Lahahat dam totbaho labe vedi neha, "Vabo, ame da labe modem kaio. Gi am alihiti ulohonali modem bak." Lahahat ame da labe ahamo vi aime fa ab gagoham. "Lo, em ame da am bak." 10 Lahahat dam labe fa neha, "Làhà om fako akati modi fa nèdehela?" 11 Lahahat ame da labe fa neha, "Dat ee gagom Yesus lahamda labe Aho bak vaobena modi Am anekèhàt visoi em fakode niba noime gago, 'Om nasi le Vao Nobu Siloam laba le dauha kikele,' lahame eba labi gagohemu eho ame bak laba le dauha kikeme modeha em fako na aam bak ab nèdeham bak." 12 Lahahat ame dam labe fa neha, "Oba modi fa nèdeheda akete?" Lahahat ame da labe fa neha, "Em bie. Le seteho." 13 Yesusat Am kehati bakti valiheme bak vaobena visoi dat fako na aam biemda labe am fakode laba noime modi fa nèdehe bak lam gi hari Sabat modehemu ame dam labe dat fako faidehena fa na aam nèdeheda ve Farisi dam bake ab vou laham. 15 Vou le modeha ame Farisi dam labe iho neo vi ailo ame da laba ab gut vameadamam. "Om fako faidehe bak akati modi om etei fa na aam nèdehela?" Lahame labi gut gagoha ame da labe fa gago, "Ame Da labe bak vaobena modi Am anekèhàt visoi em fakode niba noihemu eho em dauha le valo kikeme modeha em etei fa na aam bak ab nèdeham bak." 16 Lahame etei labi gagoha ame Farisi dam totbaho labe aime ab gagoham. "Ame Da Yesus lam ba Alat gagu oluhu vab Dèt modem bak. Im Yahudi damat hari Sabat na modem fi ham digat lam Aho ozahigeàmumu fa na meedam bak." Lahana ame Farisi dam totbaho labe vedi neha, "Mm, ne da nim faina modemeam làhà na damat ihimo modem biem im feàna damat fet aame ozobohudemna nim ba amat Aba vizi Aho teudi im lamohoda meedàla?" lahame labi gagoha ame Farisi dam labe ihimo ab otesi otesidamam. 17 Labi ihimo otesi otesidaha vabamu fa neo ame dat fako faidehena fa na aam nèdeheda laba neo ab gagoham. "Ne, om akatiha? Fako faidehena fa na aam nèdeheda om am taia? Om ame Da laba gagom im ehe?" Lahahat ame da labe fa gago, "Eho ozoha, Am abo Alat vameadaha im aime fa dam bake ahate vameaidahada Am am bak." 18 Lahame labi gagu modeha ame Yahudi dam busaoda eeda zi labe ihimo ot gagoida. "Iho ozoha, ame da lam amu fako na aam bili meedam bak lam meit aba modi fa nèdehe bak lam gi giomim. Gi am oiat fako aam nèana faaha bak lahasdam bak," lahame labi ozohemu da labe aho vameadaha im laba ba tuhu vabak. Làhàmumu dam gagome ame dat fako faidehena modi fa nèdeheda labe am aiti oiti, "Ve vou lele," lahame ab gagu oluham. 19 Le ve fa vou li ab gut gagoham. "Ne, da nim uho neha, 'Uho etei faaha di labe fako na aam biemna faaho,' lahamda nim um adat mode? Làhà akati modi etei fa na aam nèdehela?" 20 Lahahat am aiti oiti fa

gago, "Lo, im adat am bak. Labi laha iho am faaha di gi fako na aam biemna faaha bak. 21 Lahana, 'Am akati etei fa na aam neàde? Amat fa aba modi neàde?' laham bak lam im bie. Uho gi da laba gagu aima. Da lam gi busaolehena ahamo fa uba gagometa." 22 Ame da lam am namti nehame iedi labi gagoho bak. Amu ame Yahudi dam busaoda eeda zi labe im nehazu gagu vàmadi esuhu bak ehete. "Meit neha, 'Ame Da Yesus lam Alat Gagu Fihasi Vimtème Oluhu Dat Boehàda am tame,' lahame labi gagomeam làhà ame da lam ba im Yahudi damat ihimo fi hasi bakamta vahi Alat vameadaha im ahamda dogoit aidam bakti im meiti meedam num laba ba tau vahem vabak," lahame gagu vàmadi esuhu labe ame etei iba gut uloodam dam laba ab gagoham. "Da lam gi busaolehena ahamo fa uba gagometa," lahame labi gagoho im lam ab gagoham. 24 Lahame labi gagu neàdi ame Yahudi dam busaoda zi labe fa dat fako faidehena modi fa neàdeheda laba neo gagome lehe bak ab behàsdeham. Li duzu neàdi ab gut gagoham. "Alat oba nom aasdalo. Oho nasi ohu vame, 'Yesus akatihu meedam dèt modela?' laham bak imbo bak gagole. Iho ozoha, ame Da Yesus lam gi faina meedam dèt modem bak." 25 Lahahat ame da labe fa gago, "Ne, ame Da labe, 'Debu faina modem Dèt modeo, faina modem vab Dèt modeo,' laham bak lam em biem bak. Em gi im nimota ozobohu bak. Em amu fako na aam biemna ame Da labet fa eba modi em etei fa na aam neàdehe bak." 26 Lahahat ame dam labe fa neo gago, "Ame Da labe oba ana mode? Oba akati modi om fa na aam neàdehela?" 27 Lahahat ame da labe fa gago, "Ne, eho amu uba gagohona taia? Um aim vaba? Um ana modi fa bak lam neo bisi vi ailo gagodàla? Làhà uho laha ame Da labe Aba Aho vahokedam im ozobohudelo vi tau meedam damalelo mode?" 28 Lahahat ame dam labe dae meot feàtème vameada. "Vabo. Im ame Da laba vi tau meedam damat modem vabak. Ame Da laba bisi vi tau meedamda om am bak. Im gi im tai ahamda Musa bake vi tau im abada meedam damat modem bak. 29 Alat aham di iube im abada Musa bake tàhi vameame fi gatei aho fa ot vai im dedateli iba fa vou vamea usehe bak lam im ozobohu bak. Lahana Ame Da Yesus nim, 'Amat Aba modi im dedateli lehela?' laham bak lam im biem bak." 30 Lahahat ame da labe fa ame dam busaoda laba im vahokeda. "Ne, ame Da Yesus labe Aho em fako faidehena Aho modi fa neàdehenàme akati modi uho neha, 'Amat Aba modi im dedateli lehela,' lahame labi gagodàla? Aiee! Em uho etei labi gagodam bak lam em aihà avodeha. 31 Bak nim im ahebu ozobohuna taia? Dam faina meedam dam labe iho Ala bake, 'Iba taule,' lahame gagom di Ala ba ame dam laba taum vabak. Gi dam Aba deeli vou baedam dam abo Aba Aho ozoho baket uledi meedam dam lamota ibi iho gagom im aime taum meo bak. Bak lam im ahebu ozobohuna taia? 32 Labi laha dat etei faaha di labe fako na aam biemda modi fa neàdehe bak lam im amu aaha vabak. Abo Alat ahamte alimeat na ahebu meedaha di labe faasi etei vou fuhu di nim im ame bak lam aaha vabak. Gi etei alimeat ab aaham bak. 33 Ame Da Yesus lam Alat gagu im dedatelem vabameam ba im feàna nimohona ba modem vabak." 34 Lahahat ame dam labe fa gago, "Vabo. Om oiat om faaha di labe faasi om gi faina meedume etei vou fuhu bak. Baka akati modi oho iba im vahokedà?" lahame ame da laba dae meona bebet fa im num mali ab gagu futoi itaham. 35 Labi ba neo Yesusat aihà Farisi dam labe dat fako faidehena Aho modi fa neàdeheda lam im Yahudi damat ihimo fi hasi bakamta vahi Alat vameadaha im ahamda dogoit aidam bakti im meiti meedam num lam mali bebet futoi itaha bak aihemu le nabidume ab vi aaham. Vi aahemu gago, "Dat Asum Ahoba Iubet Bak Niba Li Dateleheda abo Alat Gagu Fihasi Vimtème Oluhu Dat Boehàda laba om tu vuzehi meedào?" 36 Lahahat ame da labe fa gago, "Dat Busao, ame Da lam akete? Oho etei eba fa gagole. Labi em ame Da laba eho tu vuzehese." 37 Lahahat Yesusat fa gago, "Ne, Em ame Da oho ab aaham bak. Oba etei im ab vameadamam bak." 38 Lahahat ame da labe fa gago, "Ai Boehàda, em etei Oba ab tu vuzehem bak," lahame ahit ogomasu biti ab vou baedamam. 39 Labi Yesusat neo vi vameada, "Eho bak niba lehe bake gi neham bak ozome lehe bak. Dam bakda labe iho na im meedaha bak laba ozome Eho

dam totbaho laba, 'Git modeho,' labi dam totbaho laba, 'Im vamdesu meedaho,' laham bak laba ozome ozobohudi neàdi gagodalo bak niba lehe bak. Em gi damat neha, 'Im fako na aam bieho,' laham dam lam Eho modi fa na aam neàdeda. Labi laha damat neha, 'Fako ibida na aam neà bak,' lahame ahobat gagodam dam laba Eho modi fako ibida fa na aam bieda. Eho gi labihasu modelo bak niba lehe bak." 40 Yesusat etei lab gagoho bak lam Farisi dam laba tau doudam dam totbaho labe ame bak aihemu fa Yesus bake ab gagoham. "Làhà, im laha fako na aam biem dam im ame?" 41 Lahahat Yesusat fa gago, "Uho neha, 'Bisi im vamdesu meedam bak akete?' laham bak um biem bak lam imbodemeam làhà ba Alat uba neha, 'Um git modeho,' lahame ba vâlù gagom vabak. Lahana uho etei neha, 'Fako ibida neàte,' lahamnàme Fauhaedamda imboda nim uho moudaha bak. Labiha labe Alat ubu uho faina meedam bak lam ba ozahigeàmu um fa vei neàdedam vabak," lahame ab gagu esuham.

10: 1 Yesusat neo susume vi vameada. "Eho etei neha, 'Alat ubu uho faina meedam bak lam Aho ozahigeàmu fa vei neàdedam vabak,' lahame Eho lab gagoho bak lam abo imbote. Labi Eho etei neo uba vouhome vameadalo modem im imboda nidi nim laha iademe aima. Dat domba ut tàmè ousdam bak laba olem di doo labet iademe olem vaba fa bàhàgo tot iube zidazi olemda lam mei na aa vanda am bak. Mei na tet si vietoi voutamda am bak. 2 Lahana doo labet iademe olemda lam am domba vou aasdamda naeda am am bak. 3 Labi ame domba ut tàmè ousdam bak laba ame doo laba vou aasdamda labe gut aameam domba deda lehemu doo fi stoi olem bak. Labi domba deda labe oli am domba zi ee gagodam labe domba labe im aiam dae aime ledahemu am aiat ab vou futodamam bak. 4 Labi vou futodume neàdi domba deda nasi duzu ladam labe domba zi labe im aiam dae aime ozobohu labe am ohuse ba vi dozeadume vuladam bak. 5 Ba dat giida labe am ohuse vi dozeadume vuladam biem bak. Dat giida iba vou aasdam vab dât modemu iba butemeam ba ame domba zi labe ame da labe am dae aim vabak. Gi ilime seddam bak. Ame da labe am dae im aime ozobohudehe vab labe gi ilime seddam bak," lahame Yesusat ab vameaham. 6 Yesusat gi, "Amti fa meia vagedam dam lamti uloho kaio," laham bak vahokelo Aho ahi gi domba ut tàmè ousdam bak laba vâlù im totobe labihasu fi koadume modeha ame Farisi dam labe, "Akatihasu modemna gagoela?" laham bak lam ba vi ozome ozobohudehe vabak. 7 Làhàmu Yesusat fa neo vi vameada. "Eho amu dombat aime modem bak vameadaha bak lam imbota imbot. Lahana Eho etei uba gagolo modem im imboda nidi nim laha nasi aima. Ame domba ut tàmè ousdam bak laba modesuhu Doo abo dombat oli futoiam Doo lam Em am bak. Abo olem bak gagu oluiamda naeda Em am bak. 8 Meit ame domba ut tàmè ousdam bak laba modesuhu doo labet iademe olem bakti ulohona Eba tu vuzehi meedamda lam Alat soat vausu fa vei neàdemda am tame. Labi ame dombadedda labe am domba ame ut tàmè laba vou oli fa vou futoi sibe baa vou le sibe àdam bakti ulohona Eho ame dam laba vou aasdume modi fa ahe neàna bohu vuusda tame. Em lehe vab diat nasi lehe dam giida zi labe vedi neha, 'Alat iba gagu uba oluha,' lahame vagedume, 'Meit aba aho Eba tu vuzehe bak lam fa vabalese,' lahame meedaha dam ehe bak. Abo mei na aa vadam dam lamti mei nazoh tet si vietoi voutam dam lamti ulohona meedaha damat modem bak. Lahana domba Ebeda ame dam labe iho vameadaha dae lam ba aihi vabak. 10 Ame da mei na aa vanda labe ame domba ut tàmè ousdam bak laba lem di gi neham bak ozome lehe bak. Gi mei domba aa ve voutame oteme àme setelo lehe bak. Lahana Ebe Eho lehe bak nim ba labihaha vabak. Em gi domba Ebeda fa Emti vahi gi ahe neàna bohu vuusdam bake abo ba na iho ozome vanna vabake ozome lehe bak. 11 Em abo Domba Vou Aasdamda Neàda Em am bak. Vem nohuda li, 'Domba beose,' laham di Em domba ahedem bake Ehemu uledi soat vausu ot vai elom neà bak. 12 Mei domba teohet vou aasdam bake doi vanda lam bisi domba iademe vou aasdam vabak. Neham labe labihaha bak. Domba lam am

dombat modem vabak. Mei domba aho gi vou aasda. Labihàmu ame da labe aho aameam nohubake azihi vem meona ame domba beolo modemu aho gi iedi domba vou esmozi itam bak. Labi ame domba zi lam ame vem meona labe nohisi domba meida veeme àme domba totbaho ab fi goaitoi ilime seddamam bak. 13 Ame da lam gi aho doi vam bak laba deeli vou aasda. Ba domba laba faobekem vabak. Labihàmu ame vem meona lem di am ba domba faobekem vaba gi aalahigeàmu iedi itame setem dât modem bak. 14 Lahana Em ba labiham vabak. Em abo Domba Vou Aasdamda Neàda Em am bak. Em Aiti ot ozobohudiaha bak lamti ulohona Emti domba Ebedati laha ot ozobohudiaha bak. Labi laha domba Ebeda ahedem bake Ehemu uledi soat vausu ot vai elom bak. 16 Em domba ut tànhà niba ba vi tau oumahedalo modemna zi amomoi ehete. Lada lam Eho laha le ateme fa vou li ut tànhà niba vahi oumaheda tame. Ame domba lam laha dae Ebeda aime ozobohudi fa amuda zi nimti vahi gi Ehemu zi vàmadi vou aasdalo modem bak. 17 Em ba fat ahedi usam bak laba ozome domba Ebeda ahedem bake Ehemu uledi soat vausu ot vai elom bak. Eho ahit lab uledi ot vai elolo modem bak lam Em Aiat Eba deelem bak. 18 Em Ehemu it ozome neàdi uledi gagom vabameam làhà ba meit Eba otem vabak. Gi Ehemu naedat it ozome uledi neàdi im dedateli gagom labe meit Em otem bak. Em Aiat Eba gagoho labe Eho im dedateli Ehemu uledi ot vai elom neàte. Labi laha im dedateli fat ahedi usam neàte. Labihadam bak." 19 Lahame Yesusat lab vameadaha im bohu lam ame Yahudi damat aiha vabamu ihimo otesi otesidam labe ab fahedamam. 20 Dam dua totbaho labe nehame gagoda. "Mei ahu oli veimam setan lam ame Da labe Am ahu laba veimai ahusobuli ostam im debu vabna vameadam Dât mode taia? Baka akati iho ame Da labe Am im iho neo vi aie?" lahame gagu mouda. 21 Lahana dam totbaho labe nehame gagoda. "Ame Da labe etei vameadume iho aihi im nim mei ahu oli veimam setan veimaha labe labihasu im vameadam biem bak. Ba akati setan oli veimahada labe dat fako na aam biemda modi fa neàdela? Labiham biem bak," lahame ab gagodamam. 22 Labi ba digat meida labe neo Yahudi dam labe ibi iho ozome na àme iziam bak meida ab vou fuham. Ame na àme iziam di lam gi ame Fihasi Ala Bake Vou Baedam Num Vàmteabu Lam amu di iube meit modi vànhàdehemu Yahudi dam amuda labe iho ame num fa itatame gànhàdehe bak laba vi ozome na àme iziam di modem bak neo ab fuham. Labihàmu Yahudi dam bada labe kota Yerusalem laba na àme iziam bak lam neo ab meedamam. Di lam di nutabedehe di am. 23 Ame na àme iziam di labe am digat meida labe Yesusat ame Num Vàmteabu labe am bak tomba labe am baa tot Salomonam Num Tom Fihaba Alim Baa laba goda. 24 Laba godume modeha Yahudi damat Am alihi aahemu fa Aba netàdi dozeadume vi ailo ab gagodamam. " 'Om ana dât modela?' laham bak lam akati iba taho ahate gagom vaba im vabili ahu vi ozodam bohu meedàla? 'Om Alat Gagù Fihasi Vimteme Oluhu Dat Boehàda ameo?' laham bak imbomeam làhà taho ahate iba gagole." 25 Lahahat Yesusat fa gago, "Ne, Eho amu uba gagohona um Em im tu vuzehem moudam damat mode taia? Lahana um ozom vaba? Em Aiat Eba gagu Eho fa im dedateli ame na damat ihimo modem biem im feàna zi nim Eho lab meedaha bak labet uba modi, 'Em ana Dât modela?' laham bak ozobohudi fi gatemna am bak. 26 Lahana ame bak aahanàme um ba domba zi Ebeda modem vab labe uho ba neha, 'Em abo Alat Gagù Fihasi Vimteme Oluhu Dat Boehàda Em am bak,' lahame ba Eba tu vuzehem vabak. 27 Domba Ebeda dae Ebeda aim di ozobohu labe aime uledi ledam bak. Labi laha, 'Domba adida Ebeda mode?' laham bak lam Em naeda ozobohu bak. Labiham labe domba Ebeda Eho vameadam im aime vuzehi meedam bak. 28 Labi domba Ebeda Eho modi Em Aiti vahi gi ahe neàna bohu vuusdam bak. Labiha labe ba Alati vaivesu geàdam bohu vuusdam vabak. Ba domba Ebeda meit Em anekèhà niba si vietom vabak. 29 Na ahebu vafozi bisi feàda Em Ai am bak. Labi laha domba Eba lohoda Am am bak. Ba domba Ebeda meit Em Aiam anekèhà laba si vietom vabak. 30 Emti Em Aiti ozom di im gi vàmtea bak." 31 Lahame Yesusat etei lab gagoho bak lam ame Yahudi dam labe aime faki neo, "Yesus otese,"

lahame ke visomoame, "Beose," lahame viisiha Yesusat neo vi gagoda, "Ne, Eho dam bake tau meedam im neàna lam Em Aiat Eba neha, 'Meedale,' lahame gagu Em im dedateli Eho na damat ihimo modem biem im feàna meedaha im zi lam um aahana taia? Eho lab meedaha im zi lam adida Eho modehe labe um faki Em otelo modela?" 33 Lahahat ame Yahudi dam labe fa gago, "Oho lab neà bak meedamna zi lam iho aame faki ke visomoame Om otelo modem vabak. Iho Om otelo modem bak gi neha: Om gi bakda labe vedi neha, 'Emiti Em Aiti ozom di im gi vàmtea bak,' lahame gagoho bak lam Oho gi Ala bake feàtähà bak. Om gi bakda akati, 'Om Ala am tame,' lahame gagodàla? Im Oho lab gagoho bak laba faki ke visomoame Om otelo modem bak." 34 Lahahat Yesusat fa gago, "Alat Vameadaha Im Toedahana zi lam abo ubu uho vuusdam Alam im lam um laba aame vi ozodam vaba? Aham di iube Israel dam vuusdam dam ahamda busaoda zi lam abo Alat Am im gagu oluhu dam zi lam Aho im nehazu dam laba gagohona meit nehame toehe bak ehena taia? 'Alat neha, "Um abo meit vuusualame vou baedam ala zi um am bak," ' laham im uho ab vuusdamam taia? 35 Alat Vameadaha Im Toedahana lam ba fa faamome veimdi fa im meidem biem bak lam im ahebu ozobohu bak. Gi labaha bohu vuusdamnat modem bak. 'Um abo meit vuusualame vou baedam ala zi um am bak,' lahame lab toehe bak lam imbodemeam làhà uho ozom, Em akatiha? 'Em Alat mode,' laham bak lam Em gagom biehe? Vabà! Gagom neà bak. Aiat neha, 'Em Adat,' lahame gagu fi hasi bak niba gagu oluhuda Em ame Da am bak. Labiha labe Eho amu neha, 'Em Alam Adat am bak,' lahame gagoho di lam akati modi uho vedi neha, 'Eho Ala bake feàtào,' lahame vàlu gagohela? 37 Eho etei vameaha bak lam fa uba vouhodase. Neha: Eho Em Aiat meedam im lam Eho vi meedam vabameam làhà Eba a tu vuzehemule. 38 Lahana Eho ame im lam meedameam làhà gi Ebe Eho lab meedam bak labet uho aadaha labe, 'Em Alam Adat am tame,' lahame Eba tu vuzehere. Ebe Eho lab vameadaha im labet uho Eba tu vuzehem momeam làhà gi Ebe Eho lab meedam bak lam aame ozo, 'Alat Eba gagu oluhu labe Eho ame baket meedaho,' laham bak laba tu vuzehere. Uho labi modem labe Em Em Aiti ot vou ali ot vou aliame ahu vàmadi ulohodesu meedam bak lam um ab ozobohu aabodemam bak." 39 Yesusat etei lab gagoho bak lam ame Yahudi damat aihemu neo faki, "Sise," lahame vabeddume modeha Yesusat neo itame sete. Ba sim vabak. 40 Labi itaha labe le Yordan Soabo dumam tot iuba fa ab bioham. Abo Yohanes Mei Vuu Valo Baptisleiamda labe aho amu dam valo baptisleidaha bak laba fa ab bioham. Biou laba teohe azi. 41 Laba le azi modeha dam dua bak Aba dihasi valada. Dihasi valada. Lahada. Damat nehi ot gagoidam labe valada. "Yohanes Mei Vuu Valo Baptisleiamda labe ba na damat ihimo modem biem im feàna damat fet aame ozobohudemna modehe vabak. Lahana Ame Da Yesusat, 'Akatihasu meedam dät modela?' laham im lam Yohanesat vameame esuhuna lam ahebu gi imbodem tadehe bak," lahame ot gagoidam labe valada. 42 Labihadume modeha ame bak laba dam dua zoho labe, "Yesusat ame Alat Gaguhasi Vimteme Oluhu Dat Boehàda am tame," lahame ab tu vuzehedham.

11:1 Ame di lam dat ee gagom Lazarus lahamda labe aho num debu Betania laba gaili bisda. Labi am nà behàsu Martati Mariati laha ame bak laba vahi azi. Ame nam Maria lam ba im Boehàda Yesusat naba minyak ahana neàna noime afoezobe am ohuta bohu labe vi footolo modem nam am. Laham nam labe am dubu Martati im vahada Lazarus gaili bisdàmu vou aasda. 3 Làhàmumu am nà behàsu labe iho da meida laba gagu Yesusat bake ab oluham. "Ai Boehàda oa, Omti vou alemda Oho deelemda gaili bisdalo. Lele," lahame ab gagu oluham. 4 Lahaha im lam Yesusat aihemu gago, "Lazarus lab gaili bisdam bak lam gi labihasu fà bisdase. Ba elom kaio. Am gaili bisdam bak lam Alat nehame ozome gaili bisdam bak. Alat Aho Lazarus bake ba modem im ehe labe ame bak labet modi Amti Em Am Adatti, ' "Bisi feàte," laham bak lam damat fà ozobohudese,' lahame ahit

labihaha bak." 5 Yesusat aho Martati Mariati Lazarusti deeli meedamnàme vedi, "Lazarus gaili bisdalo," laham bak aihina taho laha vaba vedi Aba Aho azihi bak laba neo usi behàsde. 7 Labi usi behàsdi neàdehezobe Aho iba Aba vi tau meedam dam niba ab gagoham. "Imo Yudea bake laba fa lase." 8 Lahame labi gagoha iho fa gago, "Ai Guru oa, Om ozom vaba? Om etei laba laha di ame Yahudi damat gi ke visomoame Om otelo modem bake akati kehàm vaba fa laba lalo modela?" 9 Lahahat Yesusat fa gago, "Digat vàmtea labe fauhaedam di dua belas jam ehete. Di lam ala fauhaedam labe damat godameam ba naba gitadi bitem vabak. 10 Lahana damat aibut godameam naba gitadi bitem di am. Fauhaedam bak vab labe labihaha bak." 11 Lahame labi gagu neàdi neo vi gago, "Imti vou alemda Lazarus bitesu iddalo. Imo le Eho ukese." 12 Lahahat Aba vi tau meedam dam nibe iho fa vi gago, "Ai Boehàda oa, am iddameam làhà gi fa neàdelo iddam bak. Gi labihasule." 13 (Yesusat etei lab gagoho bak lam gi Lazarus eloho bak gagolo Aho ahit im totobet gagoho bak. Lahana Aba vi tau meedam dam labe vedi abo iddam bak gagoho tibame vabili labi vi gagoho bak.) 14 Ame dam labe vabilehemu Yesusat fa ahate ab gagoham. "Lazarus eloho. 15 Lahana Eho ame da laba ba modem im ehe labe uba modi uho Eba vi tu vuzehi dualem bake am elolo vabalehe di lam ame bak laba Em tau modehe vab labe Em gi deelehe bak. Neàde. Imo nasi Lazarus eloho bak laba ladase." 16 Lahahat Tomas damat neha, "Tasbana," lahame ee meida taluhuda labe aho fa im amti vahi Yesus bake vi tau meedam dam totbaho niba ab gagoham. "Lo, im Da laba tau vuladume le Amti vahi elodam neàte," lahame gagu neàdi dam vahi Yudea bake ab laham. 17 Ame Betania gi kota Yerusalem laba netàdehe num debut moz. Gi kilometer làtela lamo. Kia vabak. Labihadam di lam Yahudi dam kota Yerusalem laba azihi dam dua totbaho labe li Martati Mariati im vahada Lazarus elohemu im ahu faidehe bak vabededa. Labihadume modeha Yesus Aba vi tau meedam damti lehe labe li num debu Betania netàdehe bak niba ab fuham. Fusi aiha, Lazarus gi digat meida iube eloi ke bumata esu abo usi ahialehena li ai. 20 Labi Yesus ledam bak lam Martat aihemu, "Yesus bake tàse," lahame doait ab laham. Lahana Maria gi ahu faidi numa aida. 21 Labi Marta doait le tàhi ab gut gagoham. "Ai Boehàda oa, Om màt di iube iba taho lemta im vahada ba elom kaio. Oho modi fa neàdem bak lam em ozobohu bak. Oho etei nim Ala bake neha, 'Eba na nim veiale. Eba na nim veiale,' lahame gagomeam làhà Oho lab gagohona lam Alat ahebu aime uledi modem tadem bak." 23 Lahahat Yesusat fa gago, "Um vahada fat ahedi usa tame." 24 Lahahat Martat fa gago, "Lo, em ozobohu bak. Etei bak niba vou mode ladume ba Dam Bake Uloodume Vi Aime Ozobohudi Neàdi Fime Fahedam Digat labe dam ahebu elodaha bak labet Alat modi fa ahededume usnadam di lam em vahadati laha am eloho bak labet ba Alat modi fa ahedi usam bak lam em ozobohu bak." 25 Lahahat Yesusat neo vi gago, "Dam Elodahada Lam Fa Modi Ahededume Usnadamda Em am bak. Meit Eba tu vuzehemeam làhà gi elohonàme Eho modi fa usai Alati vahi gi ahe neàna bohu vuusdam bak. Ba neo vi elodam vabak. Gi ahe neàna labaha bohu vuusdam bak. Marta, Eho etei lab gagoho bak lam om tu vuzeheo?" 27 Lahahat Martat fa gago, "Lo. Ai Boehàda, Oho lab gagoho bak lam em tu vuzeheho. Labi laha Alat aham di iube neha, 'Eho Gagu Fihasi Vimteme Olulo Modem Dat Boehàda bak niba olu tame,' lahame fet gagu vàmadi esuhuda Om ame Da am bak. Labi Om laha abo Alam Adat am bak." 28 Lahame Marta labi gagu neàdi fa num bake le Maria bake aa gagu dam dua bak vaitesu vou li gago, "Im Guru bàhàgo bak laba doudalo. Oba, 'Lele,' lahaho." 29 Lahame labi gagu modeha Mariat aihemu gi àvodehat usai Yesus bake ab laham. 30 Di lam Yesus gi num debu Betania bàhàgo bak laba abo Marta Aba doait tàhà bak laba vou faodam lahasu. Ba num debu bake fum kai. 31 Labihadam di labe Yahudi damat neha, "Maria bake vabededase," lahame am num laba teohe li esdam dam labe vi aaha Mariat àvodehat usai num labe futoi ladam bak aahemu ab ozoham. "Am vahada koei ke bumata esuhu bak laba le mezeo mode taia?" lahame gagu usnadume ab vuladamam. 32 Labi Maria

le Yesusat odosdam bak laba lafusi Yesus aahemu ahit Yesusat avaesdam laba ogomasu biti ab gagoham. "Ai Boehàda oa, Om màt di iube iba taho lemta im vahada Oho modi fa neàdem bak. Ba elom kaio," lahame ab vameadam. 33 Labi Mariat lab mebe vameadam bak lamti labi Yahudi dam aba tau vuladaha dam labe medaom bak lamti Yesusat aahemu ahu faidi feà bak fusi, "Dam nim akati modi, 'Dam elohoda ba fat ahedi usam kaio,' lahame tum vaba modela?" lahame vi ozodaha vabamu ab gagoham. 34 "Koei esuhu ke bumat akete?" Lahahat dam labe fa neha, "Ai, nasi iba tau le aale." 35 Lànhàmü ladam labe Yesus fa vi tau fa vaksa vevea lada. 36 Labi modeha ame Yahudi damat vi aame ab gagoham. "Nasi aama. Am abo Lazarus bake deelehe bak ba koena modem kaio." 37 Lahana dam totbaho labe vedi neha, "Dat fako na aam biemda modi fa neàdehena ba akati koei nim amu gailehe di taho modi fa neàdehe vaba modela?" lahame ab gagoham. 38 Labi Yesus neo gi ahu faidi feà bak fuhuna ozahit ladume ame ke bumat laba lafu. Ame ke bumat lam damat koei esu neàdi am ahazo ke baana ve tusu baguamdi modesda. 39 Lànhàmü Yesusat ab gagoham. "Ke bumat labe am ahazo baana osoktole." Lahahat koei labe am nà Martat mali gago, "Ai Boehàda oa, Om ozom vaba? Im vahada koei amu gi esuhuna usi ahialehena koei ahana fem bak. A osoktomule." 40 Lahahat Yesusat fa gago, "Eho amu oba gagohona taia? Meit Eba tu vuzehemeam lànhà Eho ame da laba modi ozobohudi, 'Ala abo feàte,' laham bak fi gate tame." 41 Lahame labi gagoha damat ame bak lam aihemu ame ke ahazo baana lam ab osoktoham. Labi osoktoi neàdi Yesusat Am ohu vousai asum ahoba iuba tom aasdume gago, "Ai oa, Eho Oba lab gagoho im lam Oho aihhi bak lam abo neàte. 42 Eho Oba im gagom di Om gi aim tadem bak lam Em ozobohu bak. Lahana dam niba Eba tau dozeadaha dam zi nim, 'Fà aime ozo, "Eba gagu oluhuda Om am tame," laham bak ozobohudese,' lahame Eho ahit labi ahate gagodam bak." 43 Lahame labi tom gagu neàdi Yesusat dae buduana ab buteham. "Lazarus nasi futoi lele." 44 Lahahat koei lam damat amu am anekehà ahimti am nao ahimti sue nasbe gia. Labi sue baana am dauha neo suusu baguamde. Lahadume amu lab giaha bak lahasuhuna fa usai futoi ab li duzuham. Lànhàmü Yesusat ab gagoham. "Uho Lazarus fà lam neà bak ozome um nasi Lazarusam so laba giaha sue lam ahebu ziamome voedale." Lànhàmü ame baket ab modeham. 45 Labihadam labe Yahudi dam Maria bake li vabededam dam labe aaha Yesusat lab modehe bak aahemu dam dua bak totbaho labe Yesus bake ab tu vuzehemam. 46 Lahana ame Yahudi dam totbaho labe vedi Farisi dam bake le, "Yesus nehaho," lahame ab fi deham. 47 Lànhàmü ame Farisi dam labe ame bak lam aihemu fa Yahudi dam labe ibi iho Ala bake lomna ve vua vahudam toheda zi laba vuusu im vameame faheme modiam dam lamti vahi ozo, "Imo fa Yahudit Ibi Iho Modem Im Gagu Vàmadi Esum Dam Debu laba gagu fa vahe vahedume ame im lam vameadase," lahame Yahudi dam eeda zi labe bakamta nusualadume meia uloome aime vameadam dam debu laba ab laham. Le lafusi vameada. "Ame Da lam na damat ihimo modem biem im feàna damat fet aame ozobohudemna zi duana meedam bak lam akati iho ame Da laba gagu malem vaba modela? 48 Iho gi labihasu aalahigeàmü nehazu modesdameam dam ahebu Aba aame ozo, 'Ame Da lam Alat Gagu Fihasi Vimteme Oluhu Dat Boehàda am tame,' lahame tu vuzehi meedam bak. Labihameam dam mei debu iba vuusdam boehàdatebo labe ozo, 'Lànhà, dam lam ibi iho vuusu meedam bak mu fa Da lada laba tu vuzehemo,' lahame ozomsu im meo dam fa iba olu ame Fihasi Ala Bake Vou Baedam Num Vàmteabu ibi iho vuusdamna lamti im damti ame meo dam labet beodume vànhàdedume sedda moio?" 49 Lahame labi vameadam labe im dat meida abo Damat Ala Bake Lomna Ve Vua Vahudam Tohe Dam Zi Labe Bisi Boehàdatebo abo tahun etei gànhàda nibe damat gagu fa boehàdatebolehedam Kayafas labe aho ab gagoham. "Um ahusobu damat mode? Uho lab gagoho bak lam um it ozodam vaba? 50 Im Yahudi dam ahebu bisi ahe neàdem bak gi neha taia? Im dam dua bak beho vaba gi dat vàmtea ot vai eloi setem bak lam bisi neà bak lam um ozodam vaba?" 51



Kayafas lab gagoho bak lam ahamo ozobohudi gagoho vabak. Aho lab gagoho im lam ba ab imbodeham bak. Ame da labe ame tahun labe Damat Ala Bake Lomna Ve Vua Vahudam Tohe Dam Zi Labe Bisi Boehàdatebolehemu Alat ahit ame da labe am ahu laba, "Yahudi dam ahebu soat vausu fa vei neàdem bake Yesus ot vai elo tame," laham im lam vizi ozobohudi aho vabi fet gagu esuhu bak. 52 Gi Yahudi dam lamota soat vausu fa vei neàdem bak lamota ozome gagoho vabak. Yahudi damat modem vab dam abo bak iuba azihi dam ahebu soat vausu fa vei neàdem bakti labihasu ozome gagoho bak. "Abo dam mei debuti dam mei debuti bak iuba fi goaitoho dam abo Aba tu vuzehemda ahebu Alat vamateme am dam debu vàmadesese," lahame labihalo modem bak. 53 Labihàmumu ame digat labe faasi Yahudi dam busaoda eeda zi labe, "Yesus si otese," lahame im aa odoadume ahu ab vàmadeham. 54 Lànhàmumu Yesusat Aba Aho meedam im lam damat Aba aam vabake Aho ahit Yahudi damat esuhu bak ahebu ahate gohatem bak ab mu vaitoham. Labi vaitoi kota Yerusalem vou esmozi bak aotba baa bohu dam vaba alim bak netàdehe num debu Efraim laba ab laham. Abo Aba vi tau meedam damti vahi laba ab le tau esdamam. 55 Ame di labe Yahudi dam labet ibi iho modi balehà bak abo na àme iziam bak abo Paskah neo ab vou fuseo vabaleham. Ame digat fuseo vabalehemu kota Yerusalem netàdehe num debu mei num debu meime azihi dam labe iho faidehe bak fa neàdelo ibi iho amu nasi valo it kikeme itatam bake kota Yerusalem laba valada. Ame na àme iziam bak abo Paskah lam vahi àm bake ozome valada. 56 Labi ame dam etei kota Yerusalem laba vahe vahedam dam labe, "Yesus akete?" lahame nabiha vabamo. Iho ame Fihasi Ala Bake Vou Baedam Num Vàmteabu labe am ad oli aam bak tomba laba dozeadaha di labe nehi ot gagoida. "Um akatihasu ozohela? Iho vahi na àme iziam bak nim Am ba lem vabao?" lahame ot gagoida. 57 Ame damat Ala bake lomna ve vua vahudam toheda zi laba vuusu im vameame faheme modiam dam lamti Farisi dam lamti amu dam bake nehi fet gagu esu. "Meit Yesusam alihi aameam làhà iba li gagole. Iho Da lam taho sim bak am tame," lahame fet gagu esuhu bak ehet.

12:1 Labi ame na àme iziam bak abo Paskah lam vou fuhu vabna gi ba usi enamlem bak ehe lahasuhuna Yesusat nasi fa Betania laba la. Abo Lazarus am eloho bak labet Aho amu modi fa ahedi usahada labe aho azihi bak laba ab laham. 2 Labi le lafusi ame Betania esuhu dam labe Yesus ibi bake fa lehemu deeli na àmna ab modeme vahedamam. Martat na ohuda. Labi Lazarus fa Yesusti dam bak iube lehe damti vahi na àda. 3 Labi na àdam di labe Mariat aho narwastu omnao aaboda labe modehe minyak abo doi duana vahana ahana neàna vou li Yesusam naba laba veosi afoezobe am ohuta bohu labe fa footoda. Labi modeha ame minyak ahana labe feà bak fusi num lam ahana ab feedamam. 4 Labi modeha Aba vi tau meedamda meida Yudas Iskariot abo Yesus ba vou fohome dam bake ub lolo modemda labe ame bak aame faki ab gagoham. 5 "Oo, akati modi doi feàna vaha minyak ahana neàna lam gi vàmteadala? Gi fa meia ot loiame doi feàna abo dat vàmtea na meedume tahun vàmtea foli gohali vam doiti ulohona ve fa faheme dam na vab dam laba lodam vaba modela?" 6 (Lahana ame da Yudasat lab gagoho bak lam ba dam na vabdate faobekesi doi lolo gagoho vabak. Am gi mei nazoh aa vam dât moz. Im Yesus bake vi tau meedam dam nibe iho na im meedam doi vuusdamda am. Labi ame da Yudas gi im doi na aho ozomna aa vame setemda modem bak.) 7 Lahame Yudas labi gagohemu Yesusat fa ab vi gagoham. "Gi labihasule. Maria bake a vabimule. Eho ozoha, Em ba elom diat koei noimna noime afoezobe ke bumata vou oli esum bakti uloho bak laba ozome Em naba niba ahit nasi fet veosi ahumdi esulo modem bak. 8 Um dam na vab dam gi labaha bohu tau esdam labe vi tau vi tauidam labe esdam bohu meedam bak ehe bak. Lahana Em etei nim ba uba tau azim bohu meedam vab Dât modem bak. Mariat ahole modehe bak," lahame ab gagoham. 9 Labihadam di labe Yahudi damat aiha, "Yesus Betania laba le aidalo," lahaha bak aihemu, "Yesus aase," lahame dam feàda zi labe Betania laba ab valadamam. Gi

Yesusta aam bakta ozome valadam vabak. Lazarus am eloho bak labet Yesusat amu modi fa ahedi usahada lamti aalo ab valadamam. 10 Lànhàmu ame damat Ala bake lomna ve vua vahudam toheda zi laba vuusu im vameame faheme modiam dam labe iho dam dua bak Lazarus bake valadam bak aahemu faki, "Lazarus laha otese," lahame ab ozome esuham. 11 Neham labe labihaha bak. Yahudi dam dua totbaho labe Lazarus eloho bak labet Yesusat modi fa ahedi usaha bak aame ozobohudi fa ame toheda zi labe im boehàda zi laba tum mu vou esmozi fa Yesus bake tu vuzehi meedàmu, "Lazarus laha otese," lahame ozome esuhu bak. 12 Labi izi dihasi dam dua bak amu ame na àme iziam bak abo Paskah lam tau àlo nasi kota Yerusalem niba vahi esdam dam labe aiha Yesus lelo meedam bak aihemu bom alahaso ab le fi kbodaham. Fikbodume neàdi, "Yesus abo feàte," laham bak ozome vou baedalo kota vou esmozi bàhàgo obe iuba Yesus bake doait tàlo ab laham. Ladam labe ame bom alahaso lam vuusualame vou eadam labe meit neha, "Hosana! Ala abo feàteee!" Lahame vou bae lada. Labi meit neha: "Dat abo Alat Aho Gagu Olu Ot Vai Im Dedateli iba etei ledamda nim abo feàteee!" Lahame vou bae lada. Labi meit neha: "Iba Israel dam vuusu im vahokedalo modem Boehàda abo feàteee!" Lahame neo gagu vou bae lada. Lahada. 14 Amu iub ledam di iube Yesus gi mei keledai fi ho adat gànhàda ve zisi nusu leda. Ame Yesusat etei lab meedam im lam Alat Vameadaha Im Toedahana laba meit fet toeme esuhu im nidi nim ab modi imbodeham. 15 "Dam num debu Sion laba azihi dam oa, nasi aamale! Uba vuusdam Boehàda labe etei uba ab ledamam tame. Lahana a iedemule. Gi umti vahem bak laba ozome deeli daleà ladehebeat keledai fi ho adat gànhàda laba nusu ledalo." Lahame fet gagu esuhu bak lam ab modi imbodi meedamam. 16 Ame etei lab meedaha im lam Aba vi tau meedam dam nibe amu lab fet toeme esuhu im lam modi imbodehe bak lam vabile. Lahana ba Yesus damat oteme Am eloho bak labet Alat modi fa ahedi usai fa Am Ai bake asum ahoba iuba tom ilu Alat Am ee vousai feà Dateli neàdehezobe ba ab vi ozobohudeham. "Oo làhà! Alat Vameadaha Im Toedahana lam gi damat ba Yesus bake meedalo modem im ab modi imbodehame?" laham bak ba vi ozome ozobohudehe bak. 17 Dam dua bak etei Yesus bake doait tàlo modem bak lam debu gi nehaha bak. Lazarus eloi ke bumata esuhu di lam Yesusat buteme fa ahedi futoho bak lam Yahudi damat aame ozobohudehe labe fa iho aaha bak lam meia le fi de. Meia le fi de. Labihadam labe kota Yerusalem esdam dam dua bak na damat ihimo modem biem im feàna damat fet aame ozobohudemna modeheda Yesus ame Da amemu Aba doait tàlo ab ladam bak. 19 Labihadume modeha Farisi dam labe dam etei Yesus bake buteme vou bae ladam bak lam aahemu ihimo ab ot gagoidamam. "Aiee! 'Im dam Yesus bake tum bak malese,' lahame modeha im gi nembedi ab mohameo? Um nasi ozodale. Bak niba esdam dam ahebu Aba tulo lab valadamam tame," lahame àvodi ab ot gagoidamam. 20 Ame na àme iziam bak abo Paskah lam meedam di Yahudi dam dua bak labe neha, "Ala abo feàte," lahame ahu adat iedi Ala bake vou baedalo modemu kota Yerusalem laba laha bak. Labi ame di labe Yunani dam totbaho laha tau laba laha bak. 21 Ame Yunani dam labe iho Yesus bake vi tau meedamda meida Filipus abo Galilea bak labe am num debu Betsaida labe leheda laba le ab gagoham. "Dat busao oa, im abo Yesus bake tàhi im vamealo àhàkeho." 22 Lahame labi gagohemu Filipus neo Andreas bake le ame Yunani dam labe iho etei gagoho im lam fa vou le gago. Labi gagu neàdi ame dam ahim lam fa neo Yesus bake le ab gagoham. "Yunani dam Oba aalo nabidalo." 23 Lahame labi gagoha Yesusat ame dam laba im ab faasi vameadamam. "Em kehàm vaba elo tame. Lahana Em Abo Asum Ahoba Iubet Bak Niba Li Dateleheda modem labe Em eloho bak labet Alat modi fa ahedi usai Em Ai bake asum ahoba iuba tom iluhemu Em feà datelehe bak lam Alat fa dam bakda modi ozobohudi fi gatelo modem bak ab vou fuham bak. 24 Im lada lam imbomu im imboda nidi nim laha nasi iademe aima. Ebe Eho ahe neàt aidam di gi gandum oo buàti uloho bak. Neha: Gandum oo buà bake dezi fa bak baulem vabameam gi aba esdam bak lahasuhu bak. Ba

loube futoi oo valem vabak. Lahana bake dezi fa bak baulemta laha usime oo duana vaedam bak. Labi laha Eho elom vabameam làhà uba soat vausu um fa vei neàdemna ba na vabak. 25 Meit neha, 'Em bak niba gi nehasu ahena bohu aidalo modem bak,' lahame labihasu it ozome deeli meedamda lam ba diamut ahe neàna bohu vuusdam vabak. Gi lab eloho tadi setem bak. Lahana bak niba esdam di meit neha, 'Em Yesus bake tu vuzehi im Abada meedam labe meit em otem neà bak,' lahame labihasu ozodamda lam Alati vahi gi ahe neàna bohu vuusdamda am bak. 26 Meit neha, 'Em abo Yesus bake tu vuzehi Aba vi tau meedam dateli im Abada modelo mozo,' lahamda lam Eba nasi tu vuzehi im Ebe Eho gagomna lam meedale. Labiham labe Ebe Eho le azim bak laba ame da lamti ahili le azim bak. Labi im Ebeda meedamda lam laha Em Aiat am ee vousai vou baedam bak. 27 Lahana Em etei vi ozodaha vanamai Em ahu faidi admahi seteho. Em Ai bake akatihasu gagoela? 'Eba ba modi geàdalo modemna lam fa faatoi vei setem neào?' lahame gagoe? Vab. Em labiham bie. Ame bak lam gi Ebe Eho bak niba lehe bak am bak." Lahame Aho labihasu gagu ozoha vabamu fa ab gagoham. 28 "Làhà Eho gi Ai bake nehalo. 'Ai oa, Oho bisi feà bak lam damat biem bake Oho dam bake modi ozobohudi fi gatele.' " Lahame gi etei labi gagoha asum ahoba iube Alat Am im Yesus bake ab vameadaham. "Obo Oho bak niba na im meedam bak labet modi damat, 'Em abo feàte,' laham bak ab modi ozobohudi ab fi gateham bak. Labi laha Eho ba modem im modem labet modi dam bake neo ame baket modi ozobohudi fi gate tame," lahame ab nom vameadaham. 29 Labi ame asum ahoba iube lab nom vameadaha im lam dam duada zi labe aime vedi neha, "Asumat giliha." Lahana dam totbaho labe vedi neha, "Alat Am im gagu vou usemda labe Yesus bake im vameadàla?" lahame meit ibi iho ozoho bak gago. Meit ibi iho ozoho bak gago. Lahada. 30 Labi modeha Yesusat fa ame dam laba ab gagoham. "Uho etei lab aihim im lam bisi Eba ozome, 'Em aise,' lahame vameadaha vabak. Gi, 'Alat Gagu Fihasi Vimtème Oluhu Dat Boehàda Em ame Da am tame,' laham bak um ozobohudem bake ahit uba nom vameadaha bak. 31 Etei di nim Alat dam bakda labe ibi iho bak niba meedaha im, 'Git modeheo? Neà bak modeheo?' laham bak ozome ozobohudi neàdi gagolo modem di ab vou fuham bak. Labi laha dam bakda vuusdam Boehàda Iblis lam gagu itame setem di ab vou fuham bak. 32 Lahana damat Eba modi bak nibet vousai tom modesu neàdehezobe Eho modi zie tombali dam debu ahebu Eba valadume tu vuzehi meeda tame," lahame Yesusat ab vameadaham. 33 (Yesusat etei lab gagoho bak lam, "Damat Eba modi bak nibet vousai tom modesu neàdehezobe," lahame lab gagoho bak lam Am gi, "Damat Am akatihasu otela?" laham bak laba ozome im totobet fi koadaha bak.) 34 Yesusat etei lab gagoho bak lam ame dam duada zi labe vi aime fa ab gagoham. "Oho etei lab vameadaha bak lam im ozom vabileho. Alat Vameadaha Im Toedahana zi lam meit aame iba gagodam di iho gi neham bak dogoit aidam bak. 'Alat Gagu Fihasi Vimtème Olulo Modem Dat Boehàda lam gi labaha ahe neà bohu vuusdam Dàt modem bak,' lahame labi vameadamna akati Oho neha, 'Ame Asum Ahoba Iubet Bak Niba Li Dateleheda lam damat modi bak nibet vousai tom modesu elo tame,' lahame labi gagodàla? Làhà im git ozohe? Iho vou faodamda Om ame Da modem vaba? Làhà Oho nasi Oho lab gagoho bak lam, 'Asum Ahoba Iubet Bak Niba Li Dateleheda elo tame,' lahaha bak lam, 'Ame Da lam ana dāt mode?' laham bak lam im biem bake Oho iba modi ozobohudi tombalele." 35 Lahahat Yesusat gi Aba Aho ba meedalo modem im vi ozome im totobe nidi nim fa ab fi koadamam. "Uba Fauhaedamda nibe umti vahi niba esdam bak gi kehàm vaba setem bak. Labihàm uba modi aibulem bak labna zohàmè fauhaedam lahasuhu di nibe fauhaedam bak laba ladale. Meit aibu bake ladameam, 'Am adi bake ladà?' laham bak lam ba ozobohudem vabak. 36 Labihàm uba modi Fauhaedamda nim umti vahi esdam lahasuhu di nibe nasi Aba tu vuzehi. Labiham labe Am itbaho fatoi Am damali Am im imbona lam fa ot vai meeda tame." Lahame labihasu vameadume neàdi Yesusat ame dam lam vou esmozi gi ab itame seteham. Ba dam bake ahate gohatem vabak.

37 Yesusat aho na damat ihimo modem biem im feàna damat fet aame ozobohudemna zi duana lam Yahudi damat aasdahit meedahanàme ame dam lam ba Aba tu vuzehem vaba gi mu bohu vuusdam bak lahasda. 38 Ame dam labe iho lab mu bohu vuusdam bak lam gi dat ahamda Alat vameadaha im aime fa dam bake ahate vameaidahada Yesaya aho aham di iube nehame fet toeme esuhu im lam ab modi imbodeham. "Boehàda Ala oa, iho vou vameatedaha im lam iho ozoha, dam aime tu vuzehhedha mahate dua vabna ozomom bak. Om feà bak lam Oho dam bake modi ozobohudi fi gatehenàme iho vou li vameadaha im lam tu vuzehem mom bak lahasuho." Lahame Yesayat lab fet toeme esuhu im lam ab modi imbodeham. 39 Ame Yahudi damat Yesus bake tu vuzehem vaba moudahemu fa ba ab tum bieham bak. Abo Yesayat aham di iube Alat gagoho im meida aho nehazu fet toeme esuhu bakti ulohote. 40 "Boehàda Alat nehaho. 'Eho dam labe na aam bak labna zohàme Eho ahit modi ame dam labe na aam bileho. Labi dam labe im ahulat vi ozome ozobohudem bak labna zohàme Eho ahit modi im ahu tamzohobuleho. Labiham labe ame dam labe ba ibi iho faina meedam bak lam voedume seti fa vei neàdedam vab labe Eho ba ame dam laba soat vausu fa vei neàdedam kaio.'" Lahame Yesayat aham di iube labihazu fet toeme esuhu labe ame Yahudi damat fa Yesus bake ba tu vuzehem biehe bak am bak. 41 Ame da Yesaya lam Alat ahit modi Aho Gagu Fihasi Vimteme Olulo Modemda Boehàda labe ba feà Dateli meedam im lam nasi ozobohudi gi aham di iube ame im lam nasi fet toeme esuhu bak. 42 Ame Yahudi dam dua bak Yesus bake tu vuzehem vabnàme ame Yahudi dam busaoda eeda zi totbahota Aba tu vuzeheda ehe bak. Lahana ame dam labe ibi iho Yesus bake tu vuzehede bak lam Farisi dam labe aime ibi iho fi hasi bakamta vahi Alat vameadaha im ahamda dogoit aidam bakti im meiti meedam num lam mali gagu itam bak labna zohàme gi aa tu vuzehi meeda. 43 Neham labe labihaha bak. Ame dam labe iho aa tu vuzehi meedam di Alat iba deeli vou baedam bak ba ozome meedam vaba vedi, "Gi bak damat fà iba vou baedase," lahame ibi iho Yesus bake lab tu vuzehede bak lam imbo vabna gi meeda. 44 Labi Yesus dam bake dae buduana ab buteme im ab vameadamam. "Meit Eba tu vuzehemeam làhà ba gi Emota tu vuzehem vabak. Abo Eba Gagu Oluhuda lamti tu vuzehem bak. 45 Labi laha ame da labe aho Eba fakot aam di gi Eba Gagu Oluhuda laba aadamna ààmom dèt modem bak. 46 Eho bak niba lehe bak nim gi dam bakda aibu bak laba azim dam laba, 'Fà modi fauhaedase,' laham bak ozome lehe bak. Meit Eba tu vuzehemda lam aibu bak laba azim lahasum vabake Eho ahit labihaha bak. 47 Meit Eho vameadam im aime tu vuzehi meedam vaba gi aalahigeàmomda laba Eho, 'Beose,' lahame ba na asimbuuna feà aba modelo gagodam vabak. Neham bak. Eho dam bakda laba, 'Beose,' lahame na asimbuuna feà dam laba modelo gagom bak laba ozome bak niba lehe vabak. Eho gi dam bakda ibi iho faina meedàmù Alat beom bak fa faamome soat vausu fa vei neàdedam bak laba ozome bak niba lehe bak. 48 Lahana damat Eho vameadaha im lam Emti mu aalahigeàmom dam lam ba beom bak ehe bak. Abo Alat ba diamut Dam Bake Uloodume Vi Aime Ozobohudi Neàdi Fime Fahedam Digat fum di beom di am bak. Ame dam labe Eho vameadaha im laba tu vuzehem vaba moudahemu Alat gi ame bak labet dam laba vèlu, 'Beole,' lahame vi ozome ozobohudi neàdi gagoda tame. 49 Neham labe labihaha bak. Eho bak niba li meedam di nim ba Ebe Eho ozoho bak labet ozome Ehemò im dedateli dam bake im vameadam vabak. Gi Eba gagu oluhuda Em Aiat Aho neha, 'Dam bake im nehazu vameadale,' lahame gagohemu Eho gi Aba Aho gagohoda lamota dam bake li vameadam bak. 50 Labi Em Aiat Eba neha, 'Im nehazu dam bake vameadale,' lahame Eba gagodaha im lam meit tu vuzehem labe Aho modi fa Amti vahi gi ahe neàna bohu vuusdam im am bak. Laham bak lam Em ozobohu bak. Labihàmù Eho dam bake im vameadam di Eho gi iademe Em Aiat amù Eba fet gagu esuhu im ahum lamota dam bake vameadam bak," lahame Yesusat ab vameadamam.

13:1 Yahudi dam labet ibi iho modi balehà bak lam abo na àme iziam bak abo Paskah lam novalo modem di labe digat bisi tombuda dihasi àm bak ab fuseo meedamam. Labi ame aibu labe Yesusat Am bak nim vou esmozi fa Am Ai bake lam bak fuhu bak lam Am naedata ozobohu bak. Aho bak niba li tau aidam di Aba vi tau meedam dam ahebu Aho gi amu di iube faasi deelehe bohu vuusdam bak. Aho gi labihasu vou mode ledume Am bak nim fa vou esmom bak ab vou fuhamdaleàm, "Aba Aho Am damalehe dam laba bisi lab deelehe bohu vuusdam bak lam Am dam labe fà ozobohudese," lahame Aho ab vouhodalo modemam. 2 Aho Aba vi tau meedam dam dua belasti iho ame Paskah vi ozome àmna tombuda àlo modemu vahe vahedam di labe Iblisit gi amu di iube Simon Iskariotam adat Yudas bake am ahu laba neha, "Oho Yesusat vou fohome meia ub lu otele," lahame gagu esuhu bak. 3 Lahamnàme Yesusat Am Aiat Aba na im ahebu lu Aba modi im dedateli vuusu meedam bak lam Am naedata ozobohu bak. Labi Am Aiat Aba gagu asum ahoba iube bak niba oluhu bak lamti labi Am Ai bake fa lam bakti Am laha ozobohu bak. 4 Lànhàm, "Aba Aho Am damalehe dam laba bisi lab deelehe bohu vuusdam bak lam ame dam labe fà ozobohudese," lahame Aho na àdam bak labe usai Am sue ahobada vihitoi esu afoezobe handuk visoi Am kemohode laba gimsu neàdi vao fedehena visoi fi lihiba laba veàtoi fa Aba vi tau meedam dam labe im naba laba vaot ab faasi kikedume afoezobe Aba it gimsuhu handuk labe eksobu bak ab footoidamam. Aho nehasu meeda. 6 Dat meida am naba kikeme neàdi fa handuk vi footoi esu. Dat meida am naba kikeme neàdi fa handuk vi footoi esu. Lahadume Simon Petrus bake vou fusi am naba kikesome modeha Petrusat ozo, "Em feà vab dèt akati Yesusat em naba kikelo mode?" lahame ozohemu Yesusat bake ab gut gagoham. "Ai Boehàda oa, em naba Oho kikelo mode?" 7 Lahahat Yesusat fa gago, "Eho etei nib meedam bak nim om biem bak. Lahana faobe om ba ozobohude tame." 8 Lahahat Petrusat fa ab gagoham. "Vabà! Om ba em naba a kikemule." Lahahat Yesusat fa gago, "Eho oba vaot kikem vabameam Emti omti ahu vàmadi vou alem vabak." 9 Lahame labi gagoha Simon Petrusat fa gago, "Labihameam làhà gi em nabata a kikemule. Em anekèhàti em ohuti ahebu laha kikedale." 10 Lahahat Yesusat ozo, "Am dam amu faina meedaha bak lam Eho modi fa faamome vei neàdedahamnàme fa neo ba faina vi modi vi modidàm Eho neo vi faamome vei neàdedam bak laba ozome Eho gi nabata vaot kikedume vouhodase," lahame ozome fa Petrus bake ab gagoham. "Meit gi etei sabunat ehume neàdeheda lam ba so gihobulem vabak. Ab boz neàdeham bak. Gi naba vekeheda lamota kikedam bak. Um dam totbaho ahebu Eho kikeme boz neàdehe bak. Lahana gi dat vàmtea vooho bak," lahame ab gagoham. 11 Yesusat etei lab gagoho bak lam Aho gi Am vou fohome dam bake ub lu otelo modemda lam Am gi amu di iube fet ozobohudehe labe Aho neha, "Um dam totbaho ahebu Eho kikeme boz neàdehena gi dat vàmtea vooho bak," lahame labi gagoho bak. 12 Labi Aho Aba vi tau meedam dam labe im naba vou kike ladume neàdi fa usai sue ahobada amu vihitoi hoda lam fa ab dusuham. Dusu neàdi Aba Aho na àdam bak laba fa ab le nusuham. Labi nusu gago, "Eho etei lab meedaha bak lam uho vi ozo, 'Akatihasu modelo labihahela?' laham bak lam um ozobohudeheo?" 13 Neham bak. Uho Eba im gagom di, 'Guru oa, Ai Boehàda oa,' lahadam bak lam gi ahole gagodam bak. Em ame Da am bak. 14 Uba vuusdam boehàdati uba vahokedam guruti Em ame Da modehemu Eho ahit mei na teo meedamdati ulohonali um naba kikedaha bak. Labihàm uho gi ame baket meedale. Um naba ot kikei ot kikeidale. 15 Eho etei uba lab meedaha bak lam, 'Uho laha ame baket meedale,' lahame uba ab vouhodaham bak. 16 Eho vouhohemu uho gi ame baket vi meedale. Labi laha Eho etei uba gagolo modem im imboda nidi nim laha nasi iademe aima. Mei na meedamda labe aho ba aba im gagu modiamda laba ba vafozi feà datelem vabak. Labi laha im ahum ve fa meia vameadamda lam ba im deda laba vafozi feà datelem vabak. 17 Eho etei uba lab vahokedaha bak lam um aime ozobohudehe labe uho vi meedameam làhà Alat fa uba im neà bak modi esuiam bak. 18 Eho amu

neha, 'Gi dat vàmtea voocho bak,' lahame lab gagoho bak lam um ahebu vi ozome gagoho vabak. 'Uho Eba tu vuzehi vi tau meedam damalele,' lahame um fi me vaha di lam, 'Um akatihuasu meedam damat modela?' laham bak lam Em gi amu nasi fet ozobohudehena um fi me vaha bak. Ebe Eho ba modem im lam meit Alat Vameadaha Im Toedahana laba nehazu toehena, 'Imbodese,' lahame Eho ahit um labihuasu fi me vaha bak. Ame im neha: 'Meit ahobat neàdi Eba tau roti àdamda lam Eba fa fakemoholemda am bak.' Laham im lam imbodelo Eho ahit um fi me vaha bak. 19 Eho etei lab gagoho bak lam ame im meedaha vab di nibe uba nasi fet vameadam bak. Ame im lam ba modi imbodehezobe uho it ozo, 'Em ame Da ame?' laham bak laba tu vuzehem bake Eho ahit uba nasi fet vameadam bak. 20 Eho etei lab gagoho bak lam imbote. Em ame Da am bak. Lahana Eho etei uba gagolo modem im imboda nidi nim laha nasi iademe aimale. Ebe Eho im Ebeda gagu oluhuda lam meit ule neàt gut vameam làhà gi Eba laha ahu ule neàt ab vaham bak. Labi Eba ahu ule neàt vamda lam gi Emota ule neàt vaha vabak. Abo Eba Gagu Oluhuda lam abo Em Ai bake laha ahu ule neàt vaha bak," 21 Lahame labi vameadume neàdi Yesusat ahu faidi feà bak fusi vi ozodaha vabamu ahate ab vi gagoham. "Im imboda nidi nim nasi iademe aima. Uho meidavat Em vou fohome meia ub lu ote tame." 22 Yesusat etei lab gagoho bak lam Aba vi tau meedam dam labe iho aime àvodi, "Amat modem im gagohela," lahame ihimo fako meot ot aai ot aaida. 23 Di lam Eho Yohanesat Aba vi tau meedamda meida abo Yesusat deeleheda nibe Am obe laba vi tau aida. 24 Làhàm Simon Petrus labe eba neha, " 'Amat modela?' laham bak lam oho Guru bake gagu aile," lahame gi fakot im vameada. 25 Làhàm eho Yesusam so laba nem ulasi netàdi aa gago, "Ai Boehàda, amat modela?" 26 Lahahat Yesusat fa eba neha, "Eho etei roti na vaksa niba nom ekeme lu àlo modemda nim ame da am tame," lahame gagu roti aguti ame na vaksa laba nom ekeme afoezobe fa Simon Iskariotam adat Yudas bake ab loham. 27 Lu modeha Iblisit Yudasam ahu laba ab oli veimadamam. Labi modeha Yesusat Yudas bake ab gagoham. "Oho lab ozome modelo modem im taho modele." 28 Lahame Aba Aho lab gagoho bak lam iho Aba tau na àdam dam totbaho nibe, "Yesus akatihuasu ozome Yudas bake labi gagohela?" laham bak vabili vi ozoda. 29 Im doi Yudasat vuusdam dât modem labe dam totbaho labe vedi nehi ozo, "Làhà im Paskah labe na àm tombuda àm bake na le doit vam bak gagodà tiba. Laham vabameam ame doi vou le na vame fa dam na vab dam laba lodalo gagodà tiba," lahame vabili vi ozoda. 30 Labi Yudasat ame roti ve àme neàdi modeha ab futoi laham. Gi aibut ab futoi laham. 31 Labi Yudas futoi le seti neàdi Yesusat Am ba eloho bak labet Alat modi fa ahedi usahazobe Aba neo modi tom vousai fa feà datelelo modem bak laba ozome Aba vi tau meedam dam niba im neo vi susulo vameada. "Etei nibe Em Abo Asum Ahoba Iubet Bak Niba Li Dateleheda nim damat Eba, 'Em abo feàte,' lahame vou baedam bak lam Alat modi ab faaseo meedamam bak. Labi laha Eba modelo modem im nibet modi damat Em Ai Ala bake laha neo, 'Am abo feàte,' lahame vou baedam bak laha ab faaseo meedamam bak. 32 Labi Eho vou mode lehe im nibet modi damat Em Ai bake, 'Am abo feàte,' lahame vou baedameam làhà Em Aiat Eba Am Adate etei modelo modem im labet neo modi damat neha, 'Em abo feàte,' lahame Eba fa neo vou baeda tame. Ame bak lam ba kehàlo modem vabak. Abo taho modelo modem bak. 33 Em damalehe dam oa, Em umti vahi esdam bak nim ba bohulalem kaio. Em gi ab setelo modemam bak. Labi uho gi fa Eba vi nabidam bak. Lahana Eho amu Yahudi dam busaoda eeda zi laba neha, 'Ebe Eho le azilo modem bak laba um tau vulam biem bak,' lahame lab gagoho bak lam Eho neo gi ame baket uba neo vi gagu esulo modem bak. Um laha etei Eba tau vulam vabiem bak. 34 Labihàm Eho im gahàda, 'Nehame modele,' lahame uba ab vameame esulo modemam bak. Neha: Uhumo nasi meia ot deeli ot deeliidale. Abo Ebe Eho uba deelehe bak lamti ulohona uho neo uhumo ot deeli ot deeliidale. 35 Uhumo ot deeli ot deeliame meedameam làhà dam bakda ahebu aame ozo, 'Dam lam abo Yesus bake bisi vi tau meedam dam ame?' laham bak aame

ozobohudem bak am tame," lahame Yesusat ab vameadaham. 36 Ame di labe Yesusat neha, "Em umti vahi esdam bak nim ba bohulalem kaio. Em gi ab setelo modemam bak," lahame lab gagoho bak lam Simon Petrusat aiha vabamu fa ab vi gagoham. "Ai Boehàda oa, Om ake lalo mode?" Lahahat Yesusat fa gago, "Ebe Eho etei lalo modem bak nim om Eba etei vi tau vulam vabiem bak. Lahana ba diamut Eba vi vulem bakti gagom kaio." 37 Lahame labi gagoha Petrusat neo ab vi gagoham. "Ai Boehàda oa, akati modi eho etei nim Oba vi tau vulam biehele? Em Oba tu vuzehi vi tau meedamu damat em otem ule bak." 38 Lahahat Yesusat fa neo gago, "Oo làhà! Om Eba tu vuzehi vi tau meedamu damat om otem om ule? Om abo imbona gagohu? Eho ozoha, ame bak lam om ozome neàdem kaio. Om ba labiham vabak. Nasi aima. Em abo imbo bak oba gagolo mozo. Om etei ba diham ozoh aibubet meit oba neha, 'Om Eba vi tau meedamda am tame,' lahame aame labi gagom di om fa vei iedi veibam bak làtelademeam kuk ab aaumam tame," lahame ab fet gagu esuham.

14:1 Labi Yesus neo Aba vi tau meedam dam laba neo nehame vi vameada. "Um bisi a ahu faidi vi ozodamule. Uho Ala bake tu vuzehem labe laha Eba laha tu vuzehi. 2 Em Aiam num lam abo damat azim nuzuba duate. Em etei Em Aiam num laba nasi le nuzuba ubu uho ba azilo modemda lam Eho le modeme ahumdi vahedalo mozo. Ame bak lam imbodem vabameam Em ba uba ame bak lam gagom vabak. Abo imbodelo modem labe uba vameadam bak. 3 Labi Eho laba le uho azilo modem bak lam Eho modeme ahumdi neàdi Em fa li um ateme fa vou le laba oumahedalo modem bak. Em umti vahi azim bake labihalo modem bak. 4 Ebe Eho azilo modem bak lamti labi, 'Akatihasu modem labet laba là?' laham bak lamti um ozobohu bak." 5 Lahame labi gagoha Tomasat fa ab vi gagoham. "Ai Boehàda oa, Oho etei lalo modem bak lam im biem bak. Oho lalo modem bak lam, 'Akatihasu làla?' laham bak lam im ba akati ozobohude?" 6 Lahahat Yesusat fa gago, "Iho bakdati Alati ahu vàmadi vou alem bak lam, 'Akatihasu modem labe ame baket mode?' laham bak lam meia modi ozobohudi fi gatemda Em ame Da am bak. Labi, 'Ala akatihasu meedam Alat modela?' laham im imbona lam im dedateli meia modi ozobohudi fi gatemda Em laha ame Da am bak. Labi meia modi Alati vahi gi ahe neàna bohu vuusdamda Em laha ame Da am bak. Meit Em Ai Alati vahi ahu vàmadi vou alem bak lam gi Eba tu vuzehem labe labiham bak. Ba meit Eba tu vuzehem vaba alia modem vabak. 7 Um Em ozobohu aabodemeam làhà um laha Em Ai Ala laha ozobohu aabodem bak. Lahana Eho ozoha, um Em alihi aahemu etei aibu nibe faasi Eba modelo modem im meedam labe um Em Ai Alam alihi aame ozobohudehena ozomom bak." 8 Lahahat Filipusat vabili neo vi gago, "Ai Boehàda oa, Om Ai, 'Neam tame,' laham bak lam iba gagu im aame ahu asimdi neàdese." 9 Lahahat Yesusat fa gago, "Filipus, Eho umti vahi vou godamehamdehena, 'Em ana dât mode?' laham bak lam om akati Em vabiem lahasu mode? Meit Em alihi aadameam làhà gi Em Ai Alati aadahana ozomom bak. Labiha labe ba akati oho neha, 'Im Om Ai alihi aase,' lahame labi gagohela? 10 Em Em Aiti ot vou ali ot vou aliame ahu vàmadi meedam bak nim om tu vuzehi vaba? Ebe Eho uba vameadam im nim ba Ehemu ozome im dedateli uba vameadam vabak. Gi Em Aiat Eba gagu Eho im dedateli fa uba vameadam bak. Labi laha Eho na damat ihimo modem biem im feàna zi lam meedam bak lam ba Ehemu im dedateli meedam vabak. Gi Em Aiat Eba vou ali ahu vàmadi meedam labe Aho eba modi vizehemu Eho ot vai im Abada ulohodesu meedam bak. 11 Eho neha, 'Em Em Aiti ot vou ali ot vou aliame ahu vàmadi meedam bak,' lahame Ebe Eho lab gagoho bak lam uho tu vuzehi. Laham vabameam Ebe Eho lab vameadaha im labet uho Eba tu vuzehem momeam làhà gi na damat ihimo modem biem im feàna Eho lab meedaha bak lam uho aadaha labe ozo, 'Alat Eba gagu oluhu labe Eho ame baket meedà?' laham bak laba tu vuzehi. 12 Eho etei lab gagoho bak lam imbote. Gi ame bak lam aadam labe

Eba tu vuzehete. Labi im imboda nidi nim laha iademe aima. Meit Eba tu vuzehemeam làhà ame da labe aho gi Ebe Eho lab meedam bak lamti ulohona ab meedamam tame. Lahana gi im lamota meedam vabak. Eho Em Ai bake fa le Aiam Aha Nutabe Neàna ame da laba it olu vizi teudelo modemu ame da labe gi Ebe Eho meedaha bak lam vafozi aba aho meedam bak lam fa fetehesu im feàna vi meeda tame. 13 Labi uho Eba na im uho ozohona gagom di uho Eba tu vuzehi vou ali ahu vàmadi meedàmù Eho ame bak mode tame. 'Em Ai abo feàte,' laham bak lam damat biem bake modi fa tombali damat ozobohudem bake Eho Am Adat nibet labihada tame. 14 Abo uho Eba na im uho ozohona ahebu gagom di uho Eba tu vuzehi vou ali ahu vàmadi meedàmù Eho ame bak mode tame," lahame ab vameadaham. 15 Labi im lada lam vameadume neàdi Yesusat Aba vi tau meedam dam laba neo nehame vi vameada. "Meit Eba deeli meedameam làhà ame da labe gi Ebe Eho aba neha, 'Im nehazu meedale,' lahame Eho gagu esuhu im zi ahebu lam ame da labe laha meedam tadem bak. 16 Labiham labe Eho Em Ai bake gagu Aho fa Eba ot vai Uba Taumda amomoi abo uba tau abehandemda uba nom olu tame. 17 Eho etei neha, 'Uba Taumda ehete,' lahame gagoho bak lam gi Alam Aha Nutabe Neànat uba tau abehandem bak uba gagoho bak. Ame Da lam, 'Ala akatihu meedam Alat modela?' laham im imbona lam meia modi ozobohudi fi gatemda Am am bak. Damat Eba tu vuzehete vab dam labe ba Uba Taumda laba deeli tu vuzehem vabiem bak. Neham labe labihaha bak. Ame dam labe, 'Ame Da lam akatihu meedam Dàt modela?' laham bak lam vi ozome ozobohudehe vab labe ba Aba deeli tu vuzehem vabiem bak. Lahana ame Da labe Aho uba vou ali ahu vàmadi meedam labe umota Am ozobohu bak. Labi laha Aho ba uba modi um ahu ad laba vizi gi labaha bohu vou modesdalo modem bak. Ba um vou esmom vabak. 18 Em ba um dumdamali vou esmolo modem vabak. Em fa neo uba lem bak. 19 Kehàm vaba dam bakda Eba tu vuzehem vab dam labe Em alihi ba aam kaio. Lahana umota Em alihi ba vi aam bak. Labi Em eloho bak labet Alat modi fa ahedi usahemu um laha gi ba ame baket ulohona neo meedam bak. 20 Uho Em alihi vi aame novalo modem digat labe uho im nehazu ozobohudi fi gatem digat am bak. Eho Em Ai bake vou ali ahu vàmadi meedam bak ame. Labi uho Emti ot vou ali ot vou aliame ahu vàmadi meedam bak ame. Lahame uho labihazu um ba fi gatei ozobohude tame. 21 Ebe Eho, 'Im nehazu meedale,' lahame gagu esuhu im zi lam meit aime ule neàt vuzehi meedam dam lam Eba deelem dam am bak. Labi Eba deelem dam lam Em Em Aiti fa neo ame dam laba deelem bak. Labi, 'Em ana Dàt modela?' laham bak lam Eho ame dam lam laha modi ozobohudi dam lam fi gate tame." 22 Lahame labi gagoha Yudasam ee fatahivahada Yudas meida labe aho Yesus bake neo ab vi ailo gagoham. "Ai Boehàda oa, 'Om Alat Gagù Fihasi Vimteme Oluhu Dat Boehàda Om am tame,' laham bak lam Om akatihu meedam dam bakda totbaho bake modi ozobohudi fi gatelo modem vaba gi imota modi ozobohudi fi gatelo mode?" 23 Lahame labi gagoha Yesusat fa gago, "Meit Eba deeli meedameam làhà ame da labe ba Ebe Eho vahokedam im lam voom vaba abo aime tu vuzehi meedam bak. Labihadam dam lam Em Aiat deelem dam am bak. Dam labihazu meedam dam lam Em Em Aiti fa ame dam laba vahi vou ali ahu vàmadi abehandem tame. 24 Meit Eba deeli meedam vabameam làhà ame da labe ba Ebe Eho vahokedam im lam ba tu vuzehi meedam vabak. Gi voedam bak tadem bak. Uho mahate vi ozodale. Eho uba vahokedam im nim ba gi Ehemu ozome uba vahokedam imot modem vabak. Abo gi Em Aiat Eba gagu oluhuda labe Aho Am im Eba gagu Eho ot vai uba fa vahokedam bak. 25 Eho etei uba lab vameadaha im zi lam Em uba tau azihi lahasuhu di nibe Eho ahit uba vameadam bak. 26 Lahana ba Em Aiat Eba ot vai Uba Taumda abo Am Aha Nutabe Neàna lam uba olu tame. Uba Taumda labe lehezobe Ebe Eho amu uba lab vameadaha im lam ahebu Aho fa uba modi uho fa vi ozobohudeda tame. Labi laha, 'Ala akatihu meedam Alat modela?' laham im imbona lam Eho uba lab vahokedahana uho ozobohudem biem zoho ahebu lam Aho uba laha vahokeda tame. 27 Em etei bak nim vou esmolo



modemu Em Em Ai Alati vahem bak laba ozome, 'Uba modi uho laha ame baket modese,' lahame Eho it vameame esmolo modem bak. Lahana Ebe Eho uba modi uho Alati vahem bak lam ba dam bakda ibi iho ahobat neàdi teohe ot deeliame ot vahiam bakti uloho kaio. Ebe Eho meedamda lam ba setem vabna abo gi labaha ot deeliame ot vahiam bohu vuusdam bak. Labiham bake um bisi ahu vi ozom bohu a meedamule. Um bisi a ahu faidi vi ozodamule. Labi laha um ahu a na iedemoholi meedamule. 28 Eho neha, 'Eho um vou esmozi Em Ai bake le fa neo uba le tame,' lahame Eho amu vameadaha bak lam um aihina taia? Eho etei uba neha, 'Em Ai bake fa la tame,' lahame lab gagoho bak lam uho Eba deelemta um ba Eho lab gagoho bak lam uho aime um ahu ba faidem vabak. Um gi deelem bak. Neham labe labiham bak. Em Ai labe Am feà bak lam Em vafozi Am bisi feà labe Eho Aba fa lehezobe Aho Eba neo modi Em ee vousai fa feà Dateli meedam labe fa neo uba laha neà bak vi meedam labe um deelem bak am bak. 29 Eho etei lab vameadaha im lam ba imbodehezobe, 'Uho Eba tu vuzehi meedam bak lam vi dualese,' laham bak ozome ame bak lam modehe vab di nibe uba ahit nasi fet vameadam bak. 30 Eho etei umti vahi im vameadam bak nim ba labaha bohu vameadalo modem vabak. Gi etei vi vameadume novalo modem bak. Dam bakda Ala bake fakemoholehe dam vuusdam boehàda abo Iblis lam Eba lefulo modemna ozomomna modemu uba ab vameadume novalo modemam bak. Lahana ame da Iblis lam ba im dedateli, 'Im abada meedale,' lahame Eba im gagom bak ba na vabak. 31 Lahana, 'Eho Em Ai bake deelem bak lam dam bakda ahebu ozobohudese,' laham bak laba ozome Eho ahit Em Aiat Eba, 'Im nehasu meedale,' lahame gagu esuhu im lam ahebu ulohodesu meedam bak. Neàde. Nasi usnadale. Imo nasi ladase," lahame Yesusat Aba vi tau meedam dam laba gagu neàdi ab usnadume ladamam.

15:1 Labi Yesus Aba vi tau meedam dam lamti iho vahi ladam labe Aho neo Aba vi tau meedam dam laba im nehasu vou vamea lada. "Em abo Anggur Labe Am So Aaboso Bisi Imboda Em am bak. Labi ame Lobaso lam aasu vabiedamda Em Ai am bak. 2 Labi Aho aameam Eho aasoalehe mekehà aaso lam oo vàmum vabda aameam gi fi kbodume voedam bak. Lahana mekehà aaso oo niz eheda lam Em Aiat ozo, 'Ame aaso nim oo niz neo vi dualedase,' lahame ozodam labe fai bak vi veimodam bak. 3 Umota fai bak veimodume neàbodedaha bak. Eho uba lab vameadaha im lam uho tu vuzehihe labe labihaha bak. 4 Uho Emti vahi vou ali ahu vàmadi bohu meedale. Labi Eho laha umti vahi fa vou ali ahu vàmadi bohu meedase. Neham bak. Ame aaso lam ame lobaso laba agmousuhu bak labe agutemeam làhà ba ame lobaso vaksa lam vule ooaelem vabilem bak. Gi ame lobaso lam agmousuhu bak labe agutem vaba zisdam bak lahasdameam làhà am vaksa vule oo niziledam bak. Um laha Emti vahi vou ali ahu vàmadi bohu meedam vabameam làhà ba oo vaedam vabak. Gi Emti vahi vou ali ahu vàmadi bohu meedam labe oo vaedam bak. 5 Ame Anggur So Aaboso Em am bak. Labi Em mekehà aaso lam um am bak. Meit Emti vahi ot vou ali ot vou aliame ahu vàmadi bohu meedameam làhà ame bak labet modi ame da labe oo duana vaedam bak am tame. Uho gi Emti vahi vou ali ahu vàmadehe bohu meedam labe labiham bak. Lahana Eho uba taum bak lam uho Emti vaiteameam làhà um ba na im modem bak vabak. 6 Meit Emti vahi vou ali ahu vàmadehe bohu meedam vabameam làhà ame da lam gi mekehà aaso oo valem vabamu ame lobaso deda labe Aho fi kbodume vou futoi voedume vaheme dehali dam na meedam dam labe fa visomoame vua laba voedume vahudamda lamti uloho bak. 7 Uho Emti vou ali ahu vàmadi bohu vuusu meeda. Labi Ebe Eho vahokedam im lam uho laha aime neo tu vuzehi meedam bohu vuusu meeda. Uho labihasu meedameam làhà na im uho ozohona ahebu Em Ai bake gagodale. Labi Aho ame na uba lodam bak. 8 Uho oo duana vaedam labe Em Ai labe Am feà bak lam modi tombali damat ozobohudi Am ee vousai vou baedam bak am bak. Labi laha uho lab meedam bak labet modi damat aame ozo, 'Um abo imbona Eba tu vuzehi vi tau meedam dam um am bak,' laham bak lam ab

modi ozobohudemam bak. 9 Em Aiat Eba deeli meedam bakti ulohona Eho uba laha deeli meedam bak. Eho uba deeli meedam bak lam um fa vabiemna zohàme uho Emti vahi vou ali ahu vàmadi meedume abehamdi bohu vuusdale. 10 Em Aiat neha, 'Im nehasu meedale,' lahame gagu esuhu im zi lam Eho aime tu vuzehi meedam labe Aho Eba deeli meedam bak lam Em ba biem vaba abo ozobohudem bohu meedam bak. Uho gi ame bak lamti ulohona im nehasu meedale. Ebe Eho uba, 'Im nehasu meedale,' lahame gagu esuhu im zi lam uho aime tu vuzehi meedameam làhà Eho uba deeli meedam bak lam um ba biem vaba gi abo ozobohudem bohu meedam bak. 11 Ebe Eho Em Aiat gagoho bak lam meedam labe Em deelehe bak. Labi, 'Uho laha Ebe Eho gagoho bak laba tu vuzehi meedam labe um laha deelese,' lahame Eho amu vameadaha im zi lam vi ozome uba vameadam bak. Imbote. Uho abo deelem aabo deelem bake Eho ame im zi uba vameadaha bak. 12 Eho uba, 'Im nidi nim modele,' lahame gagu esulo modem im gi neha: Ebe Eho uba deeli meedam bak lamti ulohona uho laha ame baket meia ot deeli ot deelidale. 13 Meit anti vahi vou alemda lam meit neha, 'Otese,' lahame gagom di, 'Fà eba beose,' lahame ahamo uledi ot vai elomda lam bisi meia deelem bak modi tombalem da am bak. 14 Ebe Eho uba, 'Im nehasu meedale,' lahame gagu esuhu im zi lam uho aime tu vuzehi meedameam làhà Eho abo umti vahi vou ali ahu vàmadem dam um am bak. 15 Eho etei uba lab gagoho bak lam um aihe? Em ba uba neha, 'Em na teo meedam dam,' lahame ba neo uba vi gagodam vabak. Lab gagoho bak lam seti Em gi uba, 'Em umti vahi vou ali ahu vàmadem dam,' lahadam bak. Neham labe labihaha bak. Meit aba im gagu modiam boehàda labe ahamo am ahulat ozome ba meedalo modem im lam am na teo meedamda lam gi biem bak. Lahana umota ba mei na teo meedam dam lamti uloho vabak. Em Aiat Eba gagohona ahebu Eho uba ahate fi desi vameadam labe um ozobohu bak. Labiham labe Em gi uba, 'Emti vahi vou alem dam,' lahadam bak. 16 Ba uho amu nasi Eba neha, 'Im Omti vahi vou alese,' lahame ozome um Em damalehe vabak. Gi Eho amu nasi, 'Um Emti vahi vou alese,' lahame um vame Emti vou alehe bak. Uho Eba tu vuzehi meedàmum Eho um oudume, 'Im Ebeda vou vameatedam labe modi oo vaedam bak lamti ulohona ame dam labe fa neo Eba tu vuzehi bohu vuusdase,' lahame Eho um oudaha bak. Uho labihamta uho ozome modelo modem im lam abo im mei im meime ahebu Em Ai bake gagom di Em Aiat ame bak lam uledi modem bak. Uho Eba tu vuzehi vou ali ahu vàmadi meedàmum Em Aiat ame bak mode tame. 17 Ebe Eho uba, 'Im nidi nim modele,' lahame gagu esulo modem im lam neo uba vi gagolo. Meia mahate ot deeli ot deeliame meedale," lahame ab gagu esuham. 18 Im lada lam vameadume nèadi Yesusat im nidi nim neo susulo vameada. "Dam bakda Eba tu vuzehe vab dam labe uba faki moudameam làhà a àvodemule. Gi im nidi nim vi ozome ozobohudele. Ame dam labe ibi iho lab meia faki moudam bak lam amu nasi Eba modehe bak. Uba gi ba faki moudam bak. 19 Eho etei uba lab gagoho bak lam uba nehi vouhodase. Dam bakda totbaho labe Eba tu vuzehe vab dam lamti uho vahi vou ali ahu vàmadi meedamta ame dam labe gi uba deelem bak. Uho amedamalehe labe labiham bak. Lahana ba labiham vabak. Eho dam bakda lam ahit fàsi totbaho voou umota fi hasi vame Em damalehe bak. Labiha labe ame dam labe uba faki mom tadehe bak. 20 Eho amu uba vahokedaha im nidi nim vi ozome ozobohudele. 'Mei na meedamda labe aho ba aba im gagu modiamda laba ba vafozi feà datelem vabak,' lahaha bak lam vi ozome ozobohudele. Em abo uba im gagu meedamda ààmomda Em am bak. Labi um Em im meedam dam um am bak. Labihàmum uho a nehi ozomule. 'Dam gi Emota fai bak duana vabidume umota vekehe tiba,' laham bak lam a ozomule. Neham bak laha ozodale. Ebe Eho vahokedaha im laba tu vuzehi meedam dam ehelemeam làhà im ubu uho ba vahokedamda lam damat laha neo tu vuzehi meedam dam ehe bak. Lahana damat Eba vabidam labe Eho geàdameam làhà damat uba laha neo gi ame baket vabidume geàda tame. 21 Eba Gaguh Oluhuda lam ame dam labe biehe labe uho Eba tu vuzehi vou ali ahu vàmadi meedàmum ame dam labe uba labihadam bak. 22 Dam bakda

totbaho labe Eba tu vuzehe vab dam laba Eho amu li Em Aiam im vameadam vabaemta làhà damat ibi iho faina meedaha bak lam Eho ba neha, 'Uho Em Ai bake faina modeho,' lahame ba vèlu gagom vabiem bak. Lahana Eho li vameame damat aime vèhàdehemu ame dam labe ibi iho faina meedaha bak lam ame dam lam ba, 'Iho vabili meedaho,' lahame ba veibame gagom biem bak. 23 Meit Eba faki momeam làhà ame da labe laha Em Ai bake faki moho bak. 24 Ame dam dua bak aasdahit na damat ihimo modem biem im feàna lam dam amomoi amu modehe vab labe Ehemò alimeat modehe bak lam damat ab aadume vèhàdeham bak. Eho ame bak lam modem vabaemta làhà Eho ba ame dam laba, 'Uho faina modeho,' lahame ba vèlu gagom vabiem bak. Lahana na damat modem biem im feàna lam Ebe Eho meedaha im zi lam damat etei nim aahanàme vedi Em Em Aiti im ahime faki moho bak. 25 Lahana gi labihasum neàte. Ba àvodem imot modem vabak. Alat Vameadaha Im Toedahana zi lam abo ame dam labe ibi iho tuhu Alam im lam dam labe ibi iho lab faki moho bak lamti ulohona fet nehi toeme esuhu im ehe bak. 'Ame dam labe Eba fakehe bak lam gi im debu vabnàme Eba ozahit faki moho bak.' Lahame ame fet toeme esuhu im lam imbodelo modemu damat labihaha bak. Labihàmù ame dam labe ibi iho faki moho bak lam ba àvodem imot modem vabak. 26 Uba Taumda Em Aiat lolo modemda lam abo Eho asum ahoba iuba le it olulo modemda abo Em Ai labet li dam bake neha, 'Ala akatihuasu meedam Alat modela?' laham im imbona meia modi ozobohudi fi gatemda lam abo Alam Aha Nutabe Neàna labe Aho lehezobe, 'Em akatihuasu meedam Dàt modela?' laham bak lam Aho dam bake ahate vameadume dam ozobohudem bak meeda tame. 27 Lahana Ebe Eho meedam im lam ame Da labe Ahamo dam bake ahate vameadam vabak. Um laha ba labihada tame. Eho alimeat faasi vou meedume etei vou fuhu bak nim ahebu uho ab aadam tadeham bak. Labiham labe um laha, 'Em akatihuasu meedam Dàt modela?' laham bak lam uho dam bake laha ahate vou vameateda tame."

16:1 "Ebe Eho uba neha, 'Dam bak damat uba faki mo tame,' lahame Eho etei nib vameadam im zi nim imbodehe vab di nibe uba ahit nasi fet vameadam bak. Ba imbodi damat uba vabidam bak laba um àvodi ubu uho Eba lab tu vuzehehe bak lam voom bak labna zohème vou faovoi uba etei vameadam bak. 2 Neham bak ehete. Ame Yahudi damat ihimo fi hasi bakamta vahi Alat vameadaha im ahamda dogoit aidam bakti im meiti meedam num lam naedamat uba mali ootedume um usname ili tame. Gi im lada lamota uba meedam vabak. Damat uba li oddam bak lam laha ba faa tame. Uba otelo modem dam labe vedi neha, 'Alat iba gagoho imot modem bak,' lahame ozodam labe uba li oddam bak. 3 Ame dam labe Em Em Aiti vahi vou ali ahu vàmadehe vab labe uba labihada tame. 4 Labi Yesusat neo vi susulo vameada. "Ebe Eho etei uba nib vameadam im nim uho ahamte alimeat faasi Eba vi tau meedaha di lam ame im uba vameadaha vabak. Labi laha um Emti vahi godam lahasuhemu ame im nim uba nasi vameadaha vabak. 5 Lahana Em etei nim um vou esmozi Eba gagu oluhuda Em Ai bake fa lalo modem bak. Lahana akati um meida vàmteavat Eba neha, 'Ne, Om ake lalo modela?' lahame Eba vi gagu aim vaba mode? Em ahu faidi ozodala. Um ame bak lam vi aime ozobohudelo àhàkemda vaba? 6 Uho vedi gi Eho lab lalo gagoho bak laba vi ozome bisi ahu faidi daleàdi meeda. 7 Lahana im imboda nidi nim laha iademe vi aimale. Em gi uho ba neàdem bake vi ozome lalo meedam bak. Eho lam vaba gi uba niba tau aidam lahasumeam làhà Uba Taumda bak niba uba ba lem vabak. Lahana Em lam labe ame Da lam Eho fa uba it olum bak. 8 Uba Taumda lehezobe Aho dam bakdate Eba tu vuzehe vab dam labe im ahu laba im nehasu ahate modi tombali it ozobohudi fi gate tame. 'Iho faina meedam dam im ame?' Labi, 'Ibi iho imbo tiba ozome im vamdesu meedam bak lamti labi Alat Aba Aho ozoho bak lamti uloho kaio. Bisi im vamdesu meedam bak neam tame,' lahame it ozobohudem bak ame. Labi laha, 'Ibi iho faina meedam bak lam Alat ba gi aalahigeàmom vaba abo, "Beose," lahame na asimbuna

feà iba modem bak,' lahame it ozobohudem bak ame. Labihasu ahate modi tombali it ozobohude tame. 9 Uba Taumda lehezobe Aho dam bakda Eba tu vuzehi meedaha vab dam labe, 'Tho faina meedam dam im ame?' lahame im ahu laba modi naedamat it ozobohudi fi gate tame. 10 Labi Eho fa Em Ai bake le seti um ba Em alihi aaha vab labet Aho fa Eba ot vai dam bakdate modi vizi, 'Ibi iho imbo tiba ozome im vamdesu meedam bak lamti Alat ozoho bak lamti uloho kaio. Bisi im vamdesu meedam bak neame?' lahame modi ahate tombali naedamat it ozobohude tame. 11 Labi laha dam bakda labe Eba tu vuzehi vab dam laba vuusdam boehàda Iblis lam Alat gi amu di iube, 'Beose,' lahame fet gagu vàmadi ahumdi esuhu bak. Labiham labe Uba Taumda lehezobe Aho dam Iblisit meedaha bak vi tau meedam dam laba Aho modi vizi, 'Alat iba laha, "Beose," lahame na asimbuna feà iba mode tame,' lahame modi ahate tombali naedamat it ozobohude tame. Uba Taumda labe Aho im labihasu meeda tame. 12 Em etei nim im uba vameadalo modem im abo duate. Lahana Eho ozoha, uho vi aime ozobohudem vabna zohàme etei nim ame im uba vameadam vabili mozo. 13 Lahana Uba Taumda abo, 'Ala akatihasu meedam Alat modela?' laham im imbona meia modi ozobohudemda Aho lehezobe ba Aba Ahamo ozoho im laba vi ozome uba vameadam vabak. Gi Ebe Eho vameadahana aime ot vai gi im lamota uba vameadam bak. Labiha labe, 'Em akatihasu meedam Dàt modela?' laham im imbona ahebu lam Aho uba modi um ozobohudi fi gateda tame. Labi ba diamut modem im lam laha uba nasi fet vameadume um ozobohude tame. 14 Na im ahebu Em Aiat vuusdamna lam Em laha tau vuusda. Ame bak lam Em ozobohudehemu Eho uba gi nehi vameada. Eho, 'Uba fi desi im vameadase,' laham im lam Alam Aha Nutabe Neàna lam abo Uba Taumda labe Aho gi Ebe Eho vameadahana ahum ve uba fa vameadume um ozobohudedda. Labihadam labe Aho modi damat ozobohudi ee Ebeda vousai, 'Em abo feàda am bak,' lahame vou baeda tame," lahame Yesusat ab vameadaham. 16 Labi Yesusat neo susulo vi vameada. "Em kehàm vaba le seti um Em alihi ba vi aam vabak. Lahana neo kehàm vaba uho fa neo Em alihi aa tame." 17 Lahahat Aba vi tau meedam dam totbaho labe ihimo ot gagoida. "Uho ozom, Yesusat etei neha, 'Em kehàm vaba le seti um Em alihi ba vi aam vabak. Lahana neo kehàm vaba uho fa neo Em alihi aa tame,' lahame lab gagoho bak lam akati modelo modem im iba labi gagohela? Labi laha Aho neha, 'Em Ai bake fa lalo mozo,' lahame lab gagoho bak lam akati modelo modem im iba labi gagohela?" 18 Lahame labi ot gagoi ot gagoidam labe meit neha, "Etei Yesusat neha, 'Kehàm vabna,' lahame lab gagoho bak lam uho ozom, akatihasu modem bake gagohela? Im ozom biem im gagoho taia?" lahame meit gago. Meit gago. Lahada. 19 Labihadume modeha Yesusat Ahamo ozo, "Dam lam Eho gagoho im vabili Eba vi ailo àhàki ot gagoida taia?" lahame Ahamo ozobohudi ame dam laba ab gagoham. "Eho amu neha, 'Em kehàm vaba le seti um Em alihi ba vi aam vabak. Lahana neo kehàm vaba uho fa neo Em alihi aa tame,' lahame Eho lab gagoho bak lam um vi ozom vabili ot gagoida? 20 Lànhà im lada lam imbomu im imboda nidi nim laha nasi iademe aima. Damat Em oteme elohozobe umota ahu faidi nimidam labe meb daeti im vameada tame. Lahana dam bakda totbaho Eba tu vuzehi vab dam labe gi deeli vi tozodam labe etoeda tame. Um ahu faidi medaomta medao. Lahana Em alihi fa vi aahazobe um ahu fa neàdi deeli vànhàdem bak. 21 Ubu uho ba deeli vànhàdem bak gi neham bakti uloho bak. Lahi data faam bak fuhemu vàzbudam labe kikezi geàda. Lahana ame data lam faasi neàdi ozo, 'Em data nim faasi bak niba ab azihame?' lahame ozohemu aba amu kikezi geàdam bak lam ba it ozom vaba gi ab deelehe vànhàdeham bak. 22 Um laha labihalo modem bak. Etei di nimota um ahu faidi vi ozoda. Lahana Em eloho bak labet Alat modi fa ahedi usai neàdehezobe Eho uba vi aa tame. Labi uho ba Em alihi vi aameam um ahu fa neàdi gi deelehe bohu vuusdam bak. Ba meit ubu uho lab deelehe bak lam modi vànhàdeme setem vabak. 23 Em eloho bak labet Alat modi fa ahedi usai tom ilu neàdehe di labe uho ba Eba neha, 'Im nidi nim akatiha? Im iudu ium akatiha?' lahame ba Eba vi ailo gagodam vabak. Uba Taumda li ot

vai vameadam labe ba Eba vi ailo gagodam vabak. Im lada lam imbomu im imboda nidi nim laha nasi iademe aima. Uho Em Ai bake na im uho ozohona ahebu gagom di uho Eba tu vuzehi vou ali ahu vàmadi meedàmú Aho ame bak uba mode tame. 24 Amu di iube uho ahamte Eba vi tau meedaha di iube faasi vou mode ledume etei vou fuhu di nim uho Eba lab tu vuzehi vou ali ahu vàmadi meedam labet Em Ai bake gagoho bak ba na vabak. Lahana nasi etei di nibe faasi Ai bake gagodale. Labihamta uho ame na modem bak lam uho ab vamam bak. Uho deelehe v`h`adem bake labihadale," lahame Yesusat ab vameadaham. 25 Yesusat neo vi susulo vameada. "Eho etei uba lab vameadaha im lam gi im totobet fi koadamna damat taho ozobohudem biemna uba vameadaha bak. Lahana gi koena faobe Em Aiam im uba ba vameadam di gi im totobet fi koadam vaba gi tomba ne`at` ahate uba vameada tame. 26 Ame di lam na im uho ozohona lam ahebu uho Eba tu vuzehi vou ali ahu vàmadi meedam labet um gi Em Ai bake gagodam tade tame. Uho neha, 'Em abo Alat Gagu Fihasi Vimteme Oluhu Dat Boeh`ada am tame,' lahame Eba deeli tu vuzehi gagodam labe Em Aiat Ahamo fa uba deeli meedam bak. Labiha labe na im uho ozohona lam ba Eho uba tau Ai bake gagodam vabak. Uhumo Ai bake lafusi vàmadi gagodahana ozomom bak. 28 Em Ai labet bak niba lehe bak. Labi etei nim Em neo bak nim vou esmozi fa Em Ai bake lalo modem bak." 29 Lahame labi gagoha Aba vi tau meedam dam labe im Abada mahate ozobohudehe vabna gi ostame fa ab vi gagoham. "Ai oa, Oho etei lab gagoho bak lam im totobet fi koadaha vaba gi ahate tomba ne`at` vameadam labe im gi ab aime ozobohudedamam tame. 30 Iho Oba vi ailo gagolo modem im ehe di lam Oba gagoho vabna Ohomo nasi ozobohudi fa iba gagod`amu` iho ozoha, na im Obo Oho iba vameadamna ahebu Om gi im dedateli vameadamda Om am bak. Damat Oba vi ailo gagom im gi feidam ne`ate`. Om labihadam D`at` modemu iho gi neha, 'Om abo Ala labet niba lehe D`at` moz,' lahame tu vuzehi gagodam bak." 31 Lahahat Yesusat fa gago, "Oo l`ah`! Um gi etei Eba ab tu vuzehi aabodehame? 32 Lahana im imboda nidi nim nasi aima. Keh`am` vaba um gi Em vou esmozi fi goaitoi fa um num bake ahala ilime sedda tame. Ame bak lam gi ab vou fuham bak. Lahana Eho ozohat Em ba `avodem` vabak. Abo Ehemmo v`am`tea tousdam vabak. Em Ai etei Emti nib bak. 33 Eho etei uba lab vameadaha im zi lam ahebu uho Emti vahi vou ali ahu vàmadi meedam labet modi um ahu ba fi goaitoho vaba vabademsu modesdam bake Eho ahit labihasu vameadam bak. Uho fa dam bakda totbaho labe Ala bake fakemoholehe damti vazisi bak niba esdam lahasuhu di nim naat uba vabidume uho ge`adam` bak ehete. Lahana dam bakda labe Ala bake fakemoholehe dam laba Eho vafozì meodeho. Labih`amu` naat uba vabidume ge`adam` di um ahu a faidemule. Gi ahu teudi ke`atedele`," lahame Yesusat ab vameadaham.

17:1 Labi im zi lam Yesusat Aba vi tau meedam dam laba vameadume ne`adi` Ahamo vaitesu ohu vousai asum ahoba iuba tom aasu Am Ai Ala bake ab tom gagodamam. "Ai oa, Em ge`adume` elom di ab vou fuham tame. Em Om Adat nim bisi fe`a` bak lam damat biem bake Oho nasi modi ee Ebeda vousai damat f`a` ozobohudedase. Labi Eho ba modelo modem bak labet modi Eho fa neo Om bisi fe`a` bak lam damat biem bake Eho ee Oboda vousai damat f`a` neo ozobohudedase. 2 Eho gi neham bak ozome Oba labi gagoho bak. Oho neha, 'Dam nim vou aasdale,' lahame Oho Eba lu esuhu dam zi lamota, 'Eho modi dam lam fa Im ahimti vahi ahe ne`ana` bohu vuusdase,' laham bak laba ozome Obo Oho dam bakda ahebu vuusdam bak lam Oho Eba gagu Eho fa ot vai im dedateli bakda ahebu Eho vuusdam bak. 3 Ai oa, Om bisi Ala imboda v`am`tea Om am bak. Dam bakda labe iho ame bak laba tu vuzehi Omti vou ali ahu v`amadem` bak ame. Labi laha neo Eba ozodam di neha, 'Em abo Oho Gagu Fihasi Vimteme Oluhu Dat Boeh`ada Em am bak,' lahame tu vuzehi Emti laha vahi vou ali ahu v`amadem` bak ame. Labihasu meedameam l`ah` ame dam lamti Im ahimti vahi gi ahe ne`ana` bohu vuusdam bak am bak. 4 Oho Eba neha, 'Nehasu meedale,' lahame gagu oluhu im

lam ahebu Eho bak niba li ab meedume neàdeham bak. Eho labiha labe Om feà bak lam damat biem bake Eho ab modi fi zeam bitoham bak. 5 Labihàmù Eho Oba neha, 'Aia, Oho amu bak nimti asum iumti abo na ahebu meedaha vab di iube Emti Omti vahi bisi feà damali modesdam bak lam Oho nasi etei fa neo ame baket modi Em fa Oba le Omti ahili feà damali modesdase,' lahame Eho Oba labi tom gagodam bak." 6 "Ai oa, Eba tauhu dam nim abo Oho neha, 'Dam bakda zoho nim Oho vou aasdale,' lahame fi hasi Eba lu esuhu dam nim Eho, 'Om akatihasu meedam Alat modela?' laham bak lam dam nim biem bake Eho vahokedume damat ozobohudi fi gatehe bak. Gi Om damat modem bak. Lahana Oho Eba lu Eho im Oboda vahokedume dam lam ame im lam aime uledi tu vuzehi meedaha bak. 7 Labi etei nim Ebe Eho vuusu meedam im ahebu lam ba Ehemò meedam vabak. Gi Oho Eba modi vizehe labe Eho ame baket meedam bak. Laham bak lam dam nim etei ozobohu bak. 8 Abo Obo Oho Eba gagoho im zi lam Eho dam niba vameadume dam nim aime ozobohudedume ab fi gatedaham bak. Labihàmù Oho Eba gagu oluhu bak lamti labi Eho Oba labet bak niba lehe bak lamti dam nim ab ozobohu aabodeham bak. 9 Ai oa, Eba tauhu dam nim, 'Oho laha taule,' laham bak laba ozome Eho Oba tom gagodam bak. Eho etei di nibe bak niba esdam dam ahebu, 'Oho laha taule,' lahame ozome Oba tom gagodam vabak. Neham labe Eho Oba tom gagodam bak. Eho gi Oho neha, 'Dam nim Oho vou aasdale,' lahame Oho Eba lu esuhu dam lamota ozome Oba tom gagodam bak. Gi Om damat modem labe Eho Oba labi tom gagodam bak. 10 Eho modi Em damali vuusdam dam nim Oho laha Om damali Oho vuusda. Labi Oho modi Om damali vuusdam dam lam fa neo Eho Em damali Eho neo vuusda. Labi ee Ebeda vousai feà datelem bak lam dam giida biem bake Eba tauhu dam nibe Ebe Eho vahokedam im aime tu vuzehi ot vai meedam labet modi dam giida aame ozobohudedume ab fi gatedamam bak. 11 Ai oa, Em kehàm vaba Oba ab lelo modemam tame. Em bisi bak niba azibehamdem vabak. Lahana Eba vi tau meedam dam nim gi bak niba esdam lahasdam bak. Labihàmù Ai Bisi Neàbodeheda Vàmtea oa, Omti Emti vahi ot vou aliame vàmadi meedam bak lamti ulohona neo Eba vi tau meedam dam nibe ihimo neo im ahu ot vou ali ot vou aliame ahu vàmadi meedam bake Oho gi ame dam niba im nehasu meedale. 'Om akatihasu meedam Alat modela?' laham bak lam Oho amu Eba modi fi gatehena lam Eho neo dam Eba vi tau meedam dam niba modi neo vahokeme fi gatei neàdehe bak. Labihàmù Eho le setem di dam labe ibi iho tu vuzehi bak lam fa setemna zohàmè Oho Em dam niba modi gi ame baket keàtedi bohu vuusu meedam bak lam nasi modi esule. 12 Eho etei Eba tauhu dam nim bak niba tau aidam lahasdam di nibe, 'Om akatihasu meedam Alat modela?' laham bak lam Oho amu Eba modi fi gatehena Eho neo dam Eba vi tau meedam dam niba modi neo vahokeme fi gatehemu dam labe iho tu vuzehi bak lam Eho Em dam niba vou aasdam labet modi gi labaha keàtedi bohu vuusu meedaha bak. Eho ame baket meedam labe Em dam nim ba meida vàmteavat Eba vaitesu vooho vabak. Lahana gi Oho neha, 'Vua elum sutem gikina laba voou beodase,' lahame gagu ahumdi esuhudati gagom kaio. Ame da labe aho ba modem bak lam meit Alat Vameadaha Im Toedahana laba fet toeme esuhu im lam, 'Imbodese,' lahame da lada lamota vooho bak. 13 Ai oa, Em etei Oba ab lelo modemam bak. Lahana Eho amu Eba vi tau meedam dam niba vameadaha im zi lamti im bada zi nimti ame dam nibe, 'Nehasu meedase,' laham bak ozome Eho ahit Em dam nimti vahi bak niba ehe lahasuhu di nibe nehame vameadam bak. 'Obo Oho gagoho bak lam Eho meedam labe Em ahu it ozome deeli vàmàdem bak lamti ulohona Eba vi tau meedam dam nibe laha Ebe Eho gagoho bak laba tu vuzehi meedam labe Ebe Eho deeli vàmàdem bak lamti ulohona neo ame baket modese,' lahame Eho ahit ame im zi lam vameadam bak. 14 Ai oa, Obo Oho Eba vameadaha im zi lam Eho dam niba vameadume dam nim aime uledi vuzehi meedàmù dam bakda Eba tu vuzehi vab dam labe Em dam niba fakemoholi moho bak. Neham labe labihaha bak. Ebe Eho ame dam bakda lamti vahi vou ali ahu vàmadehe vabak lamti uloholi Eba

tauhu dam nim bak niba azim di ba ame dam lamti laha vahi vou ali ahu vàmadehe vabak. Labihahemu dam bakda labe Em dam niba fakemoholi moho bak. 15 Eho etei Oba lab tom gagodam bak lam, 'Eba tauhu dam nim Oho modi bak nim vou esmozi Oba tom vousai laitesse,' lahame ozome tom gagodam vabak. Gi, 'Iblisit bisi meoda vàmtea labe aho Em dam niba li beodam bake Oho vatohedase,' lahame Eho gi vou faovoi Oba labi tom gagodam bak. 16 Eho dam bakda Eba tu vuzehe vab dam lamti vahi vou ali ahu vàmadi meedam vabak lamti ulohona Eba tauhu dam nibe laha ba ame dam bakda lamti vahi vou ali ahu vàmadi meedam vabak. 17 Ai oa, 'Om akatihasu meedam Alat modela?' laham im Oboda lam Eho dam bakdate modi fi gatehe im zi lam gi imbo im am bak. Labiham labe im imbona Oboda lam Eho lab vameadaha bak labet Oho modi Em dam niba, 'Fà im Oboda meedase,' lahame gagu fi hasi esule. 18 Oho Eba gagu Eho bak niba li im Oboda meedaha bakti ulohona Eho neo Em dam niba gi ame baket neo vi meedam bak. 'Im Oboda vi meedale,' lahame Eho dam nim gagome fa dam bakda totbaho laba ab olulo meedamam bak. 19 Ai oa, 'Eba tauhu dam nibe ihimo im Obodata fi hasi abobo labaha bohu meedase,' laham bak laba ozome Ehemmo naedat ahit, 'Im Obodata meedase,' lahame nasi gagu fi hasi esuhu bak." 20 "Ai oa, Em gi Eba vi tau meedam dam nimota ozome Oba tom gagodam vabak. Gi ame dam nibe ba neo fa bak mei bak iuba le im Ebeda le vou vameatedume dam labe neo aidume fa Eba tu vuzehelo modem dam zi lamti ozome Oba fet nasi tom gagodam bak. 21 'Emti Omti ot vou aliame ahu vàmadi meedam bakti ulohona Oho modi fa dam labe ihimo fa ot vou aliame ahu vàmadi meedase,' laham bak laba ozome Oba labi tom gagodam bak. Labi Oho Eba bak niba gagu oluhu bak lam dam bakda totbaho labe biem bake Oho dam lam, 'Fà modi tu vuzehese,' laham bak laba ozome Eho Oba neha, 'Eba ba tu vuzehelo modem dam laba Oho modi fa Im ahim niba vou ali ahu vàmadi meedase,' lahame Eho Oba labi tom gagodam bak. 22 Oho amu Eba modi vizi teudehe labe Obo Oho gagoho im lam Eho meedaha bak. Ame bak lamti ulohona Eho neo ame dam laba, 'Im Obodati im Ebedati neo meedase,' lahame Eho dam laba ab modi vizi teudeham bak. Eho gi neham bak ozome labi meedaha bak. 'Emti Omti ot vou aliame ahu vàmadi meedam bakti ulohona Oho fa neo modi dam labe ihimo fa ot vou aliame ahu vàmadi meedase,' lahame ozoho labe labihaha bak. 23 Eho gi neham bak ozome Oba labi tom gagodam bak. Eho ame dam laba vou ali ahu vàmadi meeda. Labi neo Oho fa Eba laha vou ali ahu vàmadi meeda. Labihadam bak. Labihadam labe ame dam lam ihimo ot vou aliame ahu vàmadi vi meedam bohu vuusdam bak am. Labi Oho Eba gagu bak niba oluhu bak ame. Labi Oho Eba deeli meedam bakti ulohona fa ame dam laba neo ulohona deeli meedam bak ame. Labihasu dam bakda totbaho labe biem bake modi fa ozobohudem bak am tame. 24 Ai oa, Oho amu Eba neha, 'Dam nim Oho vou aasdale,' lahame Eba gagu lu esuhu dam lam Eho vi ozome im nehasu Oba tom gagodam bak. 'Ebe Eho ba le azim bak lam dam nim ame bak laba le vi tau azise. Labi Em feà bak aabo lam ame dam labe iho vi aame ozobohu aabodem bak am tame. Amu bak nimti ahebu meedaha vab di iube abo Emti Omti ahili esdam di iube Oho di labe faasi Eba deeli vou meedume etei vou fuhemu Oho Eba modi vizi feà datelehena am bak. Ame bak lam ame dam labe iho vi aame ozobohu aabodese,' lahame Oba tom gagodam bak. 25 Ai Bisi Im Ahole Vamdesu Meedamda oa, dam bakda Eba tu vuzehe vab dam labe, 'Om amat mode?' laham bak lam biem bake. Lahana Emota Om ozobohudi Omti vahi vou ali ahu vàmadi meedam bak. Labi laha Oho Eba gagu bak niba oluhu bak lam Eba tauhu dam nim ame bak lam ozobohu bak. 26 Obo Oho Eba deelehe bak lamti ulohona Oho fa neo Eba tauhu dam niba deelem bak ame. Labi Eho dam nimti vou ali ahu vàmadi meedam bak ame. 'Labihasu meedase,' lahame Eho, 'Om amat mode?' laham bak lam dam nim biem bake Eho ame dam niba modi ozobohudedume fi

gatedaha bak. Amu mode. Labi neo ame bak labe neo vi meedam bohu meeda tame." Lahame Yesusat ab tom gagodume neàdeham.

18:1 Labi Yesusat im labihasu tom gagodume neàdi iho Aba vi tau meedam dam nimti vahi kota Yerusalem vou esmozi ladume vao koena, "Kidron," laham vao bisuhu ohu labe ladume vao biou fa tot iuba zaitun dee dozeaha bak laba lafusi laba ab esdamam. 2 Esdam di labe Yudas abo Yesus etei vou fohome meia ub lolo modemda labe aho Yesus Aba vi tau meedam damti ibi iho etei laba li esdam bak lam am ozobohut. Amu di iube am laha Yesusti im Aba vi tau meedam dam totbahoti vahi laba tàhi odosdam meo bak. 3 Labiha labe Yudasat ozobohudi dam neham dam vihitoi ab vou ladamam. Amu damat Ala bake lomna ve vua vahudam toheda zi laba vuusu im vameame faheme modiam dam lamti Farisi dam lamti labihasu vazisi fa Yudas bake neha, "Yudas, oho Roma meo dam zi lamti labi ame Fihasi Ala Bake Vou Baedam Num Vàmteabu laba vou aasdam dam totbaho lamti labihasu oho dam nim vihitoi vou le dam nibe fà Yesus sise." Lànhamu Yudasat mod vihitoi ab vou ladamam. Nazoh meona zi vuusualadume afoezobe aibut ladam labe dam totbaho uma usime vuusualada. Labi dam totbaho minyak usime vuusualada. Labihadume ab vou ladamam. 4 Na im ahebu etei Aba modelo modem im zi lam Yesusat Am naedata ozobohu bak. Labiha labe aaha ame dam zi lam iba lefuhemu Yesusat nasi ub fetu duzu ame dam lab ledamda zi laba ab gut gagoham, "Um baka ama bake nabitàla?" 5 Lahahat ame dam labe fa gago, "Im gi Yesus Nazaretta alihi aalo vi nabitàlo." Lahame gagohat Yesusat fa gago, "Ne, Em ame Da neam tai." Yesus etei ahate gagoho bak lam Yudas Am vou fohome ub lolo modemda lam gi laba tau doudahit gagoho bak. 6 Labi Yesusat gi etei, "Em ame Da gi neam tai," lahame gagohoilahit dam zi lam bolat tom gaesu ab biddaham. 7 Labi biddume fa usnadume modeha Yesusat neo vi gago, "Um baka ama bake nabitàla?" Lahahat ame dam zi labe fa neo ab vi gagoham. "Im gi Yesus Nazaretta alihi aalo vi nabitam bak." 8 Lahahat Yesusat fa neo gago, "Um aim vaba? Eho amu uba ab gut gagoham taia? Em ame Da gi neam tai. Lànhà um Eba vi nabitàmum Eba vi tau meedam dam nim a vi tau simule. Gi olule." 9 (Yesusat etei lab gagoho bak lam Eho Yohanesat ozoha, gi Aba Aho amu fet neha, "Aia Oho Eba neha, 'Dam bakda nim Oho vou aasdale,' lahame fi hasi Eba lu esuhu dam nim Eho ba meida vàmtea setem vaba gi ahe neàt vuusu vou aasdam bak," lahame amu fet lab gagu esuhu bak lam, "Fà modi imbodese," lahame labi gagoho bak) 10 Labi Yesusat neha, "Gi olule," lahame gagoha Simon Petrusat udovai am ae goha dusuhuna vuu vihitoi Damat Ala Bake Lomna Ve Vua Vahudam Tohe Dam Zi Labe Bisi Boehàdatebo labe am na teo modemda lam beoha biou gi dogoi baa ahi totbahoda lam aet fu fatoi bake ab biteham. Ame na modemda am ee gagom Malkus laham bak. 11 Labi modeha Yesusat fa Petrus bake vi mali ab gagoham. "Om ae lam taho am goha fa dusule. Oho ozom, Em Aiat neha, 'Em geàdase,' lahame amu gagu ahumdi esuhu bak nim ba modem vaba gi moe? Ba labiham vabak. Abo imbodem bak," lahame Yesusat fa Petrus bake im ab vahokeham. 12 Labi ame Roma meo dam zi ame. Labi iba im gagu modiamda Boehàda ame. Labi ame Fihasi Ala Bake Vou Baedam Num Vàmteabu laba vou aasdam Yahudi dam totbaho ame. Labihasu Yesus si anekehà giame ab vou ladamam. 13 "Yesusat git modehe bak taho aime neàdi beose," laham bak laba ozome amu nasi Hanas bake ab vou laham. Ame da Hanas lam amu Damat Ala Bake Lomna Ve Vua Vahudam Tohe Dam Zi Labe Im Bisi Boehàdatebo am. Lahana etei faasi meedam tahun nim am doli Kayafas fa Boehàdatebo gànhàli meeda. Lahamda labe am bagaea Hanas bake Yesus nasi vou laha bak. 14 Ame da Kayafas lam im nehasu ame Yahudit Ibi Iho Modem Im Gagou Vàmadi Esum Dam Debu laba fet vameame esuhuda am. "Im Yahudi dam bisi ahe neàdem bake im dam dua bak beoho vaba gi dat vàmtea ot vai eloi setem neàte," lahame fet gagu esuhuda am. 15 Yesus si vou laom di labe Simon Petrusti labi em Yesus bake vi tau meedamda meida



vàmtea nimti im ahim vaitesu aa vi duzu vulada. Labi Tohe Dam Zi Labe Bisi Boehàdatebo labe am num feàda labe am ad oli aam bak tomba laba vi fusi modeha bak tomba laba modesuhu doo baabu laba vou aasdamda labe gut aaha Kayafas amu em ozobohu labe, "Olem neàte," lahame em ab lebohoteham. 16 Lahana dam lam Petrus biem labe aba gut malehemu Petrus gi doo bako tot laba duzu vou faoda. Labihàmu Kayafas lam emota ozobohu labe eho le aime neàdi fa li nam etei ame bak tomba modesuhu doo laba vou aasdam nam laba gago, "Petrus olem neàte. Boehàdatebo gagoha," lahame gagu neàdi eho futoi Petrus ve fa ab vou oleham. 17 Labi vou oli modeha ame doo vou aasdam nam labe Petrus bake gut aame ab gagoham. "Om laha damat etei sihida labe Aba vi tau meedamda meida om am taia?" Lahahat Petrus fa ab gagoham. "Vabà! Em ame da modem vabak." 18 Lahame ab tem veibaham. Labi ame di lam di nutabedehemu Boehàdatebo labe am na meedam dam totbaho lamti labi ame Fihasi Ala Bake Vou Baedam Num Vàmteabu laba vou aasdam dam lamti im nutahali vua gazihì modesuhu bak laba le dozeadume vuaga fi dda. Petrus laha vi tau duzu vuaga fi dda. 19 Labihadam di labe damat Yesus ame Boehàdatebo amuda laba ibi iho im meedam num feàda laba vou oli ame Boehàdatebo lamti ot avaesuiame duzu modeha Hanas labe Yesus bake ab gut gagoham. "Oba vi tau meedam dam labe im ee taho gagodamale. Labi Om dam laba baka Oho ana im vahokedàla?" 20 Lahahat Yesusat fa gago, "Ne, Eho vahokedam im ahate vahokedam labe dam ahebu ozobohu bak. Abo Yahudi damat ihimo fi hasi bakamta vahi Alat vameadaha im ahamda dogoit aidam bakti im meiti meedam num zi ahebu lam modeo, ame Fihasi Ala Bake Vou Baedam Num Vàmteabu labe am ad oli aam bak tomba laba modeo, gi Yahudi damat ihimo vazisi im vameadume baleàhà bak lam ahebu Eho vi tau im Ebeda ahate vahokedam bak. Ba dam totbaho bake vasti vameadaha vabak. 21 Oho akati bisi Eba vi ailo ootedà? Lahana uho gi dam iuba le aidam vaba? Dam lam Eho vameadaha im lam aidaha labe ozobohu bak." 22 Yesusat gi etei labi gagoha ame Num Vàmtea laba vou aasdamda meida labe ame im lam aihi bake faki Yesusam oode laba ab vi fu gagoham. "Baka Oho ozom, Tohe Dam Zi Labe Bisi Boehàdatebo laba Oho im labihasu fa gagom neào? Om ahu adat iedem vaba?" 23 Lahahat Yesusat fa gago, "Eho etei lab gagoho bak lam im giomimna oba gagom tàm. 'Em etei giomim oba gagoho,' lahamna oho etei ame bak lam taho eba gagoma. Lahana Eho etei gi im imbona vameadamna oho akati ozome Eba fohela?" 24 Lahame gagu neàdi Hanas labe damat Yesus si vou aasdamda zi laba ab gagoham. "Um nasi Yesus neo si vou duzu em doli Kayafas bake num oulabu zoho iuba neo vou lale." Lànhàmù Yesus Am anekèhà giaha bak lahasu neo si vou duzu Kayafas abo Tohe Dam Zi Labe Bisi Boehàdatebo laba ab vou ladamam. 25 Labi Simon Petrus gi duzu vuaga fi ddam lahasuhu di labe dam zohot li neha, "Om laha ame Da laba vi tau meedamda meida om am taia?" Lahahat Petrusat tem veibame gago, "Vabà! Em ame da modem kaio." 26 Lahame gagu kehàm vaba ame Tohe Dam Zi Labe Bisi Boehàdatebo labe am na teo meedamda meida lam abo Petrusat aet am dogoi fu fatohoda labe aba meida labe Petrus bake ab vi gagoham. "Ne, om gi etei iho zaitun dee dozeadaha laba Yesusti vahi esdam bak Em aaha bak." 27 Lahame vi gagoha Petrusat neo tem ab vi veibadamam. "Vabo. Em ame da modem kaio," lahame gi etei tem veibaha bak làteladeha kuk ab aauham. 28 Labi Kayafasat neo uloome aime neàdi, "Iho gubernur bake akatihasu gagom labe aho aime fa Yesus bake neo ulooela?" laham bak lam ozome ozobohudi neàdi neo dihambe aibubet ame Yahudi dam busaoda eeda zi lamti ame Roma meo dam zi lamti vazisi Yesus neo vou duzu Kayafas vou esmozi fa Roma dât gubernurleheda Pilatus bake ab vou laham. Ame di lam Gubernur Pilatus lam aho gi am im meedam num feàda laba teohe aida. Lahamda laba ab vou laham. Vou le ame meo dam zi labe iho Yesus ab vou oleham. Lahana ame Yahudi eeda zi labe ba ame num laba olem kai. Gi bàhàgo laba dozeada. Ibi iho vuusu meedume fi hasi baleàhà bak ehe labe ba Yahudi damat modem vab dam labe im numa ba olem biehe bak. Iho Yahudi damat ame num laba

olemeam làhà im gi ab vâhâdi faidemam bak. Labi vâhâdi faidemeam làhà im ba ame na àme iziam bak abo Paskah lam im ba vahi àm biem bak laba ozome num laba olem bak mu gi bàhàgo niba odoho bak. 29 Labihàmu Pilatus fa futoi dam bàhàgo dozeadaha dam niba im ab gut vameadamam. "Um da nim, 'Aho git modeho,' lahame vâlu gagodam bak akete? Uho eba nasi ggomale. Em aise." 30 Lahahat ame Yahudi eeda zi labe fa tombu gagoho vaba gi obet ab gagoham. "Da labe bisi faina git modehe vabna iho akati oba vou le ub loe? Bisi faina modehe bak ehe labe iho ab vou leham bak." 31 Lahahat Pilatus fa gago, "Da nim uho fa vale. Uho neha, 'Aho git modeho,' lahame vâlu gagoho bak laba ozome uho fa ve vou le ubu uho dat ahamda Musat toedume fi hasi esuhu Im Feàna zi lam meedume balehà bak labet modi uloome vi aime ozobohudi neàdi modele. Uho gagoho bak lam ba iba pemerintah bake git meedaha vabda Eho gagu beom bieho." Lahana ame Yahudi dam bake im vameame faheme modiam dam eeda zi labe Yesus otelo àhàki Pilatusat etei lab gagoho bak lam mu fa ab vi gagoham. "Dam ibida aham di iube gagu vou mode usehe im ahum lam Da nibe zidazehemu fa otem neà bak. Lahana um Roma pemerintah labe iba Yahudi dam bake neha, 'Mei git modehemu uho fa vatau otem neàte,' lahame gagu vâmadem dae iba gagoho vabak. Labihàmu ame Da lam iho fa ve vou le otem biem bak." 32 (Etei lab gagoho bak labet modi Yesus amu neha, "Damat Am nehasu oteme Am elo tame," lahame fet gagu esuhu im lam fa ab imbodelo modemam.) 33 Labi ame Yahudi ee dam labe etei lab gagoho bak lam Pilatusat vi aime neàdi fa ame num laba oli am meo dam gagome Yesus neo vuusu aho avaesdam laba ab vou duzham. Vou duzu neàdi ab gut gagoham. "Yahudi dam debu vuusu im vahokedam Boehàda Om ameo?" 34 Lahahat Yesusat fa ab vi gagoham. "Oho etei lab gagoho bak lam oho im nehasu vi ailo Eba labi gagohe? 'Em bakda Boehàdateboli fa dam bakda vuusu im vahokedamda am tame,' laham bak lam, 'Ehemo naedat gagoheo?' laham bak oho vi ailo mode? Laham vaba meit neha, 'Yesusat amu nehi gagoho. 'Iba Yahudi dam vuusu im vahokedam Boehàda Am am tame,' lahame gagoho bak iho aiho,' laham bak meit gagohona oho aime fa Eba vi ailo mode?" 35 Lahahat Pilatus fa gago, "Ne, Oho ozom, em Yahudi dât mode? Labi uho Yahudi damat modem im ehemo ozobohudi Oba gagodà? Ne, gi Om dam zohoti um Yahudi dam labe uho Ala bake lomna ve vua vahudam toheda zi laba vuusu im vameame faheme modiam dam lamti laham dam labe om si eho avaesdam niba vou lehe taia? Ne, Oho ana im modehe bake faidi dam lam Om si eba vou lehela?" 36 Lahahat Yesusat fa neo ab vi gagoham. "Eho Boehàdateboli dam vuusu im vahokedam bak lam ba bak damat Eba gagu meedam vabak. Ebe Eho Boehàdatebolehe bak amomoite. Em bak dât boehàdatebolehedam modemeam làhà damat Em sihi di lam dam Eba vi tau meedam dam labe fa Eba tau, 'Yesus a Yahudi dam bake ub lomule,' lahame ame Em sihi dam lamti ot belui ot beluiam bak. Lahana Ebe Eho Boehàdatebolehe bak lam ba bak dât modem bakti uloho vabak. Ebe bak amomoite." 37 Lahahat Pilatus neo vi gago, "Làhà Om abo Boehàdatebot modemna ozomo?" Lahahat Yesusat fa ab gagoham. "Lo, oho ozobohudi ab gagoham bak. Em Boehàdatebot modem bak. Eho, 'Ala akatihasu meedam Alat modela?' laham im imbona lam Eho dam bakdate ahate vameadume fi gatelo Eho ahit asum ahoba iube bak niba li Dateli faaha bak. Meit Ebe Eho lab vameadam im imbona laba tu vuzehi meedam dam lam laha nehame meedam bak. 'Em abo Alat Gagu Fihasi Vimtème Oluhu Dat Boehàda am tame,' lahame Eba tu vuzehi Em damali im Ebeda aime meedam bak." 38 Lahahat Pilatus fa neo vi gago, "Oho etei lab gagoho bak lam, 'Im imbona,' lahaha bak lam ana im imbona gagodàla? Baka im ekda nim im imbona ozobohudemna iho meia vahokedà?" Lahame ot gagoide neàdi Pilatus fa neo futoi Yahudi dam busaoda eeda zi bàhàgo laba odosdam dam laba ab gagoham. "Eho Da nim uloodume aiha, 'Iba pemerintah bake git modehe bak vâmtea ehete,' laham bak lam aihi vab labe ba eho gagu otem bieho. 39 Lahana um Yahudi dam labe ubu uho na àme iziam bak abo Paskah lam fum di um Yahudi dam amu si sel oumahehe

dam meida vàmteata, 'Vou futole,' lahame ame da ee gagohozobe eho gagu vou futoidume baleàhà bak ehe bak. Labihàmu eho etei dat adida gagu vou futoi uba oluela? Gi damat neha, 'Um Yahudi dam vuusdamda Boehàda am tame,' lahamda nim eho gagu uba isi olueo?" 40 Lahahat ame dam labe gi dae meot fa ab gagodamam. "Vabo. Im Da lada lam mohu. Gi Barabas iba isi olule," lahame ab gagodamam. (Ame da Barabas lam aba aho amu im nehazu meedaha dèt moz. Amti am Yahudi dam totbaho lamti iho vazisi kota Yerusalem niba li dam totbaho gagome fàsi fa Kaisarleheda labe am Roma damti, "Beose," lahame modi dae gai duzuhemu Roma meo dam labe si sel oumaheda meida am bak.)

19:1 Lànhamu Pilatusat ozo, "Ame Yahudi dam busaoda eeda zi labe Yesus modi itaholehe bak fà vi aame im ahu neàdem bake eho em meo dam gagome Yesus ve na sokba nasbe ahit alibulehena labe Aba foadume geàdume afoezobe isi oluse," laham bak ozome am meo dam gagome Yesus bake ame bak lam ab modeham. 2 Labi foadume neàdi loba ali vabome vuihàli neàdi Yesusam ohu laba neo nom usulo ab vi gago, "Nim gi Boehàdat am ohu nom usumnat modem bak," lahame gagu ab nom usuham. Labi neo sue sona boz gihona bohu abo Boehàdat ahoba dusum sue lamohoda ve Yesus bake nom dusu. 3 Labihadume neàdi ame meo dam labe iho neo ahit neà damali Yesus bake ab gagu tozoidamam. "Looo. Yahudi dam debu vuusu im vahokedam Boehàda abo neàtee," lahame vi tozome gagoda. Labi neo Am oode dogoi debu bak laba meit au baat vi fu tozo. Meit au baat vi fu tozo. Labihada. 4 Gi etei labihadam di labe Pilatus neo futoi ame Yahudi eeda zi bànhògo laba odosdam dam laba neo ab gagoham. "Um aimale. Eho da nim uloome aiha, 'Aho git modeho,' laham bak eba gagu em aihi vabamu eho ba gagu otem vabili fa vou futoi isi olulo mozo." 5 Lahame gagu modeha Yesus bake loba ali vabome vuihàlehena lam Am ohula nom usuhuna lamti labi Aba tozome Am soa dusuhu sue bohu lamti labihasu dusuhu bak lahasuhuna neo meo damat vou futoi modeha Pilatus ab gagoham. "Nasi aama. Ame Da neam." 6 Labi Yesus vou futoho bak lam ame toheda zi laba vuusu im vameame faheme modiam dam lamti ame Fihasi Ala Bake Vou Baedam Num Vàmteabu laba vou aasdam dam lamti iho Yesusam alihi aadàmdu dae meonat ab buteomam. "Neàdehooo. Ba a isi olumuleee. Gi oteleee. Om meo dam gagu taho ut tetehehunaso laba esu paku dodume eloleee. Gi taho modelee." Lahahat Pilatus mu fa gago, "Uhumo ve ut tetehehunaso laba esu paku dodume elole. Eho Da nim uloome aiha Aho faina modehe bak aihi vabna akati eho gagu ote?" 7 Lahahat ame Yahudi eeda zi labe teudi fa ab gagoham. "Vabà! Ba a labi gagomule. Da lam amu neha, 'Am Alam Adat am tame,' lahaha bak lam ibi iho fi ham bak Ahamo gagu vànhàdehe labe gi ab gagu otelo modemam bak. Meit neha, 'Em Alam Adat am tame,' lahame labi gagomeam lànhà gi gagu otem bak. Ba akati gi moe?" 8 "Yesus lam abo Alam Adat am tame," lahaha bak lam Pilatus aihemu, "Am ba akati damat tu vuusdam Ala labe Aho faahana Yesus lam Aho gagu ote?" lahame iedi feà bak ab fuham. 9 Lànhamu Pilatus neo ame meo dam gagome Yesus fa ame im meedam num feàda laba fa ab vou oleham. Labi aho neo vi tau oli Yesus bake neo vi ailo ab gagoham. "Om adi baket lehe dèt mode?" Lahame labi vi ailo gagoha Yesus ba dae bum kai. 10 Lànhamu Pilatus fa neo gago, "Om akati eba im gagom vaba gi daleàdi mode? Om ozom vaba? Em feàda im deda modem labe em meo dam laba gagu Om isi olueo? Laham vabameam gi em meo dam laba gagu Om paku dome eloeo. Lahamda em am bak." 11 Lahahat Yesusat fa gago, "Ne, Em Ai Alat oba modi feà datelem vabameam om ba dam bake neha, 'Em ote? Isi olueo?' laham bak lam ba im dedateli gagom vabak. Labiha labe neham bak. Dat dam bake gagu Em si oba vou li ub lohoda labe aba aho faina modem bak bisi duada am bak. Obo oho modeheda gi koete." 12 Lahame gagoho bak lam Pilatus aihemu aho amu fota mohobeat mali meedam bak lam fa olulo àhàki ab vi uledeham. "Em Yesus bake akatihasu gagu olue?" lahame di

labe ab faasi vi la ozoi le ozoidamam. "Yesus gi gago oluse," lahame ozodamda labe neo futoi, "Yahudi dam labe fa aba tause," lahame neo vi vameadaha ame Yahudi eeda zi labe mu vedi Pilatus bake vi buteom labe tozome vameada. "Ea, om Da nim isi olumeam làhà om ba dam ahebu vuusdam Kaisarleheda lamti vahi ahu vàmadi vou alem vab dât modem bak. Gi fa oba ozom di, 'Om gi aba fakemoholehe datelehe bak,' lahame ozom bak. Ne, ame Da nim, 'Aho boehàdateboleho,' lahame gagoho bak ehe bak. Labiham labe ame Da lam gi Kaisarleheda veiolo odosdam bak. Ne, oho ozom, ame Da niba taum nèà?" 13 Lahame gagoho bak lam Pilatus aihemu iedi aho neo am meo dam gagome Yesus fa vou futoi vou duzu nèadi Pilatus fa Tomba Vaheme Bâneàdehe Ke Baa laba le, "Iho Yesus bake akatihasu modela?" laham bak gago vàmadelo modem di nusumnabu laba ab nusuham. (Ame Tomba Vaheme Bâneàdehe Ke Baa lam Aram dae gagom di, "Gabata," lahame gagom bak.) 14 Etei nib meedam im nim gi ame na àme iziam bak abo Paskah labe am digat meida abo hari Jumat Yahudi damat ibi iho gi azibe im digat hari Sabat fulo vabaehe digat labe ala tomali jam dua belas fuseo vabalehe di labe meedaha imot modem bak. Di labe Pilatusat neo odohalehebeat ame Yahudi eeda zi laba tozolo ab gagoham. "Uba vuusdam boehàda gi ame Da neam tame." 15 Lahahat ame dam labe gi dae buduana buteom labe gagoda, "Vabooo. Vou laleee. Vou le ut tetehesuhunaso laba esu paku dodume eloleee." Lahame buteme vameadume modeha Pilatus fa gago, "Oo làhà! Um boehàda nim eho gago damat ve fa ut tetehesuhunaso laba esu paku dodume elom nèò?" Lahahat ame toheda zi laba vuusu im vameame faheme modiam dam labe fa gago, "Vabo. Baka im dam amomoi boehàdatebolehedavat ehe? Im boehàdatebo gi oba vuusdamda Kaisarleheda am bak. Im Da lam boehàdateboli iho vuusdam mohò." 16 Lahame labi gagohemu Pilatus aho vameadaha vanamahemu am gi mohet uledi, "Yahudi eeda zi labe ibi iho gagoho baket modi damat fà Yesus ve ut tetehesuhunaso laba esu paku dodume elose," lahame am meo dam lam gago ab oluham. Pilatus labi gagohemu am meo dam, "Ame baket meedase," lahame Yesus bake tet ooteme am esu dolo modem ut tetehesuhunaso lam gago Ahamo naedat vatu ab vou kea ladamam. 17 Labi lab vatu vou kea ladam di labe kota Yerusalem vou esmozi bàhàgo laba vou ladume Ohu Fetahabu laham bak laba ab vou fuham. Ame bak lam Aram dae gagom di, "Golgota," lahame gagom bak. 18 Ame bak laba vou fusi ame meo dam labe neo Yesusam sue ahoba dusuhuda lam ab vome vihilaham. Labi vihilame nèadi neo ame ut tetehesuhunaso lam visoi bake esu afoezobe Yesus tom gaesu nom esu nèadi Am anekèhà meida kidadesu paku do. Labi Am anekèhà meida neo kidadesu paku do. Labi Am naba bakamta modesu paku do. Labihadume nèadi vi vuu vousai bak bumata ab nom zisuham. Labi zisu teudi nèadi ut tetehesuhunaso meida ahim neo visoi dam faina meedam dam ahim lam vame Yesusat modehe bakti ulohona modi paku dodume nèadi Yesusam anekèhà ahi totti soi totti modesuhu laba bak bumata ab nom zisitdaham. 19 Labi meit aame ozo, "Da nim ana im modehe bake damat vâlù otehela?" lahame toehe ut gaheba lam Pilatusat am meo dam gagome toeme nèadi Yesusam ohu vazidazi toma zoho laba taasü paku vi dou esu. Ame ut gaheba laba im nehassu toe. "DA NIM YESUS NAZARETDA ABO YAHUDI DAM VUUSU IM VAHOKEDAM BOEHÀDA AM TAME," lahame Aram daeti Latin daeti Yunani daeti laham dae làtela labihassu toehe ut gaheba am. Labihàmü damat Yesus ut tetehesuhunaso laba paku dome zisuhu bak lam gi kota Yerusalem laba netàdi zisuhu labe Yahudi dam dua bak lebe aassu gagodume labohoti laida. 21 Labi Yahudi damat Ala bake lomna ve vua vahudam toheda zi laba vuusu im vameame faheme modiam dam labe laha ame ut gaheba laba toehe bak aahemu faki dam gagome Pilatus bake ab oluham. "Uho Pilatus bake le gagole. 'A, "Da nim abo Yahudi dam vuusu im vahokedam Boehàda am tame," lahaha bak lam a toemule. Iho ozoha, gi giomimot modem bak. Gi neha, "Ame Da labe Ahamo ozo, 'Em abo Yahudi dam vuusu im vahokedam Boehàda am tame,' " laham bak laba ozome toele,' laham im lam uho

Pilatus bake le gagole," lahame ab gagu oluham. 22 Labi gagu olu dam labe le gagoha Pilatus mu gago, "Vabo. Toeme vâhâdehe bak. Ba faatoi veimdem bieho. Eho lab gagu toehe bak lam ba veimdem vabak," lahame ab gagoham. 23 Labi ame meo dam labe Yesus paku dodume vousai zisu neàdi, "Am sue amu vihilame vahehena lam faheme vadase," lahame vameadume neàdi ame sue lam faheme ame dam ahia labe ab vadaham. Lahana Am sue sona bohu ada dusumda lam ba damat faheme vaha vabak. Ame sue lam susume tadehe bak aam vabna gi ahoba zoho labe faasi nom vou ihezidazi ihezidazidume vâmadehe sue modemu nehi ab ot gagoidamam. "Imo sue nim nasi a fatemule. Gi ibi iho fi mam baket fi mame aame neàdi ame da labe ahamo vale." Lâhâmu ame baket modi afoezobe dat vâmtea labe ame sue lam ab vaham. Meit Alat Vameadaha Im Toedahana laba nehi toehe bak nim, "Fâ modi imbodese," lahame labihaha bak. "Em sue lam damat faheme vadaho. Labi Em sue vâmtea damat fi mame meit vaho." Lahame fet toeme esuhu im lam ame meo dam labe vabili modeha ame bak lam ab modi imbodeham. 25 Labi Yesus ut tetehehunaso laba paku doho bak laba netàdi dozeadaha lahi neha: Am oi ame. Labi Am oi meida ame. Labi Klopasam nam Maria ame. Labi num debu Magdala labe lehe Maria ame. Labihasu ame lahi lam laba netàdi dozeadume aasda. 26 Laba dozeadume aasdam di labe Yesusat nom aaha Am oiti Aba vi tau meedamda meida Aba Aho deeleheda emti Aba netàdi dozeadaha bak aahemu am oi bake ab gagoham. "Oi, oho da niba ozom di gi om adat modemna ozomole." 27 Labi gagu neàdi Aba vi tau meedamda meida niba eba neo ab gagoham. "Nasi aamale. Em oi nim oho ozom di, 'Om oiat mode,' laham bak laba ozome vou aasdale." Labi gagohemu Aba vi tau meedamda nidi nibe Yesusat etei lab gagoho bak lam ba ame bak modehe bak etet. Eho ba Yesusam oi em numa vou le em oiali ab vou aziham. 28 Labi vou faodume Yesusat ozoha, "Em Aiat Aba Aho fet ozome esuhu im lam ahebu Eho meedume ab neàdehame?" labihaha bak lam ab vi ozome ozobohudeham. Ozobohudehe labe meit Alat Vameadaha Im Toedahana laba nehi toehe bak nim, "Fâ modi imbodese," lahame Yesusat ab gagoham. "Em valo àhâkeho," lahame labi gagoha ame fet toeme esuhu im lam ab modi imbodeham. 29 Labi anggur oo vaksa àhâkebuna damat ohanut modehe mokzoho fedehena amu damat im ba valo àhâkem bak laba ozome vou lehena etet. Lâhâmu meit ut avagat vao vizemna lam visoi ame anggur oo vaksa laba nom ekeme vizi neàdi hisop alahaso visoi zisu, "Yesusat fâ udese," lahame Yesusam aha laba ab tom fi sdamam. 30 Labihâmu Aho gi ahat ahamo udeme neàdi ab gagoham. "Ebe Eho meedam im foli ab vaitoham tame. Om Em nasi vam neàte," lahame gagoha Am ohu nom vekoamdi ab fi sivai eloham. 31 Yesus damat ut tetehehunaso laba paku doho digat lam gi hari Jumat modehe bak. Hari Sabat abo Yahudi damat ibi iho gi azibe im digat fulo vabaehe digat paku doho bak. Ame hari Sabat lam Yahudi damat ibi iho na àme iziam bak abo Paskah laba modesuhemu ame hari Sabat lada lam abo feà digat moz. Labihâmu ame hari Sabat fuseo modem di Yahudi dam labe ibi iho amu modi fi hasi baleàlehe bak ehe bak. Ame bak lam neham bak: "Hari Sabat fuseo modem di koeiso ba bako laba taasou vou diham vabak. " Lahame labihasu fi hahemu Pilatus bake ab le gagoham. "Dam làtela etei paku dodume taumahehe dam lam oho om meo dam gagome le ame dam lam im fodeha faa lam beome agube taho elodale. Labi iho koeiso taho vame fa baumahedume hari Sabat ba fuse." 32 Lahame labi gagohemu Pilatus uledi am meo dam gagome ab oluham. Labi ame meo dam labe le Yesus bake tau ut tetehehunaso laba paku doho dam behâsu labe im fodeha faa lam dat meida belu fa aguti esu. Labi neo dat meida belu fa aguti esu. 33 Labihadume Yesus bake neo beolo tom aaha Yesus gi elohona aahemu am fodeha faa ba fu agutem vabak. 34 Gi ame meo dam meida labe Yesus, "Eloho bak imboo?" laham bak aalo am fosot Yesusam eabe tom geiha vaseati vaksati fusuamdi ab nom iluham. 35 Ame im nim vameadamda gi eho Yohanesat vou duzu aasuhet meedaha labe ozobohudi ahate vameadam bak. Em ba giomim vameadam vaba gi im imbona vameadam bak. Uho Yesus bake tu vuzehem bake eho na aaha dât

Yesusat meedam im uba ahate ab vameadamam bak. 36 Labi etei Yesus am faa fu agutehe vabak lam meit Alat Vameadaha Im Toedahana laba nehi toehe bak nim, "Fà modi imbodese," lahame labihaha bak. "Am faa meida vàmtea buà ba meit fu agutem vabak," 37 Labi ame im meida neha: "Fosot tom geihida laba dam na modehe dam labe ohu vousai tom aada tame." Lahame fet toeme esuhu im behàsu lam ab modi imbodeham. 38 Labi Yesus eloi neàdi dat Yusufi ee fatahivahada labe aho Pilatus bake ab laham. Ame da lam num debu Arimatea laba azihida am. Ame da labe laha Yesus bake vi tau meedamda meida am. Lahana Yahudi dam busaoda eeda zi labe aba fakemna zohàme gi Yesus bake aa vi tau meeda. Lahamda labe aho Yesus koei visom bak ozome fa Pilatus bake gagu ailo ab laham. Laha labe le Pilatus bake ab gagoham. "Im etei Yesus koei ve vou le baumsulo oba gagu ailo leho." Lahame gagoha Pilatus uledi fa ab vi gagoham. "Lo, oho le visoi vou le baumsum neàte," lahame uledi gagohemu Yusufat Yesus koei visolo ab laham. 39 Yusuf ahamo lam kai. Nikodemus amu di iube Yesus bake aibut tàhi im vameadahada lamti ahili Yesus koei visolo ab laham. Nikodemusta aho na ahana neàna mur lamti labi na meida gaharu lamti labihasu keobededume valihemna asimbu bak abo tiga puluh kilo ozomomna vuusu ab vou laham. 40 Labi Yesus koeiso modesdam bak laba lafusi zisi Yesus koeiso lam vi vuu vuazi veioi vou usi iho vou lehe sue nasbe neàna bohu lam Yesus koeiso laba ab giadamam. Labi lab giadam di labe ame na ahana neàna keobena lam visoi vi goagoame sue zoho vi gia. Labi neo ame na keobe lam vi goagoame neo sue zoho vi gia. Labihadume ab giadaham. Yahudi dam labe ibi iho koei baumsum diat modi balehà bak labe ab modeham. 41 Damat Yesus ut tetehehunaso laba paku doho bak lam gi mei utoho bake netàdi modehe bak. Labi ame utoho obe lam laha ke bumat alimda amu feme bumatali ahumdi esuhuna ehèt. 42 Labihàmú ame ke bumat lada lam netàda amemu ame Yahudi damat ibi iho gi azibe im digat hari Sabat fuseo vabalehemu Yesus koeiso àvodehat visoi vou laha labe ame ke bumat laba vou oli esu fa futoi ke baana am doo laba tusum ulohoda lam vou ogi ogialame tusu baguamdi ab vou esmozi ladaham.

20:1 Labi usi behàsdi hari Minggu dihambe aibubet Magdala labe lehe nam Maria labe aho damat Yesus koei vou oli esuhu ke bumat laba ab laham. Le aaha ke baana koei esuhu bake vi baguamdehena lam ogizi osoktoi modesdam bak ab aaham. 2 Laham bak lam aahemu fa Simon Petrusti labi Yesus bake vi tau meedamda meida Aho deeleheda nimti iho esdam bak laba ab emoeham. Emoeme lefusi iba ab gagoham. "Im Boehàda Yesus koeiso lam ke bumat vou oli esuhu bak lam damat aa li ve voutame seteho. 'Ake vou le esuhela?' laham bak em ba ozom kaio?" 3 Lahame labi gagohemu im behàsu nim usai koei esuhu bak aalo ab emoedamam. Emoedam labe Yesus bake vi tau meedamda meida nibe eho fa Petrus vafuzi nasi duzu koei esuhu bake ab vou fuham. 5 Eho nasi lafuhuda nibe doo ozoh labe duzu nom bohusu ke bumat laba vi nabime aaha gi sue nasbe bohu koeisoa giahana lamota beilaha bak ab aaham. Lahana olem kai. Gi ub aame douda. 6 Labi Simon Petrusat ba duzuhuda labe aho neo vi fusi gi àvodehat ke bumata ab oleham. Labi oli neo vi nabiha ba koeiso aam kai. Gi sue nasbe bohu koeisoa giahana laba beilaha bak aa. Labi Yesusam dauha giaha sue zohobà footoi bolome ahamo vaitesu esuhuna lam laha aa. Gi labihasu laba beilahana lamota ab aaham. 8 Labi eho amu nasi lafuhuda nibe neo fa ab vi oleham. Vi oli aame vi ozo, "Imbot. Làhà Yesus Am eloho bak nibet fa ahedi ab usaham bak," lahame vi ozome ab tu vuzeham. 9 (Meit Alat Vameadaha Im Toedahana laba nehi fet toeme esuhuna nim, "Alat Gagu Olum Boehàda labe Am eloho bak labet fa ahedi usa tame," lahame fet toeme esuhu im lam ame dam labe iho amu vi ozome ozobohudehe vab labe vou meedume etei ab vou fuham. Gi ibi iho etei aaha bak labet vi ozome ozobohudi tuhu bak.) 10 Labi ame bak lam aame neàdi im Yesus bake vi tau meedam dam ahim nim iho fa num bake ab laham. 11 Labiha di labe Mariat fa neo koei

esuhu bak laba fa le doo obe laba duzu ab meddamam. Labi duzu meddam labe nom bohusu ke bumat laba nabitameam vi aaha 12 Alat Am im gagu vou usem dam behàsu labe iho sue sona fauha bohu dusuhuna nom ilu ame bak laba nusdam dam ahim ab aaham. Yesus koei amu esuhu diat ohu modesdam zoho laba dat meida alihi laba aa. Labi naoha zoho modesdam zoho laba dat meida alihi laba aa. Lahada. 13 Labi vi aame modeha ame Alam im vou usem dam labe Maria bake ab gagoham. "Oi, om baka ana modi meddàla?" Lahahat Mariat fa gago, "Em Boehàda koei damat aa li ve voutame seteho. 'Ake vou le esuhela?' laham bak em ba ozom kaio." 14 Mariat gi etei labihasu gagu vaktesi it aaha naat aba netàdi doudam bak ab aaham. Lahana, "Yesusat mode?" laham bak lam ba ozom kai. 15 Labi modeha Yesusat Maria bake ab gagoham. "Oi, om baka ana meddà? Om baka ama bake vi nabità?" Lahahat Mariat vedi da nim gi utoho bak niba li na meedalo modem dât mode tibame vi ozome fa ostame ab vi gagoham. "Dat Busao oa, im koeiso seti mozo. Oho ve vou lameam làhà oho vou le esuhu bak eba gagole. Eho le visoi fa vou le iademe baumsuse." 16 Lahahat Yesusat fa neo ab vi gagoham. "Maria." Lahame gi etei gagoha Mariat àvodi it vaktesi Aram daet, "Ai guru," lahalo ab gagoham. "Rabuni," lahame gagu Yesus bake le ab si vuusdamam. 17 Labi modeha Yesusat mali ab gagoham. "Eba a bisi vuusdamule. Em Ai bake tom ilulo modem bak fum kaio. Fota faobe tom ilulo mozo. Labiham bake oho gi fa le Eba tu vuzehi meedam dam zi laba im nehasu gagole. 'Umti Emti iho neha, "Ai," lahamda laba abo iho vou baedam Ala laba Em tom ilulo mozo,' lahale." 18 Lahame labi gagohemu Mariat aho Yesus bake vuusdam bak lam isi fa Yesus bake vi tau meedam dam totbahot esdam bak laba ab laham. Le lafusi ab gagoham. "Im Boehàda Yesus Am alihi eho aaho," lahame Yesusat Aba tahi vameadaha im lam dam bake ab fi desi vameadaham. 19 Ame hari Minggu aibu labe iho Yesus bake tu vuzehi meedam dam totbaho nibe num vàmtea laba oedume num doo ahebu it teudedume esda. Yahudi dam busaoda eeda zi labe iba neo sim bake iedi esda. Labi esdam di labe Yesusat olehe bak ozoho vab Dât iho esdam num bumat tomba niba gi li duzuhuna ab aaham. Li duzu ab gagoham. "Neàte. Um a iedemule. Um ahu teudi vou faodale." 20 Lahame gagu neàdi Am anekèhà damat paku doho bakti Am eabe fosot geihi bak lamti iba ab fi si vimtedamam. Labi iba fi si vimtedàmu iho ozo, "Làhà im Boehàda Yesus ame?" lahame vi ozome ozobohudi ab deeli vàmèdeham. 21 Labi Yesusat neo vi gago, "Neàte. Um a iedemule. Um ahu teudi vou faodale. Em Aiat amu Eba neha, 'Oho dam bakdate im Ebeda vou le vameatedale,' lahame Eba gagu oluhu bakti ulohona Eho neo uba gagu, 'Uho im Ebeda nim vou le vameatedale,' lahame uba ab gagu oudalo modemam bak." 22 Labi gagu neàdi Yesusat dam zi laba Am aha nutabe feume vi gago, "Alam Aha Nutabe Neàna labe uba modi vizese. 23 Labiham labe dam amomoit ibi iho faina meedam bak lam voedume fa ahu neà bak vàmademameam làhà uho fa Eba ot vai im dedamali ame dam laba nehi gagomta neàte. 'Uho faina meedàmu Alat uba beolo modem bak lam Aho gi vei mu fa faamome vei neàdedaho,' lahame gagom di imbot. Alat ame baket ab modeham bak. Lahana dam amomoit ibi iho faina meedam bak lam fa voedume fa ahu neà bak vàmadem vabameam uho fa Eba ot vai im dedamali ame dam laba nehi gagomta neàte. 'Uho lab faina meedàmu Alat uba beolo modem bak lam Aho ba gi vei mu fa faamome vei neàdedam kaio,' lahame labi gagom di imbot. Alat ba ame dam labe ibi iho faina meedaha bak lam Aho ba gi vei mu fa faamome vei neàdedam kaio," lahame Yesusat ab vi vameadaham. 24 Yesusat etei Aba vi tau meedam dam totbaho laba tahi am alihi fi si im vameadaha di lam Tomas abo Yesus bake vi tau meedam dam dua belas meida lam abo damat neha, "Tasbana," lahame taluhuda lam ame di lam lab taum kai. 25 Labihàmu Yesus bake vi tau meedam dam totbaho labe iho Tomas bake neha, "Im Boehàda Yesusam alihi vi aaho." Lahame gagoho di lam Tomasat gi tozome gago, "Uho lab gagoho bak lam, 'Im Boehàda Yesusam alihi vi aaho,' lahaha bak lam em ba vuzehem kaio. Em abo damat Am anekèhà paku doho bak laba eho

aame afoezobe em anekèhàso ame bumat laba dalu. Labi Am eabe fosot geihi bak lam laha anekèhà ebedat ula. Labihanta uho lab gagoho bak lam eho tu tame," lahame ab gagu tozome esuham. 26 Labi vou faobe hari Minggu bada labe Aba vi tau meedam dam labe neo ame num vàmtea laba neo oedume num doo ahebu it teudedume vazisi esda. Ame di lam Tomas fa neo laba vi tau vahi esda. Labi modeha doo teudehena Yesusat olehe bak ozoho vab Dàt gi damat esdam num bumat tomba laba neo li duzuhuna ab aaham. Li duzu gago, "Neàte. Um a iedemule. Um ahu teudi vou faodale." 27 Lahame labi gagu neàdi Aho neo Tomas bake ab gagoham. "Tomas om nasi Eba netàdi Em anekèhà damat paku dome bumatalehe bak nim om anekèhàso nasi dalu aamale. Labi Em eabe damat fosot geihi bak nim laha om anekèhà baat Em so niba nasi ulasi ozo, 'Eho mode?' laham bak nasi vi ozobohudi tu vuzehete. Bisi a nehi vi ozodamule. 'Em eloi setehe? Em fat ahedi usaha vabao?' lahame ozodam bak lam gi nasi voou setehe." 28 Lahame labi gagohemu Tomasat ame baket ab modeham. Labi Tomasat àvodi ab gagoham. "Làhà imbot. Om abo em Boehàda ame. Om abo eho vou baedam Ala Om ame." 29 Lahahat Yesusat fa gago, "Om gi etei Em alihi aaha labe om Eba ab tu vuzehame? Lahana om Ebe Eho etei gagolo modem im nim vi aime ozomale. Dam Eba aaha vabnàme Eba tu vuzehem dam lam Alat deeli dam laba im neà bak modi esuiam dam am bak," lahame ab gagu esuham. 30 Na damat ihimo modem biem im feàna damat fet aame ozobohudemna Yesusat meedahana lam abo Aba vi tau meedam dam labe aasuhet meedahana lam zi dua totbaho lam buku niba eho Yohanesat toedaha vabda ehete. 31 Lahana ebe eho nib toedaha zoho nim gi uho neha, "Ame Da Yesus lam abo Alam Adat Aho Gaguh Fihasi Vimteme Bak Niba Nom Oluhu Dat Boehàda am tame," laham bak lam, "Uho tu vuzehese," laham bak laba ozome eho sunit niba ab toedaham bak. Labi uho Aba tu vuzehete bak labet modi uho Alati vahi gi ahe neàna bohu vuusdam bak am tame.

21:1 Labi usi vou id lame digat meida iube Yesusat Itea Tiberias auobe laba le Aba vi tau meedam dam laba neo Am alihi ab fi ham. Aho Am alihi fi si meedaha bak lam gi nehaha bak. 2 Itea Tiberias auobe laba Aba vi tau meedam dam tujuh neham dam laba esda. Simon Petrus ame. Labi Tomas damat neha, "Tasbana," lahamda ame. Labi Natanael Galilea bak labe am num debu Kana labe leheda ame. Labi Zebedeusam adam behàsu ame. Labi Yesus bake vi tau meedam dam meida behàsu ame. Labihasu ame itea auobe laba esda. 3 Labi esdameilahit Simon Petrus labe dam totbaho bake ab gagoham. "Em bohe lalo mozo." Lahame gagohemu dam neha, "Làhà im tause," lahame gagu vahi disi aibubet ihe vihitoi ziddume ab vou buadaham. Labi vou bu neàdi bohe dek nom voou vou keadahit ab vou dihaham. Lahana ba bohe vam kai. 4 Labi dihambe di fi zeam bitodam di labe Yesusat Am alihi damat aam neà bak laba ozome itea auobe laba ab le duzuham. Lahana ame Da lam, "Yesusat mode?" laham bak lam dam vabile. 5 Làhàmù Yesusat dam laba ab buteham. "Ba oa, um bohe vadào?" Lahahat dam labe fa gago, "Vabo. Bohe vam kaio. Im gi bohet vanamai dihaho." 6 Lahahat Yesusat fa neo vi gago, "Làhà, uho um bohe dek lam fa visoi um ihe ahi totbaho laba neo nom voou vou keadale. Bohe vam bak am tame." Làhàmù dam labe Yesusat gagoho bak labet bohe dek ahi totbaho laba nom voou vou keadume modeha bohe feà bak fusi asimbuli vi vuu vousai iheba esum vanamai meeda. 7 Vanamai meedam di labe Yesus bake vi tau meedamda meida Aba Aho deeleheda nibe eho ozo, "Ame Da lam gi Yesusat modemna ozomo?" lahame ozobohudi fa Petrus bake ab gagoham. "Itea obe iuba doudamda lam im Boehàdat modem bak." Lahame gagoho bak lam Petrusat gi etei aiha am sue koena bo dusudàmù am sue sona bohu ahobada amu na modem bak ozome vihitoi esuhuna lam àvodehat visoi fa ab duzuham. Dusu neàdi, "Yesus bake tàse," lahame valo nom ilu nasi vouda. 8 Labi ihe lam dam totbahot ba bohe dek ti vou keadam labe vou zituada. Bohe dek laba bohe vâlume asimbuli betea vou keada. Dam labe iho bohe



buhu bak lam mahate bohulana buhu vabak. Gi auobe netàdi seratus meter lamoho ozome buhu bak. 9 Labi vou zitu neàdi iho aaha vua gazihì laba bohe osba vaheme esdam bak lamti rotiti ab aaham. 10 Labi modeha Yesusat ame dam laba ab gut gagoham. "Um bohe etei vahana lam zoho vou lele." 11 Lahame labi gagohemu Simon Petrusat ihe laba fa zisi bohe dek lam vuu fi bovai nohula ab vou zituham. Vou zitu fi zeam bitoi fi goaitoi debe aaha ame bohe lam abo seratus lima puluh tiga etet. Labi ame bohe lam laha abo buduana feàt modem bak. Lahana bohe dek lam ba bohet belu vàuhu vabak. 12 Labi aame neàdehezobe Yesusat ab gagoham. "Um nasi ledale. Im na koena nim vahi àdase." Lahame gagoho di lam iho Aba vi tau meedam dam meida vàmtea ba nehame vi gagu aihì vabak, "Imbo? Om Yesusat mode?" laham bak ba vi aim iedi gi daleàde. Lahana, "Im Boehàdat modem bak," laham bak lam ozobohuta ozobohut. Lahana ba vi gagu aim gi vei lade. 13 Lahamnàme iho ozahit li bakamta vahi neàdehezobe Yesusat amu nasi le roti visoi fa vou li faheme dam bake loda. Labi neo bohe visomoame dam bake neo loda. Lahadume ab àdaham. 14 Yesus am eloho bak labet Alat modi fa ahedi usai Aba vi tau meedam dam laba le tàhi am alihi fi hi bak lam eteida nim gagom labe ab làteladeham. 15 Labi na àme neàdi Yesusat vi ailo Simon Petrus bake ab gagoham. "Simon, Yonam adat oa, Eba vi tau meedam dam totbaho nibe Eba deehe bak nim oho fa vafosi om Eba bisi duana vou ali ahu vàmadi deeheho?" Lahahat Petrusat fa gago, "Lo, Ai Boehàda oa, eho Oba deehe bak lam Om ozobohuna taia?" Lahahat Yesusat fa neo vi gago, "Làhà, oho Em domba adambe ozomomna oho vou aasdume na àmna lodale." 16 Lahame labi gagu neàdi Yesusat vedi fa neo ozoha vabamu Petrus bake ab vi gagoham. "Simon, Yonam adat oa, om Eba bisi duana vou ali ahu vàmadi deeheho?" lahame gagoho bak ab behàsdeham. Lahahat Petrusat neo fa gago, "Lo, Ai Boehàda oa, eho Oba deehe bak lam Om ozobohuna taia?" Lahahat Yesusat fa neo vi gago, "Làhà, Em domba ozomomna oho vou aasdale." 17 Lahame gagu neàdi Yesusat vedi neo Petrus bake vi gagu làteladelo neo ab gagoham. "Simon, Yonam adat oa, om abo Eba deehe bohu meedào?" Lahame gagoho bak làteladi modeha Petrusat ahu faidi vi ozo, "Yesus akati modelo eba ame baket gagoho bak làteladehela?" lahame vi ozome fa neo gago, "Lo, Ai Boehàda oa, Om abo na im ahebu ozobohuda Om am bak. Eho Oba deehe bak lam om ozobohu bak." Lahahat Yesusat neo vi gago, "Làhà, Em domba ozomomna oho vou aasdume na àmna lodale. 18 Labi im Eho etei oba gagolo modem imboda nidi nim oho laha iademe vi aime ozomale. Om amu bas diat gi obo ohomo ozoho baket na meedalo sue dusu afoezobe om soa gimsuidamna gimsu neàdi obo oho lalo ozoho bak laba laidam bak. Obo oho modi balehà bak am bak. Lahana ba diamut om aolem di iube dam amomoit om so laba sue nom dusuida tame. Labi laha damat om anekèhà ahim visoi ut tetehesuhunaso laba gutaasu giadume obo oho lam mom bak laba vou la tame." 19 (Yesusat etei lab gagoho im lam gi Petrus am ba damat ve ut tetehesuhunaso laba esu paku dome elom bak lam, "Petrusat fà ozobohudese," lahame labi gagoho bak. Abo, "Petrus akatihu modi elom labet modi damat Alam ee vousai Aba vou baedàla?" lahame tombalelo ahit labi gagoho bak.) Labi Yesus im lada lam vameame neàdi Aho neo Petrus bake ab vi gagoham. "Om gi Eba laha vi tau meedam bohu meedale." 20 Lahame gagu neàdi ladam labe Petrusat fa it vaktesi aaha Yesus bake vi tau meedamda meida abo Yesusat deeleda eho Yohanesat ba vi vuedam bak ab it aaham. Abo na àme iziam bak abo Paskah lam àm digat tombuda vahi na àdam di labe eho Yesusam so laba nem ulasi netàdi aa gago, "Ai Boehàda, amat Om vou fohome meia ub lu otela?" lahame amu gagohoda labe eho vi vuedam bak ab it aaham. 21 Eba it aahemu Petrusat Yesus bake vi ailo ab gagoham. "Ai Boehàda oa, dat ba im ohuse vi vuedamda nim ba akatihà?" 22 Lahahat Yesusat fa gago, "Meit ahamo modem im akati oho vi ailo modela? Eho nehi ozo, 'Da nim gi ahe lahasuhuna Eho ba fa li aase,' lahame Eho labi ozome ahumdi esumeam làhà gi Ebe Eho ozoho baket modemna oho akati bisi vi ailo mode? Oho gi Eba laha tu

vuzehi meedam bohu meedale." 23 Gi Yesusat etei lab gagoho bak lam vedi Aba vi tau meedam dam labe iho aihi bak lam fa vou gago ladume modeha dam Yesus bake tu vuzehi meedam dam totbaho labe aime git ab ozoham. "Làhà, Yesus bake vi tau meedamda lada lam ba elom kaio," lahame git ab ozoham. Lahana Yesusat ba labiham bak ozome gagoho vabak. Aho gi neha, " 'Da nim gi ahe lahasuhuna Eho ba fa li aase,' lahame Eho labi ozome ahumdi esumeam làhà gi Ebe Eho ozoho baket modemna oho akati bisi vi ailo mode?" lahame Yesusat gi labi gagoho bak. 24 Etei Yesusti Petrusti ba vulamda lam gi Eho Yohanesat modem bak. Etei nib vameadaha im zi nim eho Yohanes Yesus bake vi tau meedamda meida modem labe na im zi nim ahebu aadume toedahada em ame da am bak. Labi eho toedaha im zi nim, "Imbote," lahame imota ab ozobohudeham bak. 25 Yesusat Aho meedaha im zi totbaho lam eho toedaha vabda abo duate. Em gi zohota toedaho. Eho ozoha, Yesusat Aho lab meedaha im ahebu lam meit ahebu toedume uloholemeam làhà ba bak niba ame buku zi vahedam di im dua labe bak nim kekesi ba vahem biem bak. àhàm.